


Л.А. АЛИЕВА
Г.Э. МУРТАЗАЕВА

ЭДЕБИЙ ОКЪУТУВ

4 СЫНЫФ

Окъутув къырымтатар тилинде
алып барылгъан умумтасиль мектеплери
ичюн дерслік



«Букрек» нешрият эви
2015

ББК 83.3 (4УКР–6КРМ)я72+632.3я72

А 50

*Рекомендовано Міністерством освіти і науки України
(наказ від 29.09.2015 № 985
у редакції наказу МОН України від 16.12.2015 № 1304)*

**Видано за рахунок державних коштів.
Продаж заборонено**

Рессам: З. Акимова

ШАРТЛЫ БЕЛЬГИЛЕР:



Лугъат



Суаллер ве вазифелер



Берабер чалышайыкъ



Лугъат иши



Иджадий вазифе



Бильгилеринъизни
тешкеринъиз



Аталар сёзлери



Яш рессамларгъа

Алиева Л. А., Муртазаева Г. Э.

A50 Эдебий окъув: 4-юнджи сыныф, окъутув къырымтатар тилинде алып барылгъан умумтасиль мектеплери ичюн дерслік. – Черновцы : Букрек, 2015. – 176 с. : ресимли.

ISBN 978-966-399-715-5

ББК 83.3 (4УКР–6КРМ)я72+632.3я72

Алієва Л. А., Муртазаєва Г. Е.

A50 Літературне читання. Кримськотатарська мова : підручник для 4 класу загальноосвітніх навчальних закладів з навчанням кримськотатарською мовою / Л. А. Алієва, Г. Е. Муртазаєва. – Чернівці : Букрек, 2015. – 176 с. : іл.

ISBN 978-966-399-715-5

ББК 83.3 (4УКР–6КРМ)я72+632.3я72

ISBN 978-966-399-715-5

© Алієва Л. А., Муртазаєва Г. Е., 2015

© Видавничий дім «Букрек», 2015



МЕКТЕП ВЕ МИЛЛИЙ ТИЛЬ

Парлакъ фикир, терен акъыл къазанылыр мектепте.
Бундан марум къалгъан адам акъи олур, эльбетте!
Илим, унер, миллий тильни бунда огренир инсан,
Бир миллетке кереги де — ана тиль, ана лисан.

Не зевкълыдыр мектеп чагъы, ана тили эм тасиль,
Джеалет — бир сия леке, буны узериңден силь.
Мектеп илим деръясыдыр, сен де бунъа дал да чыкъ,
Намлы, шуретли олурсынъ, джаилликни ур да йыкъ!

Якъуп Шакир-Али



лисан — тиль

акъи — мында: бильгисиз

джеалет — джаиллик

мектеп чагъы — мектепте окъугъан вакъты



1. Шиширни ифадели окъунъыз.

2. Мектеп чагъынъыз насыл зевкълы кечкени акъкъында икяе этинъиз.

КИТАП

Инсан китаплардан эр шейни тапар. Олар адамны эм кульдюрир, эм агълатыр. Китап саифелеринде биз къышнынъ энъ зеэрли сувукъларында, омюрнинъ энъ аджды дақъкъаларында биле баарьнинъ энъ гузель левхаларыны коре билемиз... Языджылар инсанларнынъ юреклерине кирер, къан дамарларында долашыр, тюшюнджелерини, дуйгъуларыны корер, эшиитмеген шейлеримизни эшитир, бизге де бильдирирлер.

Китаплар кузьгу кибидирлер. Оларда бутюн омрюмиз джанланыр. Юреклеримиздеки энъ чиркин, энъ пис дуйгъуларымыздынъ янындаки энъ гузель ве энъ темиз дуйгъуларымызы да коремиз.

Олар бирер ибret мейданыдыр. Виджданларымыз оларнынъ къатында майышыр, агълар, ишлеримиз догърулыр, юреклеримиз темизленир.

Абибулла Одабаш



Сизлер, муэллифнинъ китап акъкъында беян эткен фикирине къошуласынъызмы?



Ашагъыдаки джумлелерни девам этинъиз:

Китаплар адамны эм ...,

Китапта энъ зеэрли ..., энъ аджды ... биле энъ гузель ... коремиз.

Языджылар юреклерге ..., къан дамарларында ..., дуйгъуларны ..., эшиитмегенни ..., бизге

Китаплар ... кибидир, чонки

Виджданларымыз оларнынъ къатында ..., ...,





ХАЛКЪ АГЪЫЗ ЯРАТЫДЖЫЛЫГЪЫ



2-ножи дерс

Къырымтатар халкъының тили зенгин, дюльбер, мергин, ифадели, аэнклидир. Оның гузеллиги халкъымызының асырлар девамында яраткъан эсерлеринде акс олунгъан.

Биз даа бешикте олгъанда, аналарымызының мераметли, назик сесинен йырлагъан айненинисини эшите эдик. Лаф этмеге огретмек ичюн, бизге бала шиирлери, тезайтымларны эзберлете эдилер.

Йыл-йылдан къартана-къартбабаларымыз айткъан масалларны динълеп, тапмаджаларны тапып, осемиз. Чешит бала оюнларыны ойнағъанда, тезайтымлар, сайымлар эзберлеймиз.

Бешик йырлары (айненни), аталар сёзлери, тапмаджалар, сайымларны халкъ уйдура, ярата. Оның ичюн бу эсерлерге **халкъ агъыз яратыджылыгъы** дейлер. Халкъ яраткъан эсерлернинъ чокъусына эсасланып, шаир ве языджылар бедиий эсерлер яза.

БЕШИК ЙЫРЛАРЫ

Бала, сабийлик чагында, ильк эшиткен йырларындан бири **айненни** ола. Мераметли, назик, охшайыджы сеснен йырлагъан айненнинде аналар озь арзу-истеклерини, дуйгъуларыны ифаделейлер.

* * *

Ай-я, ай-я, ай, балам,
Осип, бую сен, балам.
Меним къызым оседжек,
Гульбагъчада кезеджек.

* * *

Ай-я, ай-я, ай-я-сы,
Не заман тиер файдасы.
Яз тиймесе, къыш тиер,
Ашыкъмасын бабасы.

* * *

Огълунъ олса, бир бахттыр, айненни,
Къартайгъанда, таякътыр, айненни.
Пенджеренъе къапакътыр, айненни,
Къаранлықъта чыракътыр, айненни.
Ай-я, ай-я, ай!
Юкъла, балам, сен.



1. Халкымыздынъ тили — зенгин, дюльбер, ифадели олғаныны насыл эсерлер исбаттай?
2. Насыл эсерлерни халкъ яратты?
3. Халкъ агъыз яратыджылыгъына насыл эсерлер кире?
4. Бешик йырларыны насыл сеснен йырламакъ керек?
5. Аналар айненнинде насыл дуйгъуларны ифаделей?
6. Айненилерни ифадели окъуп, энъ бегенген союны эзберленъиз, бир макъам уйдурып, йырламагъа ограйниъиз.



БАЛА ШИИРЛЕРИ

Бала биринджи эджа, сёзлерни теляффуз этип башлагъанынен, онъа шиирчиклер эзберлетеңдер. Бу шиирчиклер, къыскъа олып, баланы лаф этмеге ограйте. Бала шиирлеринде, эр бир сатырның соңунда кельген сёзлерниң соңында әджалары бири-бирине уйгъун келе. Меселя:

Ягъ, ягъ, ягъмурым,
Текне толсун хамырым.
Орталықълар ешерсин,
Эр кес къызгъын ишлесин.

Бу шиирде биринджи ве экинджи сатырларда **ягъмурым** ве **хамырым** сёзлери бир-бирине уйгъун келе. Учюнди ве дөртүндже сатырларда исе **ешерсин** ве **ишлесин** сёзлери бири дигерине аэнкдеш, уйгъун олып келелер. Бала шиирлери енгиль окъула ве тез эзберлене.

* * *

— Къайда единъ, сансарчыкъ?
Биз сени чокъ къыдырдыкъ.

— Тавгъа бардым арабанен,
Фындыкъ джыйдым торбанен.
Ёлда арабам къырылды,
Фындыкъларым тёкюльди.

— Агълама сен, сансарчыкъ,
Арабаныны ясармыз,
Фындыкъларны топлармыз,
Чокъ-чокъ этип, ашармыз.

* * *

Оп, оп девелер
Къарасувдан келелер.
Аякълары — ялпакъ,
Башларында — къалпакъ.

* * *

Эчкичигим бар эди,
Балалайым дер эди.
Балаласа, беш олур,
Чобанларгъа эш олур.



1. Шиирлерни ифадели окъунъыз. Олар не акъкъындадыр?
2. Сансарчыкъ акъкъында шиирни роллерге болип окъунъыз.
3. Шиирнинъ биринджи джумлеси насыл сеснен окъула?
4. Бегенген шиирни эзберленъиз.



4-юнджи дерс

ТАПМАДЖАЛАР

Къадими заманларда акъшам чыракъ ярыгъында отурып субетлешкен къоранта азалары бир-бирине тапмаджалар айтып әгленгенлер. Тапмаджалар инсаннынъ зенини, зеккийлигини, азырдже瓦ллықъ къабилиетини юксельте, арттыра.

Тапмаджаларда айванларнынъ, осюмликлернинъ, предметлернинъ, чешит табиат адиселернинъ аляметleri тариф этиле. Бу аляметлерге коре оларнынъ джевапларыны тапмакъ мумкун.

Къакъылдайым азбарда,
Тобанларның янында.
Сизге, балалар, йымырта
Береджегим ярын да.

(Т..в..къ)

Къаранлықъ аран тёрюнде
Къаздай олып отура.
Тарамагъа сачы ёкъ,
Таздай олып отура.

(М..с..р)

Инеси чокъ, тикиши ёкъ,
Ярысы — ине, ярысы — тюк.
(К..рп..)

Йип киби созулыр,
Басым киби джыйылыр,
Бакъсань — эви корюнmez,
Шу дакъкъасы джоюлыр.

(Й..л..н)

Иш буюрма, мен — «бейим»
Тап кетир бер, мен ейим.
(М..ш..къ)

Урбам меним — тегенек,
Бу тегенек — не керек?
Юварланып яткъанда,
«Тийме манъа, сен!», — демек.
(К..рп..)

Меним омрюм пек аздыр,
Къуванчым тек бир яздыр.

Тюшме, бала, пешиме,
Мен кетейим ишиме.

(К..б..л..к)

Юва япам сачакъта
Язынъ куню сыджақъта.
Эр кунь тюркю айтам мен,
Кузъде сизден кетем мен.

(Къ..р..лгъ..ч)

Атеш башында отургъан,
Эки козюни шарт юмгъан.

(М..ш..къ)

Саллана, саркъа, ерге тюшмеге къоркъа.
(Ор..мч..к)

Къызыл эвде юз агъа-къардаш яшай,
Эписи бир-бирине ошай.

(Н..р)



1. Тапмаджаларны окъуп, джевапларыны тапмагъа тырышынъыз.
2. Джевапларны тапмакъ ичүон, тюшюнип бакъынъыз: мында тарифленген аляметлер кимге аит ола билир?
3. Бир къач тапмаджаны эзберленъиз ве эвде къоранта азаларына тапмакъынавале этинъиз.



Къызыл, къуванч сёзлерине манаджа якъын сёзлер тапынъыз. **Аз, отура, сыджақъ** — сёзлерине акс маналы сёзлер тапынъыз.



ТЕЗАЙТЫМЛАР

Балаларны тез ве дөгъру лакъырды этмеге огратмек ичюн, халкъымыз тезайтымлар уйдурғын. «Ким тездже ве дөгъру айтыр» деген ярышлар да кечирген. Сиз де бойле ярышны озы сыныфдашларыныз арасында тешкиль эте билесиз. Тезайтымны эзберлемек ичюн, оны бир-эки кере давушсыз, сөзлерни дөгъру, ачыкъайдын теляффуз этип, окъумакъ керек. Соң исе, давуш чыкъарып, тезликни арды-сыра юксельтип, эзберлемек лязим. Эзберлеген соң исе, тез ве дөгъру айтмагъя арекет этмели.

Тез айтып оласынъызмы?

Чакъырджы Али Велини чагъырдымы,
Вели чакъырджы Алини чагъырдымы?

Акъ чайникке акъ къапакъ,
Кок чайникке кок къапакъ.

Аджы-татлы ашларны чокъ ашамалымы, ёкъса,
Аджы-татлы ашларны чокъ ашамамалымы?

Къартбаба, къалпагъындаки къарны
Къакъа-къакъа къалын къардан,
Къабарып, къапалып къалгъан
Къобанынъ къаршысында къадалып
Къалгъан Къадырнынъ къолуны
Къолунен къысты.

Турупны дут тутып турамы,
Дутны туруп тутып турамы?



АТАЛАР СЁЗЛЕРИ

Буюклерниң лакъырдысыны, субетини динълесенъиз, пек чокъ айтылған икметли ибарелерни эшитмек мүмкүн. Меселя, къартаналарымыз торунларыны мектепке озгъарғанда, окъув, бильгининъ эмиети акъкъында насиатлы сёзлер айта:

Илим акъыл чокърагъыдыр.

Окъумакъ-язмакъ — иненен къую къазмакъ.

Китап — бильги анахтары.

Бир ишни пек ашықъып беджерсек, бизге:

«Яваш юрьген къыр ашар», — дейлер.

Буюк агъанъызгъа ана-бабанъыз:

«Баба унерини ташлама», — деп,
зенаат сайламагъа ярдым эте.

Янъы достунъыз пейда олса:

«Озюне бакъма, сёзюне бакъ.

Бетке дегиль, юрекке бакъып, дост ара», —
дейлер.

Бойле икметли ибаре ве сёзлерге **аталар сёзю** дейлер.
Аталар сёзю — насиат бериджи, къыскъа, отъюр ве терен маналы ибаредир.

Аталар сёзлери бизге тиль, илим, эмекнинъ эмиети акъкъында, ана-баба, дөгъмушлар арасындаки мунасебетлер, Ватан, достлукъ, яхшылықъ, дөгърулықъынъ къыйметини бильдирелер.

Къайда бирлик, анда тирилик.

Адамны севдирген табиатнен эмектир.

Адам иш башында белли олур.

Инсанның сөзюне дегиль, ишине бакъ.
Ана киби яр олмаз, Ватан киби ер олмаз.
Ана-бабанъа сөз къайтарма.
Ана-бабагъа урьмет этсенъ,
Озюнъ урьмет корерсинъ.
Башлагъан ишинъни ташлама.
Бирлик әвде берекет бар.
Ватан — экинджи ананъ.
Йигит олгъан — ялан айтмаз.
Досттан зарап тиймез.
Достсуз адам — къанатсыз къуш.
Достуна урьмет эткен — озюне сайгъы къазаныр.
Джебинъде паранъ олмасын, достунъ олсун.
Иш севмезни эль севмез.
Ерни кунеш яраштырыр, инсанны — иш.
Тирнеклик баҳт кетирир, тенбеллик ачтан ольдюрир.



1. Аталар сөзлерини окъуп, олар неге багышланғыны айтынъыз.
2. Ватан, достлукъ, эмек акъкъында бир къач аталар сөзлерини дефтеринъизге язып, зазберленъиз.



7-нәджи дерс

МАСАЛЛАР

Масал — уйдурылгъан мундериджели икяе. Масалларда иштирак эткен шахыслар: айванлар, къушлар, эшьялар, осюмликлер — инсан къияфетинде иджра этелер.



Экинджи ве учюнджи сыныфларда оқыуғын масалларны хатырланызыз. Бу масалларның баш къараманлары — кимлер? Энъ бегенген масалның мундериджесини хатырлап, икяе этинъиз.

ЯЛАНДЖЫ

Заман-заман экенде, пек узакъ бир улькеде бир яланджы яшагъан. Куньлерден бир кунь, яланджы, кой ичинден кечип кетеяткъанда, бир топ баланың ашыкъ ойнагъаныны коре. Балалар зий-чув ойнайлар. «Къарам этесинъ»¹ деп, давалашалар. Атта ашыкъкъа талашып, тепелешелер. Балаларгъа бакъып турғын яланджы: «Бир оюн этейим буларгъа», — дей де, къолларыны бири-бирине окъалай.

— Эй, балалар! Ашыкъ оюны къачмаз, амма, атав² битер, — дей о.

— Насыл атав?

— Анавы койни коресизми?

— Коремиз, — дейлер.

— Ана шу койниң айтүвлү бир адамы ольген. Къазан-къазан эльва пиширип, май къоқъутып, локъум пиширгенлер. Бутюн халкъкъа атав даркъаталар. Чапынъыз анда, битмезден эвель. Мен энди ашап тойдым, — о, дудакъларыны ялап, сюрте. — Не, балалар, инанмайсызмы? Инанмасанъыз, мына соранъыз папучымдан, — дей.

«Яланджының шааты янында», — дегенлери дөгъру экен, балалар инаналар.

— Айдынъыз, кеттик! — деп, балалар чивильдешип,

¹ къарам этесинъ — айнеджилик этесинъ

² атав — бир де бир вакъиагъа адап пиширильген аш



бири-бирини озып, ер тозуны булут киби котерип, къомшу койге чапалар. Балаларның мерамы — атав ашап тоймакъ, чюнки фукъаренинъ эвинде эр кунь ягълы аш олмагъан.

Яланджы исе, балаларның чапкъанына тааджипленип, бакъып тұра да: «Булар не о къадар чапа экенлер? О койде атав берильгени бельки дөгърудыр? Я мен озюм де бугунь ағызыма бир локъма биле къойғъаным ёкъ, ачым да! Атав битмезден эвель, мен де етишнейим», — деп, папучларыны чыкъарып къолуна ала да, табана къувет берип, балаларның артындан озю де чапа.



1. Масалның мундериджесини анъладынызы?
2. Насыл бала оюнларыны билесинъиз?
3. Масалда расткельген аталар сёзюни бельгиленъиз.



Бир оюн этейим буларгъя; табана къувет берип — ибарелерининъ манасыны насыл анълайсыныз?



**Яланжының эви янгъян, кимсе инанмагъан.
Яланнен копюр къургъан кери къайтмаз.
Яланжылықънен хырсызлықъ агъа-къардаштыр.
Акъ севгенни халкъ север.**



Аталар сёзлерини дефтерге язып, ззберленъиз.



МУСТАФА

Бир заманда бар экен, бир заманда ёкъ экен, ялы боюнда яшагъан фукъаре бир къартанай бар экен. Онынъ Мустафа адлы торунындан гъайры дюньяды кимсеси ёкъ экен. Мустафа бутюн кунь ыргъатлықъ япа, базар кунълери исе къартанасынынъ бир афта ичинде оръген чорапларыны, базаргъа кетирип, сата экен.

Куньлерниң бириnde о, базардан къайтаяткъанда, ёлда бир баланы расткетире. Бала ничар бир копекниң бойнундаки йипини чеккелеп, оны чекиштире экен. Мустафа копекни пек аджый ве баладан оны сатын ала. Бираз кеткен соң о, бичаре бир мышыкъны балалар ташнен ургъаныны корип къала ве олардан мышыкъны сатын ала. Эвлерине якъын къалгъанда, кене бир къач балагъа расткеле. Олар уфачыкъ къутунынъ къапагъыны ачалар да, зий-чув къопарып, оны кене орътепер. Мустафа, балаларнен меракъланып, оларгъа якъын келе. Бакъса, къутунынъ устю ачылгъанда, анда къапалгъан йылан баласы башчыгъыны котерип, чыкъайым дегенде, балалар деръал онынъ къапагъыны къапаталар. Мустафа йыланны пек аджый ве соңки парасына оны да сатын ала. Бойледже, Мустафа, паранынъ эписини масраф этип, эвине келе. Торуны алып кельген копек, мышыкъ ве йыланны коръген къартанай:

— Алла-Алла, балам, сенинъ япкъанынъ недир? Кендимиз зар-зорнен кунь кечиремиз, бунынъ устюне бу айванларны да алып кельдинъ! — дей онъа.

— Къартана, буларнынъ бизге ич бир тюрлю агъырлыгъы тюшmez, — дей Мустафа ве айванларгъа бирер парча отымек бере.

Арадан баягъы вакъыт кече. Копекнен мышыкъ, семирип, кемалаткъа етелер. Йылан да эппейи осе. Олар Мустафанен достлашалар. Мустафа эвге кельгенде, эписи оны къаршылап алалар. Къартанай да оларға пек алыша.

Мустафа бир кунь эвге кельсе, достларының арасында йылан корюнмей. О, йыланны къартанасындан сорай. Къартый де оның не ерде экенини бильмей. Мустафа, йыланны арап, ёлгъа чыкъа. Бакъса, йылан къайдадыр ёл алғын. Мустафа ондан не ерге кетеяткъаныны сорай.

— Эвимизге кетем, — дей йылан. — Чокъ сагъ ол, Мустафа, сенден хатирим пек хош! Лякин меним анамбабам бар. Оларны сагъындым! Истесенъ, юрь бизге, сени ана-бабамнен таныш этерим.

Мустафа йыланның теклифине разы ола, ве берабер кетелер. Эвлериине якъын къалгъанда, йылан Мустафагъа шойле дей:

— Шимди бизге барсакъ, бабам санъа: «Не истегинъ бар, айт», — дер. Сен оның берген шейини алма. Тек оның элиндеки алтын юзюкни исте. О юзюкни бир кере ялап, не истесенъ, истегинъ деръал ерине келир.

Йыланның ана-бабасы пек къуваналар. Лякин, Мустафа энди къайтмагъа тедарикленгенде, йыланның бабасы онъа:

— Не истегинъ бар, айт! — дей.

Мустафаның: «Манъа ич бир шей керекмей», — дегенине бакъмадан, олар оны бош эльнен къайтармайджакъларыны айталар. Бундан соң Мустафа йыланның бабасына: «Пармагъынъыздаки алтын юзюкни берсенъиз, алым», — дей. Йыланның бабасы юзюкни бермеге пек языкъсынса да, лячаре, бермеге меджбур ола. Чюнки Мустафа оның бирден-бир баласыны олюмден къурттарды. Мустафа, юзюкни алып, эвлериине къайта. Чорап орип отургъан къартанасына:

«Къартана, мен падишанынъ къызына эвлемеге истейим. Барып падишагъа шу истегимни бильдириңиз», — дей. Къартанасынынъ итираз бильдиргенине бакъмадан, Мустафа ялвара-ялвара оны сарайгъа ёллай. Къартанай къоркъа-пыса падишагъа барып, онъа озь макъсадыны айта. Падиша, факъыр бир къартанайнынъ сёзлерини эшитип, ачувлана. Лякин, озюни адалетли косътермек ичюн, онъа шойле дей: «Яхшы, къызымынъ сенинъ торунынъа берейим. Амма шойле бир шартнен: торунынъ Къара денъизнинъ ортасында алтындан сарай къурмакъ керек. Алтын сарайнен меним сарайымны кумюштен япылған копюр багъласын. Къыркъ кунь ичинде бу сёйлегенлерим япылмаса, торунынънен экинъизнинъ башларынъыз кесиледжек!»

Къартанай, агълай-агълай эвине келип, торунына падишанынъ эмрини айта. Торуны кулюмсиреп: «Къартанам, сиз бунъа къасеветленменъиз, — дей. — Мен къыркъ кунь ичинде падишанынъ эмрини ерине кетирмеге тырышырым».

Къартанай исе: «Балама бир шей олды», — деп, феръяд-фигъан къопара. Мустафа зар-зорнен оны тынчландыра. Арадан бир кунь, он кунь, бир ай кече. Отуз докъузынды кунь де кирип келе. Къартанай: «Торуным яп-яш оледжек», — деп, бутюн гедже агълай, соң сабагъа якъын юкълап къала. Падиша къыркъынды куннинъ сабасына ярыкъ шавленинъ тесиринден уяна. Тёшегинден къалкъып, пенджеренинъ янына бара. Пенджере денъизге тараф бакъкъаны ичюн, падиша денъизнинъ ортасында козь къамаштыргъан сарайны коре. Алтын сарайны падишанынъ сарайынен кумюштен япылған дюльбер бир копюр багълай. Падиша бойле шейни ич бир ерде корьмеген, атта масалларда биле эшитмеген экен. Бундан соң о, Мустафагъа озь къызыны бермеге разы ола. Той къыркъ кунь, къыркъ гедже девам



эте. Тойдан соңъ Мустафа, къартанай, падишанынъ къызы, мышыкъ, копек — эписи алтын сарайда узакъ бир омюр кечирелер.



1. Масалны дикъкъатнен, окъунъыз.
2. Мустафа эвге насыл айванларны алып кельди?
3. Йыланннынъ бабасындан Мустафа не сорай?
4. Эвленимек ичюн, Мустафа падишанынъ насыл шартыны беджермек керек эди?
5. Масалнынъ эсас фикрини бельгиленъиз. Мераметли инсанлар озъ мурадына етлерми? Масалнынъ мундери-джесини икяе этинъиз.



9-ындыхы дерс

ЧИНГЕНЕ ВЕ БУЛУТ (дженюп чингенелерининъ масалы)

Къарт бир чингене джарты могедегине къара айгъырыны екип, алем бою кезер эди. Кезе ве, ёл бою озъ тюркюлерини динълеп, къушлар учувыны, махлюкълар чапувыны козетип, ошлана эди. Инсанлар исе, ишини токътатып, чингенени, онынъ могедегини козете эдилер. Не хош тюркюлер йырлай эди бу къарт чингене...

Озенлер боюнда
Чечеклер ачарса,
Такъарым оларны
Айгъырым ялына.

Къысметим ель киби
Ёлумдан къачарса,
Ким янар, ким янар
Меним бу алыма?



Чингененинъ кеманеси исе, зиль тутаракъ, де агълай,
де куле эди...

Бу тюркюни узакъта, кокте ялдагъан къара булут
эшитип къалды. О, озы вуджудыны могедекке якъынджа
сюрьди ве, тюркюге мефтион олып, могедек пешинден
яваш-яваш ялдап барды...

Азмы, чокъмы ёл юръген сонъ, къарт чингене ешиль
аланлыкъта токътады ве, чадыр къойып, озюне аш
азырлап башлады. Аш азырлар экен, атеш башына оту-
рып, гъамлы сес иле эфкярлы бир тюркю йырлады:

Коръмедин мен баҳт
Шу омюр ёлунда.
Эп къачты баҳт къушу
Сабырсыз къолумдан...

Булут, бу гъамлы тюркюни динълер экен, агълап ийберди: аланлықъқа агъыр-агъыр ягъмур тамчылары тюше башлады...

Ёлларның боз тозу
Къаплады урбамны.
Не ерде тапарым
Догъдыгъым къобаны?

Булут даа зияде агълады: оның козьяшлары, ташкын озенлер киби, акъты. Чингененинъ атеши сёнди, къарт чадыр ичине сакъланды. Чадырның ичи исе — къуп-къуру, джыллы. Бунъа къувангъан къарт чингене шенъ, мердане тюркю йырлап башлады:

Ягъмур ягъса, бир шей дегиль,
Ёлның тозун ёкъ этер.
Табиатның гузеллигин,
Саф гуллерни чокъ этер!
Эй!

Бу шенъ тюркюни эшитип, ягъмур бирден токътады, булутның къара череси четинде исе кулюмсиреп кунеш пейда олды. О, озың сыйджакъ нурларыны аланлықъқа, могедекке, чадыргъа догърутты. Бутюн этраф ярыкълашты...

Иште, ойле. Ким де-ким гъамлы дақъкъасында биле шенъ тюркюлер йырласа, гъам-кедерге бойсунмаса, кунеш онъа озюнинъ сыйджакъ, назлы тебессюмини эльбет де багъышлар!

Йырла, йырла, кеманечик!
Не гузельдир яшамакъ!
Не гузельдир эр сабаны
Тюркю иле башламакъ!



могедек — ат араба
джарты — эски, йыртылған
гъамлы — къасеветли
джыллы — сыджақъ




1. Масалның мундериджесини икяе этинъиз.
2. Масалның сонъунда айтылған сөзлернинъ манасыны аңълатынъыз.
3. **Чингене** — бу ад, лагъап, сойады, я да, миллетми?
4. Ашагъыдаки метинге эсасланып, масалның мундериджеси боюнда суаллер тизинъиз.

Метинге къоюлгъан суаллер

Окъугъанда, окъуыйдзы языдженен лакъырды эткен киби, субетлешкен киби ола. Бириси икяе эте, экиндjisи исе, яхшы аңъламакъ ичюн, суаллер бере, разы ола я да итираз эте. Муэллифнен берабер наразылықъ бильдире, къувана, къайгъыра, шенълене я да мугъая, къасеветлене. Окъугъан вакъытта түрлю суаллер пейда ола. Меселя: эсерде тасвирленген вакъия не вакъыт олып кече, эсас къараман кимdir, о, не япты (не япа, не япаджакъ), сонъунда не олды, вакъия ненен битти?

Окъугъан вакъытта аңлашылмагъан сөзлер я да ибарелернинъ манасы акъкъында озъ-озюнъден сорамакъ керек. Суаллеринъиз **Не вакъыт? Не ичюн?** киби сөзлернен башланып, тасвирленген арекет, вакъианың манасы, эсас фикринен багълы олмалы.

Сонъ тюшюнип бакъмакъ керек: я сенинъ омрюнъде бунъа ошагъан аллар олмадымы? Не ичюн бу меселе сени зеджанландыра ве муим корюне?



МЕН ДЕ БУНЫ ТЮШЮНЕ ЭДИМ (лятифе)

Яйла этегинде озенбашлы бир байнынъ бостанында къавун-къарпзыларнынъ тамам пишken вакъты экен. Бай, юксек терек устюнде чалаш къурып, анда ята, озын байлыштынды къаравуллай экен.

Озенбашлы Ахмет ахай саран байгъа акъыл къоймакъ истей. Яры геджеде бостангъа дала, чувалына къавун-къарпзы толдурып башлай. Лякин не къадар мукъайтлыкъынен арекет этсе де, теректе юкълагъан бай уяна. О, деръал ашагъы тюшип, фенерини якъа. Бакъса не корьсин, бир адам ерде ята ве къарпзы орькенини титкилей. Янында исе толдурылгъан буюк бир чувал тура. Бай Ахмет ахайнинъ якъасына япыша:

— Сен не ичюн меним бостаным даалдынъ?



— Бильмейим. Мен яилада эдим. Дешетли бир боран къопты. Шу боран, мени айдаштырып, дөгъру сенинъ бостанынъа учурлып кетирди.

— Айтайыкъ, керчектен къуветли боран олды, сен керчектен де яилада эдинъ, о, сени керчектен де котерип алып, меним бостаныма учурлып кетирди. Лякин не ичюн ерде ятасынъ, меним къавун-къарпызларым исе, сенинъ чувалынъа насыл этип толуштылар?

Ахмет ахай:

— Мен де шимди буны тюшюнип ята эдим. Коресинъми, тюшюнджелеримнинъ агъырлыгъы мени тап ерге серилттилер, — дей.



титкилей — узеджек олып, орьселей
акъыл къоймакъ — бир шейни анълатмакъ,
акъыллатмакъ



1. Лятифени къысымларгъа болюнъиз.
2. Метиннинъ эсас фикир бильдирген къысмына серлева къюнъыз.
3. Сиз насыл тюшюнесинъиз, Ахмет ахай байгъа акъыл къойдымы?
4. Байларнынъ къызгъанчлыгъы акъкъында окъугъан, бильген эсерлернинъ серлеваларыны хатырланъыз.

ЧИРКИЙ ВЕ АРСЛАН

Чиркий учып кельди ве арслангъа шойле деди: «Сени — пек къуветли деп айтапар. Сен тишлеринънен кемире, панджаларынънен тырнай экенсинъ. Бунынъ керчек олғыданыны анъламакъ ичюн, сенинънен курешмек истейим. Къоркъмасанъ, чыкъ къаршыма!»

Арслан, тишлерини сыкъып ве чырайыны сыйып, озъ


къараманлыгъыны чиркийге бильдирмек истеди. Чиркий, вызылдап, арсланнынъ чыплакъ бетини, бурнуны тишлемеге башлады. Арслан, ачувланып, озъ бетини панджаламагъа ве тырнамагъа башлады, бетининъ териси сыйдырылып, къангъа боянды. Арсланнынъ такъаты битип, ерге йыкъылды.



1. Масалда къач шахыс иштирак эте?
2. Масалдаки «куреште» ким енъди?
3. Бу масалда не акъкъында фикир юрсетиле?
4. Куреште дайма тек кучълю енъеми?
5. Омюрде бойле аллар ола билеми?



1. Халкъ агъыз яратыджылыгъы насыл эсерлерден ибарет?
2. Халкъ агъыз яратыджылыгъы эсерлерининъ муэллифлери беллими?
3. Инсан сабийлик чагъында насыл эсерни ильк сефер эшите?
4. Бала шиирлерinden къайсы бирини эзберден билесинъиз?
5. Тезайтымлар тапмаджалардан насыл фаркълана?
6. Халкъ яраткъан эсерлерде насыл мусбет ве менфий чизгилер акс олуна.
7. Эзберден бильген, бир къач аталар сёзю ве тезайтым айтынъыз.
8. «Ямангъа баш олгъандже, яхшыгъа ёлдаш ол», — деген аталар сёзюнинъ манасыны насыл анълайсынъыз?
9. Не ичюн халкъ агъыз яратыджылыгъынынъ эсерлерини бильмек керекмиз?
10. Насыл эсерге масал деймиз?
11. Берильген сатырлар къайсы масалдан алынгъан?
Ёлларнынъ боз тозу
Къаплады урбамны.
12. Энъ бегенген масалынъызынъ мундериджесини икяе этинъиз. Бу масал бизни неге огрете?



КЪЫРЫМТАТАР ЯЗЫДЖЫЛАРЫНЫНЪ БАЛАЛАРГЪА БАХШЫШЛАРЫ



Ашыкъ Умер



Умер Игчи



Абидулла Одабаш



Асан Чергеев



Джемиль Кендже



Юсуф Болат



Эшреф Шемьи-заде

СЫРЛЫ ЯЗ ВЕ АЛТЫН КУЗЬ



11-инджи дерс

ЯЗ

Нур тёкмесем, /къар иримез,/
Бол сувларнен ерлер тоймаз//
Чечек ачмаз, /мейва пишmez,/
Атта бузлар къыбырдамаз//

Мен олмасам, олмаз бир иш,
Аят менсиз нефес алмаз.
Къандырмаса мени кунеш,
Мевсимлер де текмиль олмаз.

Зейтулла Албатлы

КУЗЬ

— Толып ташқан мейваларнен
Халкъ огүнде ачыкъ юзюм,
Алтын ренкли айваларнен
Къышкъа кирген алтын кузюм.
Мен осытюрген алмаларым,
Шербет топлап, гулленмекте.
Чечек ачкъан тарлаларым,
Нимет олып, пишип ете.

Зейтулла Албатлы



1. «Яз» ширинде язының насыл аляметлери тарифлене?

2. Яз мевсими къач айдан ибарет? Айларның адларыны айтыңыз.

3. Кузъ мевсимининъ левхасыны япмакъ ичюн, эсас оларакъ, бояларның къайсы тюслери келишир?



Алтын ренкли, алтын кузъ ибарелери нени ифаделейлер?

Шиир акъкъында

Шиир — уфакъ бедий эсер. Бу эсерде джумлелернинъ соňки сёзлери бири-бирине аэнкдеш ола, къафиелеше Меселя: «Яз» ширирининъ биринджи дёртлюгинде соňки сёзлер бойле къафиелеше: *иремез — пишмез, тоймаз — къыбырдамаз.*

Шиирлерде түрлю дуйгъулар, фикирлер беян этиле я да табиат левхалары тарифлене.

Базы шиирлер инсан я да халкъынинъ омрюнде олып кечкен адисе, вакъиаларгъа багъышлана.



Сиз яз ве кузъ акъкъында шиирлер окъудынъыз.

1. Зейтулла Албатлының шиирлеринде насыл сёзлер къафиелешип кельген?

2. Бу шиирлерде мевсимлер насыл тасвирлене?

3. Шиирни ифадели окъумагъа азырланынъыз: шиирнинъ мундериджесини акс эткен сёзлерни сечип, юксек сеснен теляффуз этинъыз; («Яз» ширинде бу сёзлер къайд этильген) токътав ишаретлерinden эвель ве джумленинъ соňунда токътавлар (пауза) япмагъа унутманызыз. Шиирде токътавлар бойле бельгилернен косьтериле:

I — къыскъа токътав,

II — девамлы токътав.

КУНЕШЧИК



«Чюв-чюв!» — эти чипчечик,
— Бакъынъ, — дей, — мен — кунешчик!
Чокъучым, къанатларым,
Шавле киби, сап-сары.

Мен севем йырламагъа,
Кунешнен ойнамагъа,
Саба чыкъсам кезмеге,
Селям берем эр кеске.

Кунеш мени сыйпалай,
Нурларынен пиязлай.
Анам исе къувана:
«Кунешчиғим!» — дей манъа.

Юнус Къандым



1. Ширини ифадели окъунъыз. Къыскъа ве девамлы токътавларгъа риает этинъиз.
2. Кунешчик — ким экен?
3. Ширини эзберленъиз.



Маналары бир олгъан сёзлерни тапып, дефтерлеринъизге язынъыз.

Шавле — нур, юрек — ..., ренк — ..., балабан — ..., акъ — ..., темиз —



Метин. Икяе метини

Метинде бир де бир вакъиа я да эшъя ақъқында икяе этиле, тарифлене я да фикир юрютиле. Ифаделеген манасына коре метинлер **икяе, тариф, фикир юрютюв** чешитлерине болюне. Икяе метинине **не олды?** суалини къоймакъ мумкүн. Тариф метининде **насыл?,** фикир юрютюв метининде исе **не ичюн?** суаллерине джевап бериле.

Икяе метининде бир я да бир къач вакъиа ақъқында икяе этиле. Бойле метин учь къысымдан ibaret ола:

- 1) вакъианынъ башы;
- 2) онынъ инкишафы;
- 3) вакъианынъ соңы.

СЕЛЬБИ ВЕ ШЕФТАЛИ ТЕРЕГИ

Кеңъ багъчанынъ бир четинде Сельби терегинен Шефтали ян-янаша осе экен. Махсулы чокъ олгъанындан, Шефталининъ пытакълары ерге асылып къалған. Сельби исе белини әгмеген, тим-тик турып, магъур-магъур осымекте экен.

Бир кунь Сельби, Шефталини мыскъыллап, шойле деген:

— Эй, Шефтали дост, бир вакъытлар ерден берабер осип чыкъкъан эдик, шимди исе пытакъларынъ эгилип къалған, япракъларынъ солған, чиркинлешкенсінъ. Манъа бакъчы, насыл дюльберим, мен насыл тез осем.



Бу сёзлерни эшиткен Шефтали шойле джевапта булунгъан:

— Эгилип, чиркинлешип къалгъаным — меним къусурым дегиль. Эгильсем, махсулым адамларны тойдурға, оларны севиндири. Санъа ошап, файдасызы осъкендже, чиркинлешип осъкеним, лякин файда кетиргеним яхшы.

Юсуф Болат



махсул — берекет
магърур — гъурурлы, киббар



1. Метинни ифадели окъунъыз.
2. Не себептен шефталиниң пытакълары ерге асылып къалгъан?
3. Не ичюн сельби шефталини мыскъыллай?
4. Сельби шефталиге насыл суаль бере?
5. Шефтали насыл джевап бере?
6. Фикринъиздже, олардан ким акълы?



Мундериджесине эсасланып, метиннинъ чешитини бельгиленъиз (икяе, тариф, фикир юрютюв).



13-юнджи дерс

КЪАРТЛАР (къыскъарттылып берильген)

I

Иште, бостан. Оръкенлер, ягъмурдан ем-ешиль олып, тазергенлер. Япракълар ве къарпызылар устюнде буллюр тамчылар парылдай. Къайдадыр къушлар чивильдешелер.

Бостанджы Сеттар къарт омузына авджы тюфегини аскъан. Машина давушины эшитип, башыны котерди. Мен, онъа якъынлашып, машинаны токъттатым ве, кабинаның къапусыны ачып, сеслендим:

— Сеттар агъа, санъа селям кетирдим, — деп, элимдеки къарпызыны косътердим.

Къарт яваш адымларнен машинагъа якъынлашты. О, томалакъ, тири ве чал сакъаллы бир къарттыр. Онынъ козълери мыскъылджы ве айнеджилер. Устюне чонтукъ

тон кийген, белини кырмызы күшакънен багълагъан. Оны Сеитджемиль къартнен тенъештиргенде, Сеттар къарт — алчакъча бойлу.

О, элимдеки къарпызгъа ве манъа маналы-маналы бакъып:

— Хош кельдинь! — деди.

— Сагъ олунъыз, Сеттар агъа. Мына, сизге селям кетирдим, — деп, онъа къарпызын узаттым.

— Я бу да насыл селямдыр?

— Сеитджемиль акъай ёллады.

Къарт элимдеки къарпызын алды. Оны авучы ичинде саллап бакъты.

— Сеитджемиль акъай: «Сеттар акъайгъа айт, былтыр кой маҳсуллары сергисинде олгъан лакъырдымызын унутмагъанмы?» — деди.

Къарт козьлерини къысты. Онынъ бираз джиддийлешкен бети яваштан язылды, уфакъ козьчикleri күлюмсирелир.

— Унутмагъанмы, деп, сораймы? — къарт тюфегининъ къайышындан узанып тутты ве оны къолайлыкънен омузына асты. — Айды, чалашкъа кирип, бирер сигар якъайыкъ. Менде темиз къаве де бар, пишириим.

Мен онъа кечиккенимни, ягъмурдан себеп, Сеитджемиль къартта геджелегенимни айттым.

— Озюнъ билирсинъ, — деди о.

Мен машинамны кочюрмеге азырландым.

— Сагълыкънен къалынъыз, Сеттар агъа!

— Умер, сен о якъкъа даа бараджакъсынъмы?



О, башынен элеватор тарафыны косътерди.

— Эльбет, бараджагъым.

Къарт, элиндеки къарпызгъа бакъып, тюшюнджеge далды. Соңъ, айнеджи козълерини манъа тикип, кулюмсиреп:

— Эринме де, къайткъанда, бираз токъта, яхшымы? — деди.

— Яхшы, Сеттар агъя.



чонтукъ тон — къыскъа тон
tüшюнджеge далды — тюшюнип къалды



1. Сеитджемиль къарт Сеттар къарткъа насыл «селям» ёллады?
2. Сеттар къартнынъ къыяфети акъкъында не айта билесинъиз?
3. Метинни, шахысларгъа болип, ифадели окъунъыз.



Ашагъыда берильген ибарелер ифаделеген маналарны изаланъыз: *селям кетирдим* — *къарпыз кетирди*; *селям ёллады* — *мектюп ёллады*; *tüшюнджеge далды* — *сувгъа далды*.



14-юнджи дерс

II

Мен, къартнен сагълықлашып, машинаны кочюрдим. Бостандан бираз узакълашкъан соңъ, кабинанынъ пенджересинден узанып бакътым. Сеттар акъай аля даа эвельки еринде тура ве авучындаки къарпызыны саллаштыра эди.

Сеттар агъанен корюшкенимизниң әкинджи куню,

үйледен сонъ, бөгъдай юклю машинамны ёлда, тоз къопарып, айдаштырдым.

Мына — Танъ кою. Ёл онынъ янындан кече. Кой четиндеки тобан кебенлери тюбюнде бир оба тавукълар, тобан эшип, чёплениелер.

Къаршыма эки яш чыкъты. Олар аякъмашнанен кетмекте эдилер. Олардан бири, озюнинъ къара быджагъыны чыкъарып, омузларына ташлагъан. Мен оны таныйым. О, Сеттар къартнынъ торуны Джеппардыр. О, элини котерип:

— Умер! — деп багъырды.

Машинаны токъттаттым. Эль тутуштыкъ.

— Къайдан келесинъ я? Къартбабамнынъ бостанына бардым. Тюневинден берли сени беклей. Ёлдан кечкен эр бир машинаны токътатып, сени сорай.

— Къартбабанънынъ манъа не иши бар бильмем, бостан янындан кечкенде, токътатырсынъ, деген эди.

— Сеитджемиль къарткъа къарпыз йибереджек ола, — деди Джеппар. — Олар былтыр, кой хозяйствосы сергисинде корюшкенде, озыра куньлешов багълагъанлар.

... Иште, Сеттар къарт, меним кельгенимни узакътан корип, элини манълайы устюне къойып бакъа. Мен машинамны къыр устюнде токъттаттым. Къарт чалашкъа кирип чыкъты. Онынъ къучагъында меним эки кунь эвельси онъа кетиргенимден бираз буюкче бир къарпыз бар. О, адымларыны сыкълаштырып, машина янына кельди.



— Умер, сен буны Сеитджемиль къарткъа бер де, менден онъа селям айт. Я озюнъ къарпзы ашамайсынъмы?

Сеттар къарт, бостан ичинден чубар бир къарпзы алып, манъа узатты.

— Бу да — санъа!

Къарт козълерини сыкъ-сыкъ къымып, мени озгъарды:

— Огъурлы ёллар олсун, селям айт!



тобан эшип — тобан къарыштырып
куньлешюв багълагъанлар — ярышлашаджакъ
олгъанлар



1. Икяе кимниң адындан айтыла?
2. Не себептен Сеттар къарт Сеитджемиль къарткъа къарпзы ёллай?
3. Метин парчасыны, роллерге болип, ифадели окъунъыз.



1. Якъын маналы сөзлерни тапып язынъыз:

эль — ...,	батыр — ...,
тараф — ...,	кичик — ...
йыр — ...,	
2. Тоз къопарып, айдаштырдым; эль тутуштыкъ — ибарелерининъ манасыны анълатынъыз.
3. Метинде башкъа тиллерден алынма сөзлерни бельгиленъиз.



15-инджи дерс

III

Къартларның куньлешюви он эки кунь девам этти. Мен бу он эки кунь ичинде бир бостандан экиндjisine оларның селямынен ёллагъан къарпзыларны ташыдым. Бу къарпзылар эр бир

кересинде бири-биринден балабан эдилер.

Мен Сеттар къартның берген къарпзыны Сеитджемиль къарткъа берсем, о, озюнинь соравлы козълеринен къарпзыгъа бакъа-бакъа да, тик башыны саллап куле. Сеитджемиль къартның ёллагъаныны Сеттар къарткъа берсем, о, къарпзыны элинде саллаштыра, озюнинь мыскъылджы, кулькүнч ве айнеджи козълеринен мыйыкъ астындан кулип, бостанына козь ташлай.

Олардан экиси де менден о бири къарпзыны насыл къабул эткенини ве не айткъаныны сорайлар. Мен де, коръгеним ве эшиткеним киби, айтам.

Куньлешювнинь нетиджеси чыкъмаздан бир кунь эвель, мен Сеттар къарткъа Сеитджемиль къартның ёллагъан дөрт дане баш балабанлыгъындаки къарпзыны бердим. О, къарпзыны коръгени киби:

— Кене йибердими? — деп сорады.

Бу кереси онынъ козълери эвельки киби ойле мыскъыллы дегиль эдилер. Олар бираз керильген ве козълерининъ акъларыны да косътерген эдилер. О, къарпзыны элине алып, эпpeiи вакъыт оны шамарлап, тюшюнип турды. Онынъ козълери адettекинден сыкъ къыпылып ачылдылар.

— Умер, кечкенде кене токъта.

Экинди куню саба мен, Сеттар къартның берген къарпзыны Сеитджемиль къарткъа кетирип бердим. О да:

— Кене йибердими? — деп сорады. — Умер, къайткъанда машинанъ бош оладжакъмы?

— Эльбет, бош оладжакъ.

— Мени де алып кетерсинъми?

— Яхшы, алып кетерим, — дедим мен.

Шу куню элеватордан къайткъанда, мен Сеитджемиль къартның бостаны янында токътадым. Къарт, чалаштан меним даа омюримде корымеген балабанлыкъта чубар


бир къарпызыны, зорнен къучагъына алып, машина янына кетирди. Мен, къарпызыны коръгеним киби, бу куньлешювде Сеитджемиль къартнынъ енъгенини анъладым.

Аблаев онъа ярдым этти. Олар экиси, къарпызыны котерип, машинағыа ерлештирди, ве зерреленмесин къарпызынынъ янына чёктилер. Сеитджемиль къарт манъа:

— Джаным къардашым, машинаны пек айдама, — деп, ялварды.

Мен машинамны яваш айдадым. Къарпызгъа бир зарар кельмесин деп, ёлдаки чукъурлардан пек явашлатып, мукъайт олып, кечтим.

Танъ кою корюнди. Бу арада кабинанынъ артындаки пенджеречик къакъылды. Сеитджемиль къарт манъа, токъта дер киби, ишмар этти. Мен машинамны токътаттым ве, пенджереден башымны узатып:



— Не бар я, Сеитджемиль агъа? — деп сорадым.

Къарт, агъызындаки сийрек ве сары тишлерини косътерип, кулип алды.

— Сен, къардашым, машинаны токътаткъанынъ киби, ерге тюшер де Аблаевнен берабер къарпызыны ашагъы алырысынъ. Мен мында гизленеджегим, анъладынъмы?

— Анъладым...

Машина бостангъа кельгенде, энди ёлнынъ эр эки тарафы халкънен толу эди. Мен, мында Тань коюнинъ алай джемааты топлангъандыр, деп зан эттим. Оларгъа беш-он адым къалгъанда, машинаны токътаттым. Халкъ машинанынъ этрафына топланды. Мен шу saat кузовъа атлап миндим. Сеитджемиль къарт кузовнынъ кенар тахтасы тюбюнде гизленип ята ве яваштан:

— Сакът олунъыз! — деп, бизни тенбиелей.

Биз, Аблаевнен берабер къарпызыны котерип, кузовнынъ четине къойдыкъ. Танълылар, къарпызыны корыгенлеринен, шашып къалдылар.

— Ой да балабан къарпыз, эй!

— Ерге алынъыз!.. Мукъайт тутунъыз!..

Яшларнен къызлар, къарпызыны эллерине алып, оны, къоджаман бир шар киби, авада туттылар.

Сеттар къарт кульди. Омузындаки тюфегини тюшюрип, оны Джеппаргъа берди ве къарпызынынъ къаршысына кечип, сакъалыны сыйпады.

— О-о! — деп, тааджипленди о.

Иште, тамам бу вакъыт Сеитджемиль къарт, аякъка котерилип, машинадан ашагъы эгильди. Сеттар къартнынъ башына къадар узанды да:

— Соң, насыл, айтмагъан эдимми мен санъа?! — деп кульди.

Сеттар къарт омузларыны къысты. Къарпызгъа бакъкъаны киби, Сеитджемиль къарткъа да шашып бакъты. Соң кулип, онынъ омузыны таптады.

— Енъдинъ, Сеитджемиль, енъдинъ, — деди.

Олар, де къарпзыгъа, де бири-бирине бакъып, кулюштилер. Шу ерде топлангъан яшлар ве къызлар бу балабан къарпзыны юкъары котерип, чалашкъа алып кеттилер.

Умер Ипчи



зерреленмесин — мында: парчаланмасын



1. Танъ коюнинъ джемааты не ичюн топлангъан?
2. Куньлешовде ким енъип чыкъты?
3. Ким насыл бакъып куле?

Септар къарт: ...

Сеитджемиль къарт: ...

- a) соравлы козълеринен къарпзыгъа бакъа-бакъа...;
- b) озюнинъ мыскъылджы кулькүонч ве айнеджи козълеринен мыйыкъ астындан кулип...



1. Сагъ-селямет, агъа-къардаш, дост-эш киби чифт сёзлернен джумлелер тизинъиз.
2. Метинде башкъа тильден кирген сёзлер бармы?
3. Икяеде расткельген незакетли сёзлерни сечип, окъунъыз. Маналарыны анълатынъыз.



КОБЕЛЕК

Къора бою кеткенде,
Коръдим сырлы кобелек.
Узандым, къол етмеди,
Чунки юксек бу терек.

Мен: — Амет, — деп къычырдым. —
Ярдым эт, — деп чагъырдым. —
Кобелекни тутайыкъ,
Юва ясап къапайыкъ.

Амет манъа дарылды,
Тап чырайы түрленди.
— Ёкъса санъа кобелек
Тийдими? — деп сёйленди. —

Бааръде къурт чыкъарыр,
Дут япрагъы кемирир.
Сонъра кирип къозакъқъа
Йипек ясап, джан берир.

Черкез-Али



1. Шиирни эзберленъиз.
2. Соңлары аэнкдеш олған сёзлерни бельгиленъиз.
3. Шиирни, шахысларға болип, окъунъыз.
4. Сиз насыл тюшюнесинъиз, кобелек къапавлы ювада яшап олурмы?
5. Бу шиир иштиракчилерinden къайсы бири али-дженаплыкъ косытерди?
6. Табиатны не ичюн къорумакъ керек? Джевабынъызын исбатланъыз.

КОБЕЛЕКЛЕР



Бир орман ичинде дёрт кобелек яшай эди. Оларның бири—беяз, экиндjisи—сары, учюнджиси—къырмызы, дертуңджиси де къара эди.

Бир кере бу кобелеклер ойнамағыа чыкътылар. Баягъы вакъыт ойнап учкъан соң, башларының тёпесинде къап-къара, балабан бир күш корьдилер. Кобелеклер къоркътылар. Беяз кобелек шу дақъқа беяз пападие устюне къонды, къыбырдамайып отурды. Сары кобелек, озюне коре, сары бир чечек тапып, оның устюне учып къонды. Къара кобелек шу дақъқасы чам агъачы къабугъының устюне учып къонды. Къырмызы кобелек къып-къырмызы къаранфиль устюне келип къонды. Къаршыдан бакъкъанда, эписи кобелеклер асыл да танылмай эди. Бойле этип, бу дёрт кобелек душман агъызындан къуртулып къалдылар.

И. Къая



1. Метиннинъ мундериджеси боюнчада суаллер тизинъиз.
2. Яз чечеклерининъ даа насыл адларыны айта билесинъиз?
3. ... душман агъызындан къуртулып къалдылар. Муэллиф кимнинъ агъызындан кобелеклерниң къуртулгъаныны тарифлей?



1. Метинден чечеклерниң адларыны бильдирген сөзлөрни сечип, бир сатыргъа, ренклерини исе, экиндже сатыргъа язынъыз.

2. Чам агъачының къабугъы — даа нелерниң къабугъы ола билир? (сөгъан, къартоп, ..., ...)



17-нджи дерс

ТУРНАЛАР КОЧЕЛЕР

Бакъынъыз, балалар!
Турналар кочелер,
Тизильген сыралар
Аскердай кетелер.
Бириси — алдында,
Къалгъаны — артында,
Турмайып кетелер,
Денъизге етeler.
Денъизлер ашып,
Къарада токътай,
Болдургъан вуджудын
Къарада раатлай.
Бакъынъыз, балалар,
Балабан турналар
Узакъта не къадар
Уфачыкъ туралар.
Турналар, турналар!
Сырлы козь турналар!
Булаттан сув ичен
Севимли турналар!
Айтынъыз, турналар,
Ёлунъыз къаякъкъа?
Къайтынъыз, турналар,
Бу аякъкъа,бу якъкъа!

Авалар бу якъта
Пек яман сувукъта,
Алай къуш тайланды,
Къыблагъа айланды.

Джемиль Кендже



тайланды — топланды
къыбла — дженюп тарафы



1. Шиирни ифадели окъуп, эзберленъиз.
2. Турналар сыранен тизилип къайда учып кетелер?
3. Сыджакъ мемлекетлерге даа насыл къушлар учып кетелер?
4. Олар не вакъыт кери къайтып келелер?



1. *Кочелер* сёзюнинъ манасыны анълатынъыз, онъа манаджа келишкен сёзни шиирден тапып айтынъыз.
2. Шиир метининдөн маналары къаршы олгъан сёзлериңи сечип дефтеринъызге язынъыз. Оларнен джумлелер тизинъыз.



18-инджи дерс

Тариф метини

Тариф метининде бир де бир предметниң алямети тарифлене. Бойле метинлер эки къысымдан тизиле:

- а) предмет акъкъында умумий малюмат берильген къысым;
 - б) предметниң алямети, беджерген вазифеси тарифленген ве онъа къыймет кесильген къысым.
- Тариф метинине **насыл?** суали къюла.

* * *

Балықъларның не аягъы, не де къанаты бар. Олар ялдавучлар ярдымынен арекет этелер.

Айванлар юрелер, къушлар учалар, балықълар исе ялдайлар. Балықъларның вуджуды узун ве тардыр, пулларнен къаплыдыр. Сувукъта балықълар сув тюбюне энелер ве, анда сазлыкъкъа комюлип, юкълайлар.

Баарьде балықълар юкъудан уяналар. Олар, сюрю-сюрю топлашып, хавъяр ташлайлар. Бу хавъярчыкълардан балычыкълар пейда ола. Бу балычыкълар, бирин-джи кунюнден башлап, озюне керек гъыданы озылери тапалар.

Сыджакъ куньлери балычыкълар сув устюне якъынлашмакъны севелер. Олар сув устюнде учып юръген чибин ве боджеклерни авлайлар.


Юсуф Болат



1. Балықъларның насыл аляметлеринен таныш олдынъыз?
2. Оларға ялдамагъа не ярдым этे?
3. Балықълар не вакъыт ве не ичүн терен сазлыкъкъа комюлелер?
4. Йылның къайсы месиминде балықълар чокълашалар?



1. Метинге серлева къоюнъыз.
2. Метиннинъ чешитини бельгиленъиз.
3. Метиннинъ планыны тизип, дефтерге язынъыз.





Фикир юрюютүв метини

Фикир юрюютүв метининде бир шей ақъкъында фикир юрьсетиле, бир де бир адисе, меселе айдынлатыла. Бойле метинлер тасдыкълав, исбат ве нетиджелевден ибарет ола.

Фикир юрюютүв метининде бир сыра сөз ве сөз бирикмелери ишлетиле:

а) анълатув — **чюнки..., эгер..., билесизми..., меселе шунда ки...**

б) нетиджелев — **онынъ ичюн, демек..., бундан ... демек хуляса чыкъа, мына бунынъ ичюн... , бойлеликнен... .**

Фикир юрюютүв метинине **не ичюн?** суали къюла.

Къырымнынъ дженюбинде, деньиз кенарында отлар ве тереклернен къаплы балабан бир дагъ бар. Бу — Аюв-дагъ.

Бу дагъ керчектен де балабан бир аювгъа бенъзей. Партениттен Аюв-дагъга дөгъру кеткенде, Аювнынъ башы, аркъасы эм де аякълары бар киби корюне. Башы ве аякълары чыплакъ къаядан, семиз къабургъалары ве аркъасы тюкнен ортюли киби сыйкъ тереклик ве чалылыкънен къаплы.

Аюв къурсагъы устюне яткъан, онынъ аякълары огге узангъанлар, башы исе ашагъы, сувгъа эгилип тура.

Аюв, деньиз кенарында сув ичмек ичюн яткъанда, таш олып къатып къалгъан деп, тюшюнмек мумкүн. Онынъ янында, онъа токъунып, аюв балачыгъы яткъан киби тура. Инсанлар Аюв-дагъ башта джанлы аюв олгъанына ве соң дагъгъа чевирильгенине инана эдилер.



1. Метинни дикъкъатнен окъунъыз. Метинге серлева къоюнъыз.
2. Метиннинъ эсас фикрини тапып, чешитини бельгиленъиз.
3. Не ичюн бу дагъгъа Аюв-дагъ адыны къойгъанлар?
4. Аюв-дагъ акъкъында даа насыл эсерлер, шиирлер билесинъиз?
5. Къырымнынъ даа насыл дагъларыны билесинъиз?



20-нdжи дерс

ДЕНЬИЗДЕ ГЕМИ ЯЛДАЙ

Сервернен Улькер кене давалаштылар. Оларнынъ шаматасыны эшитип, одагъа аналары ашыкъып кирди. Котерильген тозгъа бакъып, къашларыны чатты, вайвай, дер киби, башыны саллады.

— Аджеба, ер юзүнде тап бу къадар баштакъ балалар даа бармы экен?! — деп окюнди. Сервер Улькернен асла да ойнамакъ истемей. Улькер ондан эки яш кичкене олса да, ара таптымы, онъа илише: «Геми яп, денъиз яп», деп, зорлай. Бойле ресим оларнынъ диваны устюнде диварда асувлы. О ресимдеки геми де, денъиз де, гуя акъикъий. Шимди мавы сув далгъаланып, къаверенкли чатыдан ташып чыкъаджакъ киби келе. Бу — бабасынынъ ресми. Бабасы оны пек севе.

Сервер исе — ресим устасы. Балалар багъчасында оғренди. Онынъ буюк альбомы ве бир къуту ренкли къарандашы бар. Къардашыны оларгъа якъын кетирмей, ресимни тек озю япа. Эгер Улькер янъылып бу шейлерге эль тийсетсе, Сервер анасынынъ одадан чыкъмасыны беклей де, соң, онынъ къулагъындан тутып, соза. Бойле алларда Улькер де джевапсыз къалмай: агъасынынъ къарандашларыны джайрата, альбомыны сакълай.

Сервер, альбомыны къыдырып тапалмагъан соң, аз къала агъламагъа. Улькер исе бундан зевкълана. Тойгъандже кульген соң, альбомның сакълангъан ерини косьтере. Бундан соң, эльбет, кене байгъуш къулакълар эсал кеселер.

Улькер агъасыны даа зияде ачувландырмакъны тюшюне.

Сабаның саары вакътында башта Улькер уяна ве энъкъастан йырламагъа башлай. Сервер исе, юкъу байгъынлыгъында. Турып оның къулагъыны созаджакъ амма, юкъусыны бозамай.



1. Сервернен Улькер не ичюн давалашалар? Анасы не себептен окелене?
2. Бу эки агъа-къардаш арасында мұнасебетлер насыл? Сизинъ къорантанызыда бойле давалы аллар оламы?
3. Якъын кетирмей, къулакълар эсал кеселер, юкъу байгъынлыгъында ибарелерниң манасыны анълатынызы.



Сары, къырмызы ... тюс бильдирген сёзлерниң сырасыны девам этинъиз.



21-инджи дерс

II

Мына бугунь Серверниң юкъусыны ич кимсе бозмады. Пенджереден кунеш кулип бакъты, эвниң ичи исинди. Улькер исе йырламай, аксине, агъламсырап ята. Сервер, истер-истемез башыны котерип, кадясына бакъты. Акъикъатен къардашы козь-яш тёкип агълай. Сагъ янагъы къызаргъан ве къатмерлешкендай къабаргъан.

— Анай, анай! — деп къычырды Сервер, теляшнен.



— Улькерни балкъурт тишлеген!..

Ачылгъан къапудан ана чапып кирди.

— Огълум, Сервер, сен не айтасынъ шу, эв ичинде балкъурт къайдан кельсин?

Ана къолуны Улькерниң башына къойды... шашмалагъандай олды.

— Сервер, огълум, сен янаша одагъа чыкъ... — деди
о. — Къардашынъ хасталангъан.

Мен экимни чагъырып келейим.

Бираздан акъ халатлы бир къадын кельди. Улькер яткъан одагъа Серверни кирсетмелир. О, къапу артында къалды. Къулагъыны къапугъа таяп, экимниң айткъанларыны эшитеджек олды. Эшиталмады. Эким кеткен сонъ, анасы Серверге:

— Огълум, бугунь эвде къал, балалар бағчасына кетме, — деди.

Энди не япмалы? Оюнджакълардан безди, япмагъа башкъа бир иш де ёкъ.

Сервер альбомыны чыкъарды, къарандашларыны стол устюне тизип къойды, бир къач сание тюшюнип

отурды ве ... ресим япмагъа башлады. Башыны азбучукъ янтайтып, дикъкъатнен деньиз ресимини сызды ве боялады. Мавы къарандашнен деньиз далгъаларыны япты, беяз къарандаш бу далгъалар устюндеки акъ гемичикке керек олды. Ачыкъ кокте къушлар авелене.

Сервер ресимни элине алып, баягъы вакъыт онъа бакъып къалды. Дерсинъ деньизде геми ялдай! Соң еринден турды, яваштан къапугъа кельди, ичери кирди. Улькер сакинден хурулдап юкъламакъта эди. О, энди бираз тюзельген олса керек. Сервер пармакъ уджларына басып, кроваткъа якъынлашты, альбомнынъ деньиз ве геми ресими япылгъан саифесини ачып, оны кадясынынъ баш ястыгъы янына къойды. Недир ойланып алды. Соң... къарандашларыны да шу ерге ташлады.

Сервернен анасы чай ичелер. Бабасы даа иштен къайтмады. Бирден къомшу одадан Улькернинъ давушы эшитильди:

— Сервер! Бу ресимни манъа яптынъмы?

Сервер чай стаканыны кенаргъа къойып, Улькернинъ янына чапып барды.

— Эльбет де санъа! — деп кулюмсиреди. — Айса кимге олсун? Альбом да, къарандашлар да, санъа. Ал, сенинъ олсунлар.

— Сагъ ол, — деди Улькер ве элини онынъ пармакълары устюне къойды.

Ана босагъадан бакъып тура эди. О, куле-куле:

— Аджеба ер юзүнде тап бу къадар акъыллы ве гузель балалар даа бармы экен? — деди.

Эмиль Амит



1. Улькерге не олды?
2. Сервер къардашыны севгенини насыл ифаделеди?
Бойле бахышыны алгъан Улькер тез тюзелирми?
3. Сиз къардашларынъызгъа ярдым этесинъизми?
4. Метинни роллерге болип, ифадели окъунъыз.



Метинни къысымларгъа болюв. План тизюв

План метинде изалангъан фикирни, изченликнен икяе этмеге ярдым эте. Планны түрлө джумлелерден (икяе, суаль, нида) тизмек мумкун.

Плангъа къоюлгъан талаплар
Планда ашагъыдакилер акс олунмалы:

- а) мевзу;
- б) эсас фикир;
- в) эр бир къысымда икяе этильген фикирлер.

КУЗЬ

Йылнынъ эр бир месими койлюлер ичюн бири-бири артындан япымасы керек олгъан ишлерини хатырлата. Хусусан, кузь айлары ялы боюнда яшларгъа энъ месюлиетли давранмакъны талап эткен вакъыт ола. Джевизлерни къакъмакъ, юзюмлерни джыйып подвалларгъа ташымакъ, согъанлар чыкъарылгъан соң, багъ-багъ орип, кеч пишкен алма, арmut, эрик, юvez, хурма, инджирлерни джыйып, къурутмакъ керек ола. Тамам шу вакъытлары да дагъларда берекет номай ола. Ахлап, аджджы алма, къызылчыкъ, мушмолла, фындыкъ ве дигер дагъ емишлери де пишелер. Демек, вакъыт тапып, орманларгъа чыкъмакъ, о ердеки берекетни де топламакъ керек.

Затен, кузъ айларында орманларның айрыджа дюльберлиги ола, чешит ренкке кирген япракъ тёкюле башлай, тереклер сийрекленген киби ола. Чамлыкъкъа кирсенъ, ель олмагъанда биле, чамлар шувулдап туралар, гуя бири-биринен сырдашалар.

Джевдет Аметов



1. Метинде не акъкъында икяе этиле?
2. Эсас фикирни назаргъа алып, метиннинъ чешитини бельгиленъиз.
3. Мундериджесине эсасланып, метиннинъ планыны тизинъиз.



Метинден **багъча емишлерини** бильдирген сёзлерни бир сырагъа, **дагъ емишлерини** дигер сырагъа язынъыз.



Емишлернинъ ресимлерини япынъыз.



РЕСИМ УЗЕРИНДЕ ИШ





Ресимге дикъкъатнен бакъып, айтынъыз:

1. Мында насыл йыл мевсими тасвирленген?
2. Кузь аляметлери насыл ифаделенген?
3. Ресимде тасвирленген арекет, вакъиаларны тарифленъиз.
4. Сиз яшагъан ерде Дервиза байрамында насыл тедбирлер кечириле?
5. Не ичюн халкъымыз кузъде бойле байрам тешкиль эте экен?




Ресимге ве юкъарыдаки суаллерге эсасланып, Дервиза байрамы акъкъында фикир юрютүв метинини язынъыз.



1. Белли къырымтатар языджыларындан кимлерни билесинъиз?
2. Языджы ве шаир арасындаки фаркъыны айтынъыз.
3. Хатырланъыз. Къайсы эсерде **кунълешюв, селям, къарпыз** сёзлери къулланылгъан.
4. Бу болюкте насыл эсерлерни бегенип окъудынъыз?
5. Окъугъан эсерлернинъ къараманларыны хатырланъыз ве оларнынъ чизгилерини изаланъыз.





АНА ЮРТ



24-юнджи дерс

* * *

Бу зенгин тиль — халкъымызынынъ
Къальп севинчи, фигъаны,
Тюркий тиллер гульзарынынъ
Энъ чечекли фиданы.

Мында бар кузь гузеллиги,
Далгъаларнынъ океси,
Саарь вакъты тазелиги,
Геджелернинъ бу сеси.

Мында асрет аналарнынъ
Беддуасы, дуасы.
Мында Бейбарс, Бораларнынъ
Икътидары, деасы.

Бу тиль, достум, меним, сенинъ,
Халкъымызынынъ анъына,

Юрегине, зеинине,
Дамарына, къанына

Синъген сабий чагъымызда
Анамызының сютюнен,
Айненнининъ татлы, шырын
Эзгисинен, бейтинен.

Эшреф Шемьи-заде



1. Муэллиф насыл тиль акъкъында сөз юрьсете?
2. Шаирниң ана тилинен гъурурлангъан сатырларыны сечип окъунъыз.
3. Шиирни эзберленъиз.



25-инджи дерс

БАГЪЧАСАРАЙ БОЙЛЕ ПЕЙДА ОЛГЪАН (эфсанеден парча)

Бир заманда Менъли Герай ханының оғылу авгъа чыкъа ве Чюрюк-Сув янында бойле вакъиагъа расткеле.

Оның оғынде эки йылан пейда ола ве, бири-бирине сарылып, талашып башлайлар. Оларның куреши баягъы девам эте. Соң бириси джансыз серилип къала. Шу арада чегерлер тюбюндөн даа бир йылан чыкъа. О, енъеген йылангъа атыла ве курешни янъыдан баштай. Талашкъан йыланлар чегерлерге кирелер.

Хан-заде енъильген йыландан козюни алмай тұра, тюшүнджеге дала, бабасыны ве озюни тюшүнне. Олар шимди бу енъильген йылангъа ошай әдилер. Алтын Ордуның ханы Герайны аскерлеринен берабер юксек къаядаки къалеге къачмагъа меджбур этти.

Тюшүнджелерinden айынгъан хан-заде йыланның



къыбырдагъаныны коре. Йылан, яваш сюйрекленип, сувгъа кире, джанлана. Ялыгъа чыкъып, бираз къыбырдамайып ята. Соң бир даа сувгъа далып, озеннинъ дигер тарафына ялдап чыкъа ве чегерлер ичине кирип кете.

Менъли Герайнынъ оғылу, пек къуванып, коръгенлери ни бабасына айта. Олар бу адисени хайыргъа ёрайлар ве шеэрниң адыны Багъчасарай къоялар. Бири-бирине сарылып талашкъан йыланларны исе сарай тамгъасында тасвир этелер.



1. Къырым ханлыгъынынъ пайтахт шеэрини айта билесинъизми?
2. Чюрюк-Сув янындаки вакъия хан-задени не ичюн бойле тесирлендириди?

3. Йыланны не шифалай?
4. Не ичюн талашкъан йыланлар сарай тамгъасында тасвир этильген?

Метинни ағызызатий шекильде икяе этюв

Насыл этип, метинни къыскъартылгъан шекильде икяе этмек мүмкүн?

1. Биринджи джумлени окъу.
2. Метинде эсас фикирни ифаделеген къысымны бельгиле.
3. Эр бир абзацның эсас фикирни къайд эт.
4. Озь икяенъни метиннен къыясла.




26-нұдды дерс

АЮВ-ДАГЪ (эфсанаден парча)

Къадимий девирлерде Къырымның ялыларында джынлар къабилеси яшагъан. Олар дагълы-ташлы ерлерде чалышып-чекишип яшайыш къургъанлар. Оба-тёпе ерлерни тегизлеп, багъ-багъча сачкъанлар. Оларның яшайышы кет-кете эйилешкен, зенгинлешкен.

Лякин бу къабиленинъ ичине хынзыр бир ибليس келе ве джынлар къабилесини озюне дёндюре. Алла джынлар къабилесини джезаламагъа къарап эте. Буның ичюн, шимальден Дев-аювны чагъыра. О, ялыда



расткетиргенини ура, йыкъа, дагъларны дарма-дагъын эте. Таш-къаялар да бу юкниң астында даяналмай, парча-парча олып, гурюльдеп йыкъылалар. Дев-аюв, ахыр соңу, болдура, сувсай ве деңизден сув ичип башлай.

Алла, Дев-аювның сувдан чыкъып, ёлуны девам этмесини, Партенит тюзлюгиндең койлерни йыкъып, халкъыны да гъайып этмесини эмир эткен. Аюв бу эмирге къулакъ асмагъаны ичүн, Алла оны дагъга чевирген. Дев-аюв — Аюв-дагъ олгъан ве эбедий къатып къалгъан.



Метинни къысымларгъа болюнъиз. Оларның мундериджесини икяе этинъиз.

АЙЯ (ривает)

Балықълава ялысында учурумлы бир ер бар. Ярның энъ юксек нокътасына «Айя» дейлер. Онъа, бу ад, не вакъыт берильгени белли олмаса да, бу хусуста шойле бир ривает яшай.

Эвель заманда, Багъчасарайда, Мухаммед адлы залым бир хан яшагъан. Ханның бир талай къадынлары ве йигирми бир яшыны толдургъан екяне оғълу олгъан. Оғълуның ады Ислям экен. Куньлерден бир кунь Ислям сарайның къапусы янында тургъанда, ёл кенарына могедекли бир араба келип токътай. Ислям, арабаның янына бара да, башыны могедек ичине сокъа. Бакъса не корьсин, анда айның он дөртю киби яш ве дюльбер къыз отура экен. Эки генч бири-бирине ашықъ ола.

Исламнен къыз гизли корюшип башлайлар. Ашықъ олгъан Ислам аш-сувдан кесиле. Хансарай азбарлары онъа тарашлықъ эте. Исламның сарайгъа кетирильген къызыгъа севда олгъаны, ханның къулагъына да барып ете. Буны эшиткен хан пек ачувлана, чонки, адамлардан бир де-бири ханның къадынларына козь къыйыгъындан бакъса биле, деръал оның башы кесиле экен. Ислам исе, оның екяне эвляды. О, оғълуны будерттен, къурттармакъ пешине тюше, ве озюниң баш везиринен берабер, бу меселени гизли чезелер... Ислам бабасының къара ниетлерини дуя. О, озюниң садықъ ыргъатларының бирине: «Меним джюйрюк атым даима азыр турсун», — дей. Бойледже арадан бир къач кунь кече. Геджелернинъ биринде сарайдан бири-бирининъ артындан эки могедек чыкъып, куньбаты тарафкъа ёл ала. Могедеклернинъ артындан, къара аткъа минген, Ислам да кете. Танъ атып башлагъанда, арабалар дагъының ичиндеки тар бир ёллукъкъа келип токътайлар. Ислам кенарда токътай ве

атындан тюше. О, яваш-яваш могедеклерге якъынлаша. Эки джеллят козьлери, къоллары багълы къызыны арабадан тюшюре де денъизге тараф алып кетелер. Ислям да оларның артындан тюше. Джеллятлар юксек ярның кенарына барып токътайлар. Олар, ханның ишмарынен, къызыны ярдан ашагы итеп йиберелер. Ислам, бабасының япқын вахшийлигини корип, бузбузлай. О, къызыны дагъда къалдырып кетерлер, деп тюшюне экен. Энди севгилисиз къалгъан, дюньядан умюдини кескен Ислам, даа демин къыз тургъан ерге келе де, бабасына тикилип: «Къыздан насыл бир зарар корьдинъ де, оны ярдан ашагы ташлаттынъ!» — деп къычыра. Хан: «Оны тутынъыз!» — деп багъыргъандже, оғылу, озюни ярдан ашагы ташлай.

Мухаммед хан неге оғырагъаныны анълап, шашмалап къала. О, яр кенарына келе де, денъизге бакъып: «Айя, мен не яптым!» — дей окюнчен.

О вакъиадан соң, бу ярның ады Айя олып къалгъан.



«Айя» риваєтини дикъкъатнен окъуп, мундериджесини озъ сёзлеринъизнен икяе этинъиз.



27-нджи дерс

ВАТАН

Ватандыр бу — дагълар, денъизлер,
Озен, голлер, чокъракълар.
Ватан — бизим кенъ яилалар,
Ешиль чёллер, отлакълар.

Ватандыр бу — сербест отер
Багъ-багъчада бульбуллер.
Халкъ хорланмаз, вира осер
Топ-топ ачар ал гуллер.

Ватансызының алы — мушкюль,
Бенъзи солар, хорланыр.
Ватан олса, олмаз мушкюль,
Тек Ватанчюн зорланыр.

Ватандыр бу — Ана топракъ,
Эдждатларның мекяны.
Ватан ичюн феда олсун
Эр бир татарның джаны.

Энвер Къафадар



1. Шиирни ифадели окъунъыз. Шаир Ватаныны ненен къыяслай?
2. Яшагъан еринъиз акъкъында икяе этинъиз.



Къырымда пек чокъ халкълар яшайлар. Дигер миллет векилине менсюп олгъан достларыныздан оларның байрамлары акъкъында малюмат язып алынъыз.



1. *Ватан — экинджи анань* ибаресининъ манасыны аньлатынъыз.
2. Миллетимиз акъкъында не айта билесинъиз?
Меним халкъым пек чыдамлы, ишкир, ватан къадрине еткен — бир миллеттир. Бу сөзлерни исбатланызыз.
3. Къырым шеэрлерининъ шимдики ве эски адларыны хатырлап, язынъыз. М е с е л я :
Симферополь — Акъмесджит
Белогорск — Къарасувбазар

* * *

Къырымда эр бир койнинъ озы ярашыгъы, текрарланмаз дюльберлиги ве озюне хас аньанелери бардыр. Къырымдаки татар койлерининъ эписини бильсем, оларнынъ гузелликleri акъкъында бир нефес баас этсем!

Озюм дюньянынъ бир четинде, ябаний юртта булунам, амма акъылым-фикрим дюньянынъ меркезиндеки Айсерез коюндедир. Дюнья меним ичюн Айсерезден башлана ве кене Айсерезде бите. Бу койнинъ ады акълымдан кечкенде, ичим нургъа тола, джошам.

Фейзи Юртэр



1. Муэллиф ичюн Айсерез кою не ичюн бойле къыйметли экен?
2. Сизлер ичюн бойле азиз, къыйметли ер, кой, шеэр бармы? Икяе этинъиз.



28-инджи дерс

БАЙРАМ АЙЫ

— Буюкана, буюкана, ай вар, ай догъгъан, кель, бакъсана, эфенди бабам айтты!..

Бу йыл Оразанынъ башында ай корюнмеген эди. Бир айдан берли тутулгъан оруджгъа буюк, севинчили бир ифтар хатырлаяджакъ. Ислямлыкъта пек аз олгъан буюк байрамлардан бирисини мужделееджек айны койде топ-топ джыйылып, эали балабан бир меракъ ве гъайретнен къаравлай эдилер. Лякин эки-учь куньден берли бу гузель юзълю муждеджи айнынъ догъып корюнеджек ерлерини

къаплагъан къара булутлар, кутюльген айны косътермей, эалини ачувландыра эди.

Акъшам намазына якъын бир заман орталықъ тынч, бираз салкъынджа...

Куньдюз ягъгъан ягъмурдан темизленген авада гузель, хош бир къокъу бар эди. Кунеш чокътан «Хан Чардакъ»нынъ артында сакълангъан, орталықъкъа узун сачакълы кольгелер узаткъан эди. Юксек, гъуурлры Чатырдагъ батмакъта олгъан кунешнинъ соң ярыкъларынен йылтырай, алланып-пуллана эди.

Кокте сийрек-сандыракъ асылы тургъан къырмызы, сары, гульгули тюстеки булутлар къыбырдамакътан къоркъкъандай сусып отура, дюньямызыны ташлап кетмекте олгъан кунешни озгъара эдилер.

Кичик къардашымнынъ индже, темиз сеси узеринде ашагъа бакътым. Бабам ве даа бир чокъ кишилер эллерини къашларынынъ устюне къойгъан, куньбатыда Бабугъан-Яйланынъ сыртларындаки бир ягъы гульгули-къырмызы тюслеринен ялдызлангъан кичкене бир булутнынъ къуба тюстеки тарафындан чыкъмакъта олгъан индже, назик айгъа бакъа эдилер... Анамнен кичкене къардашым да бу джыйынгъа якълашты.

Аначыгъым артыкъ нурлары сёнмеге башлагъан ихтияр козълеринен мавы коктеки яш айны къыдырмагъа башлады.

— Я корамайым да, балам!..

— Иште, иште Бабугъан-Яйланынъ устюндеки къырмызы булутнынъ артында!..

Бу арада бабам:

— Ой машалла, не къадар балабан экен, мубарек ай!..

— деди. Анам да сарф эткен энъ соң къуветинен айны корыген эди. Озюнинъ гузель, татлы сесинен:

— Саиде... Мубарек не къадар гузель! Хош кельдинъ, муждеджи ай!.. — деп, кулюмсиреди.

О бир якъта, агъамнынъ, эвден чапып чыкъкъан кичке-
не къызычыгъы:

— Не вар я, буюкана? — деди. — Ким кельди, я?

— Ай, къызычыгъым, ай, кель бакъ, я! Байрам айы,
сенинъ киби яш, тазе бир ай!..

Эвнинъ о бир балалары, онынъ артындан бутюн
къомшу балалары да джыйылды.

Анам:

— Айдынъ, балалар, — деди, тазе ай ичюн бир дуа
этейик, котеринъ эпинъиз эллеринъизни!..

Эр кес элини мавы кокке ачты. Кичкене балачыкълар
севинди, бир-бирлерине бакъышып козьчиклерини
йылтыраттылар. Олар да гузель эльчиклерини
котердилер. Анам темиз юргининъ бутюн сафлыкъ ве
шефкъатынен дуагъа башлады:

Ай корьдим, Аллах,
Аментю биллях
Не де гузель айлар!..
Дженнетке бакъар...
Шевкъы юзюме,
Нурү козюме!..

Акъай, апакъай, бала-чагъанынъ темиз
юреклерinden къопып кельген «Амин»лерге, теректеки
къушчыкъларнынъ гузель чивильтилери де къошула эди.
Анам дуасыны девам этти:

Яттым сагъыма,
Дёндим солума,
Бинъ бир адлы бир Аллах
Бинъ бир белядан сакъла!
Амин, Раббим, амин...

Бираз соңъ, койниň чевре-тарафындан атылгъан байрам тюфеклерининъ муждеджи сеслери, этрафтаки дере ве дагъларгъа барып сыйпала, олардан да къуванчлы къаршылыкълар ала эди...

Абиулла Одабаш



орудж — ораза
мужделееджек — севиндирежек
къаравламакъ — бакъмакъ, беклемек
къуба тюсте — боз-къонъур тюсте
ихтияр — къарт, если башлы
сарф этмек — **мында:** гъайып этмек
сафлыкъ — темизлик, паклик



1. Халкъымызыныň насыл урф-адетинен таныш олдынъыз?
2. Эвель заманларда яныы ай дөгъувыны къартана-къартбабаларымыз насыл къаршылай эдилер? Озы сёзлеринъизнен икяе этинъиз.



Метинде расткельген дагъларныň адларыны сечип алдынъыз. Оларныň акъкъында малюмат топлап чыкъыш япынъыз.



29-ынджы дерс

КУЧЕЛЕК

Сокъакъ — зий-чув, дёрт-беш бала
Кучелекни къувалай.
О заваллы къача. Талып,
Чокъ кечмеден бир токътай.
Кене къача, гуя агълай,
«Ярдымгъа!» — деп багъыра.



Сес-седадан этраф чынълай,
Беденчиги агъыра.
Шаматагъа Заремачыкъ
Чапып чыкъты азбардан.
Джоюлынъыз! — деди къызычыкъ,
Таш котерип энъкъастан.
Эдепсизлер санки урькти,
Къайтып кетти, даркъалды.
Заремачыкъ бакъты кулип
Копечикнен о, къалды.
Тос-томалакъ, бенъзей топкъа,
Чапып кельди о, бир окъдай,
Мемнюнлигин анълатты.
Шу анъден соң Заремачыкъ
Кучелекнен достлашты.
Япты онъа бир ювачыкъ,
Берди эр кунь сув, аш да.
Вакъыт кечти. Тереклерден,
Япракълар да тёкюльди,
Къар да кетти бузлу ерден,
Баарь кельди, кунь кульди.
Копек энди — узун къулакъ,
Бою осъти, семирди.

Озю — ком-кок, къашкъасы — акъ,
Чокътан кемик кемире.
Зареманы о, пек севе,
Артындан да ич къалмай,
Кельгенинен къызычыкъ эвге,
Досту оны къаршылай.
Кимерде бир, акъшам сайын,
Кезмеге де чыкъалар.
«Афу этинь!» — деген киби,
Балачыкълар бакъалар.

Лёман Сулейман



1. Шиирни ифадели окъунъыз. Озъ сёзлеринъизнен мундериджесини икяе этиньиз.
2. Къызычыкънен копечик насыл достлаштылар? Олар акъикъий достлармы?



Узун, семире, кунь сёзлерине къаршы маналы сёзлерни тапынъыз.



30-ындыхы дерс

Метинни язма шекильде беян этюв



Метиннинъ язма шекильде къыскъартылған я да тафсилятлы икяе этильмесине **беян** дерлер.

Беянгъа насыл азырланмалы?

1. Метинни дикъкъатнен окъу.
2. Анълашылмагъан сёзлеринъ маналарыны аныкъла.

- 
3. Метиннинъ эсас фикрини бельгиле.
 4. Эсас фикирни ифаделемек ичюн къулланаджакъ сёзлер ве сёз бирикмелерни къайд этинъиз.
 5. Метинни къысымларгъа болип, серлевалар къой.
 6. Даа бир кере, сёзлернинъ язылувины ве токътав ишаретлернинъ къоюлувины дикъкъат этип, метинни окъу.

АМЕТ-ХАННЫНЪ БАЛАЛЫГЪЫ

I

Мектепте Амет яхши окъуй, дерслерни енгиль менимсей. Алупканынъ юкъары паркында «Ешиль чайыр» деген гузель бир кошечик бар. О, юкъары паркынъ, мектептен узакъ олмагъан ине япракъ тереклери багъчасы янындадыр. Мында о вакъытта мектеплилер ичюн маҳсус салынджақъ мейданы япылгъан эди. Буюк тенеффюс вакътында я да дерстен соңъ, балалар бу ерге чапышып келе, салынджақъта саллана, ойнайлар. Амет бу ерде чешит оюнлар уйдурмагъа пек севе, эм эксери вакъыт озю шу оюнларнынъ тешеббюсчиси ола. Тек оюнларнынъ шенъ олгъаныны истей. Эгер бир де бир баланынъ джаныны агъыртсалар, онынъ кейфи бозула ве, адети узъре, кимнинъ де джаны агъыртылса, оны къорчалап чыкъа.

Бугунь де дерстен соңъ олар, бир топ бала, «Ешиль чайыргъа кельдилер. Базылары, эвель келип, салынджақъларгъа мингенлер. Къалгъанлары къувалашып ойнайлар. Амет балаларны насылдыр бир оюнгъа джельп этмек истеди. Шу ань тереклер арасында онынъ ачыкъ давушы янъгъырады:

— Балалар, айдынъыз оджамыз косътерген «Ортамызгъа алайыкъ» оюныны ойнайыкъ!

Мектеп балалары арасында Аметнинъ итибары буюк эди. Насыл бир тешеббюс косътермесин — эр ким онъа къошуулмагъа, къолтутмагъа ашыкъа. Мына шимди де япкъан теклифини экинджи кере текрарламагъа аджең къалмады.

Балалар, эписи джыйылышып, онынъ янына кельди ве, къоран тепкендеки киби, бири-бирининъ къолларындан тутып, алкъа шеклинде турдылар. Экинджи сыныфта окъугъан юваш бир балагъа мураджаат этип:

— Бекир, сен чыкъ ортагъа, — деди Амет.

— Бакъ, сен не япсанъ, биз де эпимиз оны япаджакъмыз. Ойле арекетлер эт ки, меракълы олсун, кулюнчли олсун.

Сонъ эмир этти:

— Бир, эки, учь!

Бири-бирининъ къолларындан тутып турған балалар, бу эмирге риает этерек, алкъа бойлап сагъ тарафкъа юрьмеге ве йырламагъа башладылар:

Бекир деген бир баланы
Ортамызгъа алайыкъ,
О, не япса, биз де оны
Эп бирликнен япайыкъ.

Йыр биткен сонъ, балалар, токъталды ве дикъкъатнен алкъа ортасындаки Бекирге бакътылар.

Бекир къолларыны белине къойды — эр кес ойле япты. О, ерге чёкти. Кимдир, ерге чёкалмайып, йыкъылды.

Онъа күлюштилер. Сонъ Бекир аякъ устюне турды — эр кес турды. О, сагъ аягъыны огге, тёпеге котерди — эр кес аягъыны котерди. Сонъ о, бирден: «Кок-кори-кок!» — деп, худжур сеснен хораз олып къычырды.

Бунъа ошлангъан балалар, хорнен «кок-кори-кок» деп, къычыраджакълары ерине, кулип талакълары къаткъанындан, «хо-хо-хо» этип, хахылдашып кульдипер... Бойле оюнларны Амет пек севе.



тешеббюсчи — бир де бир ишни башлагъан
адам
къолтутмакъ — разы олмакъ, ярдым этмек



1. Халкъымызының къараманы Амет-Хан Султан акъкъында метинни окъунъыз.
2. Мектепте окъугъанда, Амет-Хан окъувгъа, достларына насыл мунасебетте булуна эди?
3. Бала оюнларындан къайсы бири бу метинде тарифлене? Сиз сыныфдашларынызмен насыл бала оюнларыны ойнамагъа сөвесинъиз? Метинни окъуп, икяе этинъиз.




31-инджи дерс

II

Вакъыт кеткен сайын, Амет ве оның акъранларындан эвде, азбарда, хусусан эвни якъарлықъынен темин этювде даа зияде ярдым талап этиле эди. Олар энди, буюклерниң ярдымынен озылерине одун ташымакъ ичюн, чана япмагъа огрендилер. О чанагъа — каби дер эдилер. Балаларның эписи бойле бирер чана эльде эттилер.

Чананы къуругъан пытакъларгъа, одунгъа толдурмакъ ичюн, энъ аздан беш-алты терекке тырмашып, оның



къуру пытакъларыны кесмек керек ола. Бу иш эки-учь саат вакъыт ала. Амет эр вакъыт озь чанасыны эр кестен эвель толдура ве башкъаларгъа да ярдым этип етиштире. Чаналарның эписи багъланып ёлгъа азырлангъан соń, балалар алкъаланып, ерге отура ве озълеринен алып кельген емеклерини ортагъа къоялар. Кими пите кетирген, кими тузлу хыяр, кими сувгъа пишken къартоп, кими — пишken эт ве иляхри. Бираз къапынгъан ве раатлангъан соń, эвге дөгъру ёл алалар. Лякин одун юклю чаналар иле къырдан ашагъы о ёлны кечмек гъает муреккеп ве агъыр. Ёлның ойле тик ерлери, эндеклери бар ки, азгъана агъыз ачыкълыкъ яpsанъ, чананъ да ашагъы сыптырылып кетер, озюнъ де. Балалар эписи бу ёллардан чокъ юрип, чевиклик, атикли克, арекетченлик джеэтинден чокътан пишкинлештилер.

Бу дагъларда, бу ёлларда аман-аман эр куньки бойле хызметлери, юрюшлери оларда кучь-гъайрет, чыдамлылыкъ, джесаретлик, къавий ираде киби мусбет чизгилер шекилленмесине чокъ ярдым эткendir. Бу пишкинликтө де Амет-Хан башкъалардан айрылып тура эди. Чокъ йыллар кечкен соń, Ана-Ватанны душмандан

къорчалавда бу пишкинлик оларның эписине чешит ағыры, муреккеп вазиетлерден къуртулмагъа дефаларджа ярдым эткендир.

Риза Фазыл, Лютфие Софу



1. Одун ташымакъ ичюн япылгъан чананың адыны хатырланызыз.
2. Насыл хызмет ве арекетлер балаларда пишкинлик шекилленмесине себеп олды?
3. Не ичюн Амет-Ханны балалар да, буюклер де, бутюн миллетимиз севе?



Миллетимизнинъ белли, намлы адамларындан, къараманларындан кимлерни биле ве бегенесинъиз?



1. Хатырла. Бу сёзлернинъ муэллифи кимdir?
*Ватансызының алы — мушкюль,
Бенъзи солар, хорланыр.*
2. Икяенен шишир арасында насыл фаркъ бар?
3. Метинлернинъ чешитлерини айта билесинъизми?



«Ватаным», «Ана тилим», «Догъгъан коюм» (шеэрим), «Бегенген языджым» мевзуларындан бир де бирини сечип, агызыавий я да язма метинлер азырлап, чыкъыш япынъыз.





КУМЮШ КЪЫШ



32-нdжи дерс

КЪЫШ

— Ишниң башы менден башлар, —
Деди баарыге къара къыш.
Кунеш сизни якъып ташлар,
Мен бермесем къар-сув — бахшыш.
Учъ ай тынмай къар ягъдырам,
Ирипnidже ёллар кече.
Дагъда пек чокъ къар къалдырам,
Къар суvuны чёллер иче.

Зейтулла Албатлы



1. Шиирни окъугъанда, сатырларның соңыки эджаларына дикъкъат этинъиз.
2. Шиирниң мундериджесини озь сёзлеринъизнен икяе этинъиз.

КЪЫШ ВЕ БАЛАЛАР

Пытакъта салланып,
Мейвалар балланмай,
Акъкъудай тавланып,
Кокте ай ялдамай.
Багъ-багъча, чёллерде
Ятмакъта терен къар!
Бу сувукъ куньлерде
Къушларгъа омюр — тар!
Къаргъалар, торгъайлар
Ем излеп кезмекте.
Къызычыкълар, огъланлар
Къыштан зевкъ сезмекте.
Олар — эеджанлы,
Козълери — чокъ джанлы!
Оларда къуванч бар,
Оларда ишанч бар.
Чаналар устюнде
Сызгъырып кетмеге!
Бир-бири артындан
Къувалап етмеге!..

Юнус Темиркъая



1. Шиирни ифадели окъунъыз. Не ичюн къушчыкълар къышта зорлукъ чекелер, балалар исе къышны севе ве беклейлер?



Шиирден текrarлангъан сёзлерни сечинъиз. Сатырларнынъ сонълары уйгъунлашкъанына, дикъкъат этинъиз.



Бойле вазиетни козъ огюне кетиринъиз: къыш татилинден соң, эки дост корюше ве бири дигерине насыл раатлангъаны акъкъында икяе этелер. Субетинъизни дефтерге язынъыз.



Метиннинъ талили

Метинни окъугъан соңъ, ашагъыдаки тертипте талиль этмек мумкун:

1. Метинге серлева къоюнъыз.
2. Метиннинъ мевзусыны бельгиленъиз (кеңъ, тар).
3. Эсас фикрини къайд этинъиз.
4. Метиннинъ чешитини бельгиленъиз (икяе, тариф, фикир юрютюв).
5. Метиннинъ къысымларыны бельгиленъиз (башы, эсас къысмы, соңъу).
6. Абзацларның сайысыны къайд этинъиз.
7. Метиннинъ планыны тизинъиз.

ОТЬМЕККЕ УРЪМЕТ


(масалдан парча)

Куньлернинъ бириnde, бағчеван Ахтем къартбабагъа торуны Энвер уйлелик емек кетире. Къарт терекнинъ астындаки ешиль отлар устюне юзбезни яып, ашамагъа азырланалар. Ахтем къартбаба отьmekни кескенде, отьmek уфагъы ерге тюше. Къартбаба оны къыдырмагъа башлай, лякин юксек отлар арасындан тапып оламай. Торунына мураджаат эте:

— Огълум, меним козълерим яхшы корьмей, мына бу ерге отьmek уфагъы тюсти, оны тапып оламайым, къыдырса, бельки сен тапып олурсынъ, — дей.

Энвер отларның арасыны ачып бакъа ве тапа, къартбабасының козълерине бакъа да:

— Бу къадар кичик отьmek уфагъыны къыдырмакъ ичюн, не къадар вакътымыз кетти. Ашымыз да сувуды, — дей.



— Ашны сувутып да ашамакъ мумкун, лякин отьмек уфагъыны гъайып этмек гуна олур.

— Я о, пек уфачыкъ да?..

— Догъру, о, даа уфакъ, тамам санъа бенъзей. Отьмекни баласы, о да сенинъ киби осер ве буюр. Отьмекни урьмет этмек, саймакъ керек.

Уйлелик емекни ашагъан сонъ, тазе отлар устюне раатланмакъ ичюн яталар ве къартбабасы Ахтемге эскиден къалгъан масалларны икяе эте.



1. Отьмекни не ичюн урьмет этмек керек?
2. Отьмек неден япылгъаныны ве насыл пишкенини ана-бабанъыздан сорап, джевабыны язынъыз.
3. Метиннинъ мундериджеси боюнджа субет кечири-нъиз.



Урьмет этсенъ, урьмет корерсинъ.



КЪЫШ—УСТА



Бугунь нелер олгъан, нелер!
Саба турдым, пенджерелер,
Не бакъайым, о бир якъта
Не олгъанны косътермейлер.

Чагъырдым мен къардашымны,
Бакъты о да, шашты къалды.
Мышыгъымыз да мырылдады,
Тюшюнджеge эр кес далды.

Бу джамларгъа нелер олгъан?
Туманлангъан, йылдызлангъан,
Чешит орънек, къабартылар
Уста къолнен ялдызлангъан.

Ямалгъан джам кягъытлардан,
Гедже терлеп, сувлар акъкъан,

Буздан бирер шише саркъкъян,
Санки къызлар купе такъкъян.

Буны япкъян — буздан эллер,
Къыш бабайнынъ — бу орьнеклер.
Къышта буюк усталыкъ бар,
Эр тарафта ресим япар.

Абибулла Одабаш



1. Шиирни ифадели окъунъыз. Шиирнинъ эсас фикрини сакълап, онынъ мундериджесини язма шекильде беян этинъиз.

2. Сачакълардаки бузларны шаир къызларнынъ купелеринен къяслай. Олар сачакъларда насыл ве не вакъыт пейда олалар? Дикъкъатнен окъусанъыз, себебини шиирден тапарсынъыз.



Шиирни дикъкъатнен окъунъыз, тасавур эткен къыш манзарасынынъ ресмини япынъыз.



35-инджи дерс

КЪАРБАБАНЫ БЕКЛЕП

Къашкъыр киби улуй тышта
Къар-боранлы аджджы ель,
Тек Къарбаба къоркъмай къыштан,
Долана о, багълап бель.

Долана о, эль-юртларны,
О, кирмеген эв ёкътыр.
Бакъып чыкъа джап-сыртларны,
Оны беклеген — чокътыр.

О, эм куньдюз, эм де гедже
Кезип юре, юкъламай.
Къарбабачүн къыш — эглендже,
Къар уфюрте токътамай.

Кирпиклерим бир-бирине
Татлы-татлы япыша.
Джюйрюк минген къарт корюне,
Тюште оннен тапышам.

Шакир Селим



1. Сатырларның сонъларына дикъкъат этинъиз. Олар къафиелешелер.

Ифадели, керекли токътавларны япып, сёзлерни керекли давуш аэнкинен ифаде этип, ширирни окъунъыз.

2. **Тюште оннен тапышам** — бу ибарени насыл анълайсынъыз? Тарифленъиз.



Аджды ель, эль-юрт, джап-сыртлар — ибарелерине якъын маналы сёзлер тапынъыз.



1. Бу сатырлар къайсы ширирден алынгъан. Оларның муэллифи ким?

*Акъкъудай тавланып,
Кокте ай ялдамай.*

Табиат, йыл мевсимлеринин къайсы маалинде бойле манзараны анъдыра?


2. Беян этюв шекиллерини тарифленъиз.



«Кумюш къыш» серлевалы ресимлер сергисини тешкилятландырынъыз.



РЕСИМ УЗЕРИНДЕ ИШ



Ресимге дикъкъатнен бакъынъыз. Къыш акъкъында бильген, окъугъан икяе, шиирлерге ве бу ресимге эсасланып, метин язынъыз. Метининъизде къыш мевсимини, кой эвлерини, табиатны ве балаларның оюнларыны тариф этинъиз. Сиз къыш мевсимини сөвесинъизми? Не ичүон?



ЭМЕК СЕВГЕН — БАХТ ТАПАР



37-нdжи дерс

ЭМЕК СЕВГЕН — БАХТ ТАПАР

Бильги алсанъ мектепте,
Шадлыкъ осе юректе.
Окъуп, унер огренген —
Урьметленир эмекте.

Бугунъ мектеп — янъы сой,
Фералана шеэр, кой.
Уста олмакъ истесенъ,
Ишхане бар бойдан-бой.

Койде багъ-багъчалар бар,
Кениш-къулач тарлалар.
Агроном олам десенъ,
Ол озюнъе талапкяр!

Сен макъталсанъ эмекте,
Сени Ватан бегенир.
Санъа бакъып, юректен
Ана-бабанъ севинир.

Зейтулла Албатлы



1. Шиирнинъ эсас фикрини бельгиленъиз.
2. Шиирде шаир къайсы девирнинъ мектебини ше-рефлей?
3. «Агроном» къайсы саагъа аит зенааттыр?
4. Бегенген зенаатларыныз акъкъында икяе этинъиз.
5. Бахытлы омюр къурмакъ ичюн, окъумакъ, чалышмакъ шартмы?



38-инджи дерс

БАЛКЪУРТЛАР ИШКЕ БАШЛАЙ

Баарь кельди. Къарлар ириди. Тереклернинъ бурълери ачылмагъа башладылар. Балкъуртлар къышюкъусындан уянды. Йымшакъ оленчиклернен козълерини къашыдylар ве тышары чыкъып башладылар. Балкъуртлар, сепеттен чыкъкъан соң, багъчагъа учып, догъру алма терегине бардылар.

— Сиз, пек эрте кельдинъиз, меним чечеклерим даа ачылмады, — деди алма тереги...



Балкъуртлар, алманынъ лафыны эшиткен сонъ, эвлерине къайтаджакъ олдылар. Ёлда, эвге учкъанда, козьлерине ешилликлер арасында осъкен мелевше чечеклери урулды. О чечеклер ичинде къокъулы, лезетли бал бар эди. Балкъуртлар бу балдан тойгъандже ичтилер ве эвлерине токъ ве шень юрекнен къайттылар.

Абдулязиз Герайбай



1. Баарьниң къайсы айында мейва тереклери чечек ачалар?
2. Метинниң чешитини бельгиленъиз.
3. Метинде къач шахыс иштирак эте? Оларны бельгиленъиз. Олар: 1) мелевше; 2) терек; 3) сепет; 4) бағыча; 5) алма тереги; 6) балкъуртлар; 7) муэллиф. (догъру джевапларны сечип, дефтерге язынъыз).
4. Метинниң мундериджеси боюндан суаль-джевап шеклинде субетлешинъиз.

ИСТЕР ИСЕНЬ

Бал ашамакъ истер исенъ,
Къоркъма балкъурт чакъышындан.
Балықъ тутмакъ истер исенъ,
Къоркъма озен акъышындан.
Истер исенъ къазанмагъа
Джемиетте сайгъы-урьмет,
Кичиклерге нумюне ол,
Буюклерге итибар эт!

Эрдживан Керменчили



1. Шаир балаларға мураджаат этерек, олардан не талап эте?
2. Антоним ве синоним сөзлерини шиирден сечинъиз.
3. Эмексевер, джесюр, эдепли, виджданлы — бу сөзлер, шиирниң къайсы сатырларына манаджа келишелер?



КЪОРКЪАКъ НЕБИ ВЕ ЙЫЛАН

I

Мен бу икяени танышым Неби агъадан эшиткен эдим. Биз юзюм күтүклерининъ талдасында отура эдик. Мен, онынъ лафыны большей, дикъкъатле динълей эдим.

Та бешинджи сыныфта окъугъан вакътымда, бир кере пичен чалмагъа кеткен эдик. Саба эрте ёлгъа чыкътыкъ. Аvasы салкъын ве тазе эди. Юксек къырларнынъ тёпесинде акъ булут кесечиклери ялдай, сонъра гъайып ола эдилер. Бираздан, къызырып, кунеш дөгъды. Койден чыкъар-чыкъмаз, къомшумызынъ оғылу Сабри пешимизден чапып етти. Онынъ къолунда кягъыт бурумы бар эди.

— Ма, ал, ананъ йиберди! — деди о, бурумы манъа узатып.

Кягъытны къолума алгъанымнен, анда шубели бир шей сарылгъаныны дуйдым. Сабриге буны бильдирмедим. Токъта сени, ачып бакъайым, анда не бар экен? Бурумы ачсам, не корейим: балабан йылан башыны манъа къадайтып тура. Къоркъанымдан буз-бузладым. Дерсинъ, башымдан ашагъы бир къопкъа салкъын сув тёккенлер. Къолумдаки кягъытны йыланнен бирге насыл котерип аткъанымны бильмейим. Ачувдан гъарезликтен Сабриге атылдым. Туткъан олсам, оны чиль-парча этеджек эдим. О, менден зорнен къачып къуртулды. Эки кунь юзюме корюнмеди.

Олып кечкен вакъианы Сабрининъ анасына айттым. Сонъундан эшиткениме коре, о, оғылунынъ къулагъыны бурып: «Явурнынъ баласы, я барып да къоркъудан тили

тутулгъан олса, не япаджакъ эдинъ?» — деп, яхшы этип тазирлеген. Шукюрлер олсун, не къадар къоркъсам да, тилим тутулмады.



1. Бу икяени муэллиф кимден эшиткен?
2. Неби агъа къачынджы сыныфта эди? Олып кечкен вакъианы учюнджи шахыс адындан икяе этинъиз: «Неби агъа, бешинджи сыныфта окъугъанда, достларынен пичен чалмагъа баргъан эди...».



Гизлемек ve *тазирлемек* сёзлерине якъын маналы сёзлер тапып, оларнен джумле тизинъиз.



40-ынджы дерс

II

Арадан бир йыл кечти. Тамам июнь айы эди. Багъда пич пытақъларны ала эдик. Уйлегедже, бель котермей, чалыштым. Отъmek, помидор, бир тилим пенир сарылы явлугъымны къарагъач терегининъ пытағъына илиштирип къойдым. Терекниң тюбюни бус-бутюн ем-ешиль от баскъан эди. Анда отурып раатланаджакъ эдик.

Меним дикъкъатымны бирден терек тёпесинде авеленип, къычырып учкъан къушнынъ сеси джельп этти. Бир къач дақъъа къушкъа бакъсам да, меселенинъ асылыны анълап оламадым. Якъын барып бакъайым, не олгъан шунъа, дедим. Кельсем, узун, къара бир йылан терекке сарылгъан, эп юкъары сюйреклене. Къачаджакъ олдым. Лякин токътадым. Анда, терекниң гурь пытақълары арасында къушчыкъынынъ ювасы бар эди.

Шимди бу мераметсиз йылан, оларны ашамакъ ичюн, терекке тырмаша. Мен бу алны козь огюне кетирип, къоркъуны тамамынен унуттым. Бу арада йылан дегиль, атта аждерха олса биле, къачаджагъым кельмеди.

Гъарип къуш исе юкъары котериле, баш ашагъы эне, чивильдеп, терекке окътала, базыда, менден имдат истер киби, башымнынъ тёпесинде айлана эди. Йылан исе эп юкъары тырмаша...

Гурь терек пытакълары, ешиль япракълар ишимни къыйынлаштыра эди. Мен къарагъач таягъыны къолума алдым. Оны уфакъ-тюфек къуру пытачыкълардан темизледим. Тутмакъ, къуветнен салламакъ ичюн онъайтладым. Таякъынынъ индже тарафындан тузып, къалын уджунен йылангъа урмакъны къаарлаштырдым. Терекниң этрафыны доланаракъ, урмакъ ниетинен келишикли ер къыдырдым. Йылан яваш-яваш сюйреклене ве артыкъ къуш ювасына якъынлангъан эди. Башыны о якъ, бу якъ чевирди. Соң бир ерде къатып къалды. Бекледи. Уджюмге азырлана эди, гъалиба. Мен бундан файдаланаракъ, таягъымны бар къуветимнен саллап, йылангъа урдым.

Бу вакъиадан соң сыкъ-сыкъ къуш балачыкъларыны барып ёкълай эдим. Олар базыда, башчыкъларыны бири-бири устюне къойып, къыбырдамай ята, шытырды эшиткенлеринен, аналары кельди беллеп, сары агъызчыкъларыны ача, чивильдеп къакъыла эдилер. Нияет, олар буюди, тюклени ве къанат чыкъарды, соңра къайдаларгъадыр учып кеттилер...

Ибраим Пашиден



1. Небининъ дикъкъатыны насыл сеслер джельп этти?
2. Не ичюн о, къачмады?
3. Къуш балачыкъларыны насыл къорчаламагъа арекет эте эди?
4. Неби къушчыкъларны насыл къуртарды?
5. Сизлер этрафынъызда яшагъан къуш ве айванларгъа насыл ярдым этесинъиз?
6. Дағъда, орманда йыланнны расткетирсөнъиз, сиз не япар эдинъиз?



1. Бель котермей чалыштым; джельп этти; имдат истер киби; къанат чыкъарды — бу ибарелернинъ изаатыны беринъиз.

2. Ашагъыдаки исимлерге уйгъун кельген сыфатлар тапып, сёз бирикмелери язынъыз: ... тереклер, ... пытакълар, ... йылан.



Къоркъакъ озь колеткесинден къоркъа.

Джесюрге олюм къоркъунчлы дегиль.

Джесюрнинъ бакъышы

Къоркъакънынъ къылышындан кескиндир.



Аталар сёзлерини эзберленъиз.



41-инджи дерс

ЧЕБЕР КЪЫЗ

Эминечик — тек чебер,
Эр иш келе къолундан.
Эв сипире, шей юва,
Бошагъан соң оюндан.
Пенджере, долапларны
Сюртүп чыкъа тер-темиз.
Анасына къомшулар
Дейлер: «Чебер — эркенъиз».

Билял Мамбет



1. Шиширни ифадели окъунъыз.

2. Дерслеринъизни япкъан соң, насыл эв ишлеринен мешгъуль оласынъыз?



Ашагъыда берильген сёзлер насыл мананы анълаткъаныны изаланъыз (тюс, алямет, иш арекетни, чокълукъыны): *тек чебер, сипире, юва, тер-темиз*.

ДЮЛЬГЕР

Агъач ишини япмагъа
Шевкет чебер бир бала.
Дерстен къайтса, элине
Балта, эренде ала.

Тахта ёнъа, мыкъ къакъа,
Къапу первазы ясай.
Достлары — эп оюнда,
О исе — къулакъ асмай.

Тахтадан эвчик ясап,
Къапу, пенджере къойгъян.
Таванына оджакъчюн,
Дёрткоше тешик ойгъян.

Дей: «Пенджере джамларын,
Озь элимнен къояджам.
Осип, буюп, халкъыма
Дюльбер эвлер къураджам».

Билял Мамбет



1. Шиирни ифадели окъуп, эзберленъиз.
2. Иш алетлерине аит мевзуда шиир язгъан муэллиф-
нинъ адыны хатырланъыз.
3. *Перваз* сёзюнинъ манасыны анълатынъыз.
4. *Къапу первазы* — даа ненинъ первазы ола?



Берильген, зенаат-унерге аит олгъан, сёзлерге
эсасланып, зенаат саибини тапынъыз.
Меселя: *китап, къалем, тахта, бор — оджа;*
шприц, рецепт, илядж, хаста — ...
басма, макъас, йип, дёгме, ине —
копчек, ат, могедек, тельбев, араба —



МАДЖЕРА

Бир кунь бешлер, экилер,
Пек де къавгъа эттилер.
«Амет бизни пек севе! —
Деп макътанды экилер.
— Чантасында толушып,
Онынъ иле юремиз.
Амет бизни тюзетмей,
Биз онъа пек керекмиз.
Бизнен кельсе эвине,
Чаяланмай отура,
Анасы, бабасыны
Яланларнен тойдурा.
Биз олгъанда, Аметке
Не дерс керек, не дефтер.
Экшитменъиз Аметнинъ
Мийини, киббар, бешлер!..»
Бешлер сабыр такъатнен
Динълейлер экилерни.
Экилер эп тавлана,
Эриштирип бешлерни:
«Рогатканен энъ мергин
Ким ата?!

— Эбет, Амет!
Эль-бетини ювмайып,
Ким ята?!

— Эбет, Амет!
Сыныф дегиль, мектепте
Ким энъ яхшы экиджи?
Ким олсун?

— Эбет, Амет,
 Энъ аляджы экиджи!
 Биз оны ойле яптыкъ,
 Даа нелер япармыз.
 Экиджилер ичинде
 Оны реис сайлармыз!..»
 Бундан соң юваш бешлер
 Экилерге дедилер:
 «Амет окъумакъ керек,
 Эм де тек дёрт, бешлерге!
 Нумюне олмакъ керек
 Бутюн дост ве эшлерге!»

Юнус Къандым



1. Шиирни ифадели окъунъыз.
2. Не ичюн **бешлер** ве **экилер** давалашалар?
3. Амет насыл бала олгъаныны, онынъ табиат чизгилери-ни къайд этинъиз? Амет киби олмакъ яхшымы?
4. Аляджы олмакъ ичюн, насыл окъумакъ керек?
5. Земаневий мектепте «аля ишарет»ини ифаделеген ракъамларның сырасыны язынъыз?
6. Шиирни роллерге болип, ифадели окъунъыз.



43-юнджи дерс

СЕРВЕР ВЕ ЧЕЧЕК

Сервер — зекки, окъув севе, атик, эдепли,
 Табиаткъа ашыкъ-севда бир мектепли.
 Татиль вакъты чыкъа бир кунь кезинмеге;
 Чёльде чечек, гуллер джыйып севинмеге.
 «Кель, кель!» — дейлер онъа ешиль кенъ тогъайлар,
 Чивильдеше, чёпелейлер бозторгъайлар.
 «Кель манъа!» — дей къыр этеги, джайдакъ байыр,



Дере-тёпе арасында ешиль чайыр.
Бостан бойлап, шырыл-шырыл акъкъан озен,
Кунь табакълар кунеш нурлу, алтын феснен.
Яз ели де, кяде эсип серин-серин,
Сыйпап кече перчеминден сач теллерин.
О, табиат къучагъында чокъ шей сече,
Осюмликлер алемини сынап кече.
Эр арекет, адиседен тесир ала,
Юргинде тюкенмез бай дуйгъу къала.
Эр чечекни, эр боджекни бильмек истей,
Огъланчыкъының гонълю джоша, кульмек истей...
Бир тогъайда кийик отлар сыра-сыра,
Арасында гузель, назик чечек тура.
Сервер къыза: «Илле оны узейим! — дей. —
Къокълай, къокълай доланайым, кезейим!» — дей.
Кийик отлар-оленлерни чекип четке,
Узана о чөль мелеги, чечечикке:

— Айт, чечегим, сени узип алайыммы,
Кокрегиме яраштырып къояйыммы? —
Деп, ынджытмай, ипрандырмай оны узе,
Гульге бенъзер исперини гонълю сезе.
— Не аджайип къокъулы бир чечек экен,
Бу онъайтсыз ерге оны кимлер эккен?!
Худжур шей, — деп тааджиплене, меракъ арта,
Чечекни субет ичюн тильге тарта:
— Айт, гульсинъми, гъанберсинъми, чечечигим,
Аслынъ, неслинъ темелинден биледжегим...
Чечек мемнюн джандан татлы бу сёзлерге.
Незакетнен джевап бере мектеплиге:
«Мен — не гуллим, не гъанберим, гузель бала,
Лякин осъкен эдим гуллер арасында.
Шундан себеп, менден гульдай къокъу келе,
Гульнинъ досту гульге бенъзей, эр кес биле.
Яхшыларнен юрьсенъ яхши таныласынъ,
Яманларнен яман аднен анъыласынъ!» —
Деп, чечечик мектеплиге сырын айта,
Сервер йырлап, чечек къолда, эвге къайта.

Лёман Сулейман



ис — къокъу
гъанбер — къокъулы шей



1. Осюмликлер алеми Серверге насыл тесир эте?
2. Чечечик Серверге озюнинъ насыл сырыны ача?
3. Шиирдеки аталар сёзюни насыл анълайсынъыз:
Яхшыларнен юрьсенъ, яхши таныласынъ, яманларнен яман анъыласынъ?
4. Чечек, осюмликлерниң асыл-неслини огрендемек ичюн, оларны къопармакъ шартмы? Озы фикринъизни беян этинъиз.
5. «Къызыл китап» акъкъында насыл малюматынъыз бар? Бу китапның тешкиль олмасына нелер себеп олды?



Осюмлик ве чечеклер сырасыны девам этинъиз:
мелевше, пападие, магъданос, ляле, чанъ чечеги, ...



44-юнджи дерс

ЧАЛЫШЫР ВЕ ОГРЕНЕМИЗ

Ягъмур насыл ягъа?
Ель неден ола?
Къар недир, буз недир?
Сув къайдан келир?
Атлар насыл яшай?
Къуртлар нелер ашай?
Балабан—кичик,
Терек—кутюк,
Не бар, не ёкъ?!

Шаркъ—гъарп,
Къолай—сарп,
Кельгенин-кечкенин,
Тарихын, дегенин
Тешкеремиз,
Огренемиз...

Тилимизден,
Элимизден,
Сёзюмизден,
Ич бир шей къачмаз,
Бизни къачырмаз,
Эбин-себебин,
Аслын-эсасын
Корюмиз,
Билирмиз,
Алышырмыз,
Къарышырмыз,
Коюмизнинъ ишлерини

Догърлтмагъа чалышыр,
Яшамагъа, курешмеге алышырмыз.

Абибулла Одабаш



1. Шиирни окъунъыз.
2. Муэллиф озы къараманы огюнде насыл месулиетли вазифелер къоя? Ондан, насыл олмакъны талап эте?



Шаркъ — гъарп, ... уфукъ адларыны девам этинъиз.



45-инджи дерс

КИЧИК УСТАЛАР

Дёрт-беш бала, топланып
Къарт чинарнынъ тюбюне,
Кичик эвчиклер япып,
— Кой къурдыкъ, — деп севине.

Эвчиклери — къутудай,
Бичими де келишкен.
Олар, буюк адамдай,
Ишке джиддий киришкен.

Пенджерени, къапуны,
Дерсинъ, япкъан дюльгерлер.
Эрендени, пычкъыны
Ишлетмеге бильгенлер.

Эшреф Ибраим



1. Сизлер бosh вакътынъызы не ерде ве насыл кечиресинъиз?
2. Къуруджылыкъта насыл иш алетлерини къулланалар? Олар акъкъында икяе этинъиз.

БАХШЫШ

Бундан учь йыл огюне,
Азбарымыз четине,
Сачтым алма фиданы,
Бакътым-осътюрдим оны.
Алмалары сары, ал,
Эр бири дей: «Мени ал!»

Далыны тепрете ель,
Алмагъа узатам эль.
Терек эгиле, манъа
Дей: «Чокъ тешеккюр санъа!
Алмаларым джый да ал!
Пек татлыдыр, дерсинъ бал».

Иса Абдураман




1. Алма тереклерининъ насыл тюрлерини билесинъиз?
2. Шиирде расткельген **ал** сёзлерининъ манасыны аньлатыныз.
3. Терек шаирге не ичюн тешеккюр бильдире?



1. Кимниң ширинде **куң табакълар алтын фес кийген**.
2. Табиатта олған **ишкір** махлюқъларны къайсы эсерлерде расткетирдинъиз?
3. Мейва тереклерини не вакъыт пытамакъ керек? Кышта оларны суваралармы?
4. Кырымда осъкен алма тереклерининъ адларыны, тюрлерини айта билесинъизми?



Берильген джумлелерни текмиллеп, дефтеринъизге язынъыз: «Эмек севген — баҳт тапар» болюгинде биз бир сыра кырымтатар языджыларының эсерлеринен таныш олдыкъ: ..., ..., Меним энъ зияде бегенген эсерим —



ГУЗЕЛЬ БААРЬ



46-нұжы дерс

БААРЬ

Сувукъ къыш мевсими шиддети кечти,
Башкъа ренкке кирди земане, достум.
Баарь демлерининъ къокъусы тюшти,
Дагъытты анберин джиане, достум.

Ириди къарлары, ешерди чёллер,
Быракъты зынджырын, голь олды селлер.
Чечеклер ачылыр эстикче еллер,
Миннет гуль, сунбуле, рейхане, достум.

Эр кесниń къальбине тюшти ферахлар,
Наргизинъ башын эгилтти будакълар.
Лялелер толдурып алтын къаделер
Создылар алып бир-бирине, достум.

Ашыкъ Умер дер ки, ачылды гуллер,
Дженнет киби олды сахралар, чёллер.
Сейирге чыкътылар джемий гузеллер,
Сен ничюн чыкъмазсынъ сейране, достум?!
Ашыкъ Умер



1. Шиддетли къыштан соң, табиат насыл ренкке кирди?
2. Ашыкъ Умер табиатта олгъан даа насыл деньишмелерни тасвирлей?
3. Шаир бу шириnde насыл дуйгъуларны ифаделей? Кимге мураджат эте?
4. Ширини эзберленъиз.



47-нджи дерс

КЪЫРЫМНЫНЪ БААРИ

Не гузель Къырымнынъ баари,
Багъ-багъча гуль-чечек ачкъанда,
Чочамий торгъайлар чырылдап,
Чёллерде эзгилер сачкъанда.

Айдынъыз, балалар, бирликте
Чайырлар, къырларны кезейик,
Мос-мор мелевше, чечектен
Къокъулы гульдесте тизейик.

Бакъынъыз, ем-ешиль — орталыкъ,
Кийинген-къушангъан чайырлар,
Тынч сема астында тогъайда
Гуль топлай бахтияр балалар.

Тарлалар ем-ешиль кийинген,
Секире къозулар эректе.
Не назлы нагъмелер тёкелер.
Бульбуллар сув бою, теректе.

Иззет Эмиров



нагъмелер тёкелер — йырлайлар



Къырым баарини шаир насыл тарифлей, табиатта насыл
денъишмелер ола? Аэнкдеш сёзлерни къайд этинъиз.



«Баарь», «Къырымның баари» шиирлерини текrar
окъуп, эки шиир эсасында баарь акъкъында беян
язынъиз.



48-инджи дерс

...Чечек! Ер юзүнде оны севмеген адам бармы?!

Ильки баарьде къар астындан башыны котерген
акъбардакъ анги бир къырджыманға генчлигини
эслетмей? Балалыгъында тегенеклер астында
мавымсырап тургъан мор мелевшелерни узьmek ичюн,
анги бир инсан къолларыны ал къангъа боямай? Анги
бир инсан доступна, эдие оларакъ, чечек багъышламай?!

...Аналар севимли эвлятларыны багъырларына басып:
«Сен меним дюньяда бирден-бир чечегимсинъ!» — деп,
охшайлар.

Юсуф Болаттан



къырджыман — орта яшлы инсан



1. Парчаны окъунъыз. Джумлелернинъ соңундаки суаль ишаретлери насыл вазифени беджерелер?
2. Соңки джумледе **чечек** сёзю — насыл манада къулланылгъан (асыл, кочьме)?
3. Метинге серлева къоюнъыз.



* * *

Мен — бир баарь ельчигим,
Хоштан-хош гонъюльчигим.
Юреклерге зевкъ берем,
Юзыни сыйпар эльчигим.

Гуль-чечекнинъ янагъын
Опе назик дудагъым,
Балаларнынъ юзюни
Сыйпамакътыр мурадым.

Зейтулла Албатлы



1. Баарь ве кузъ елперининъ арасында фаркъ бармы?
2. Сёзлернинъ уйгъун эджаларыны къайд этинъиз.
3. Шиир кимнинъ адындан язылгъан?
4. Ашагъыда берильген сёз бирикмелер ифаделеген маналарны козъ огюне кетиринъ, тасавур этмеге тырышынъыз: **хоштан-хош гонъюльчигим, юреклерге зевкъ берем, назик дудагъым гуль-чечекнинъ янагъыны опе, балаларнынъ юзюни сыйпайым.** Бу ибарелерни бегендинъизми?



Ель, рузгяр, джель, юзьгяр бу сырадаки сёзлернинъ ангиси эдебий тильде къулланыла, ангилери шиве сёзлери сайылалар?

Олар тилимизниң къайсы шивелеринде расткелелер?



Къырымтатар языджы ве шаирлернинъ эсерлерини хатырлап, «Баарь чечеклери» серлевалы тариф метинини языныз.



49-ынджы дерс

БААРЬ КЕЛЬДИ

Сабырсызлықънен бекленильген баарь кельди. Артыкъ авалар къызды. Тышта къышнынъ къулакъларны кираз киби къизарткъан серт, сувукъ бораны ёкъ. Онынъ ерине юзълерни охшагъан серин деньиз ельчиги эсе.

Ернинъ къышлыкъ памукъ ёргъаныны — мавы, сары ве беяз къокъулы чечеклернен нагыышлангъан ешиль макъат деньиштириди. Багъчалар гульгули ве беяз чечеклернен ортюнген кираз, вишне тереклеринен ярашты.

Кузъде сыйджакъ тарафларгъа учып кеткен къушчыкъларнынъ бир чокъусы энди къайтып кельдилер. Олар шенъленип, чивильдешип уча ве, чечеклернен ярашкъан дюльбер тереклер устюне къонып, шенъ ве назик тюркюлерини йырлайлар.

Ибраим Бахшиш



Баарь айларынынъ адларыны айтыныз.



Сыджақъ, шенълемемек, сувукъ сёлерининъ къарама-къаршы олгъан маналарыны тапып, дефтеринъизге язынъыз.

Нокъталар ерине уйгъун кельген сыйфатларны язынъыз: *серт, ..., ... боран; гульгюли, ..., ..., ... чечеклер.*



Баарь акъкъында левхаларны ве шиирлерни окъуп, ресим япынъыз.

* * *

Эмджем къюн бакъа чокътан,
Пек унерли, намлы чобан.
Яйлаларгъа мен чокъ барам,
Чалашында ятып къалам.

Бу баарь де, кене бардым,
Къозучыкълар корип къалдым.
Не де гузель къозучыкълар!
Мен оларгъа пек сукъландым.

Ешиль отлар арасында
Ойнашалар, алышалар.
Акъшам олса, къошарларгъа
Сюрю-сюрю толушалар.


Черкез-Али



1. Баарьде яйланы сейир эттинъизми?
2. Чобанлар къюнларыны не ичюн яйлада бакъалар?
3. Яйланынъ аланлыкътан насыл фаркъы бар?
4. Къараби яила Къырымнынъ не еринде (ялы боюнда, чөльде) ерлешкен?



РЕСИМ УЗЕРИНДЕ ИШ





Ресимге дикъкъатнен бакъынъыз. Рессам йылнынъ насыл мевсимиини тасвирлеген? Бу ресим сизде насыл дуйгъулар дөгъура? Озы фикирлеринъизни икяе этинъиз.



Эзберлеген шиирлер, окъугъан икяелер ве тасвирленген ресимге эсасланып, баарь акъкъында тариф метинини язынъыз.



51-инджи иш

АНАЛАР – ЭНЪ МУКЪАДДЕС СЁЗ

Аналар... Биз бир вакъыт аналарымыздынъ бизге япкъан эйиликлерини одеп оламамыз. Ялынъыз йыллар кечип, озюмиз аиле саibi олгъан соңъ, о гъайыпнынъ агъырлыгъыны ис этемиз. Балалар озы аналарына: «Мен сени севем», — деп айтмайлар, эм олар аналарына олгъан севгисининъ — севги олгъаныны да бильмейлер. О, табиий бир шей: нефес алгъан киби, танъ аткъан киби. О мукъаддес дуйгъунынъ ады ёкътыр...

Инсан бир шейден абдыраса, къоркъса: «Вай, анам!» — деп, озю дуймай, багъырып йибере. Яни шу сёзлеринен о, озюни сакълагъан киби ола. Джэнк мейданында да шай ола. Эсли-башлы, кучълю адамлар, беденини сыйджакъ якъыджы къуршун, сюнгю тешкенде, ерге йыкъылмаздан звель:

— Ана, аначыгъым! — деп, соңъ сюрюне ве омрюнинъ соңъки санилеринде аналарынен олалар.

Джевдет Аметовдан

* * *

Ананы айбетле, къальбине тыныш бер,
эр саба тургъанда, алышы сора.
Бир ань кеч кельсөнъ ишинъден эгер,
ананънынъ къальбини гъам-къайгъы сара.
Ананы ынджытма! Кельсе де юзге,
артынъдан теляшнен тельмирип къала.
Арзу, къуванчыны багышлай бизге,
гъам иле кедерни озюне ала.
Айбетле, Ананы!

Билял Мамбет

АНА

Джанымдан азизим, козюмде нурум,
Эр шейден къыйметли, севимли ана!
Бахтым, къуванчым, къальбимде сырым,
Гуль багъым, баарим — севимли ана!

Сабийлик чагъымнынъ саари — ана,
Осьмюрлик девримнинъ баари — ана,
Умюдим, хаялым багълыдыр санъа,
Омрюмнинъ гонджеси — севимли ана.

Геджеде юкъунъны он кере больгенсинъ,
Ойнасам — севинип, мен кульсем — кульгенсинъ,
Кейфимни бозгъанда, саарып солгъансынъ,
Дердимнинъ девасы — севимли ана.

Къаранлыкъ геджемнинъ ярыгъы — ана,
Истикъбаль омрюмнинъ барлыгъы ана,
Юректен иззетим фышкъыра санъа —
Къайгъымчун зорлангъан севимли ана.

Сёзлерим денъизге, деръягъа сыгъмаз,
Сен ичюн ачылгъан гуллер де солмаз.
Дестанлар язсам да, эллерим талмаз,
Гонълюмни охшагъан севимли ана.

Джевайре Меджитова



1. Берильген учь метинни дикъкъатнен окъунъыз. Бу метинлер насыл кенъ мевзугъа багъышлангъан?
2. Джевдет Аметов аналарның насыл чизгилерини тарифлей?
3. Джевайре Меджитова ве Билял Мамбет аналарны насыл сөз ве ибарелернен тарифлейлер?
4. *Юректен иззетим фышкъыра санъа* — бу сёзлерни насыл анълайсынъыз? *Иззетим* — сёзюне якъын маналы сөз тапынъыз.



Бу метинлерге эсасланып, «Севимли анам» серлевалы беян язынъыз.



52-нджи дерс

МАСАЛ

Джан сыкъыджы къыш геджеси,
Сабий ята, юкъламай.
Ыслыкъ чалып, еллер эсе,
Тышта — аяз. Къар — номай.

— Юкъла, къозум, — дей битасы,
Юм козюнъни, айя-ай...
Тышта боран шаматасы
Шакъа этип ойнамай.

Чокъ юкъласанъ, тосунчыгъым,
Татлы тюшлер корерсинъ.
Юм козюнъни, къозучыгъым,
Бир геджеде осерсинъ.

— Битачыгъым, масал, сёйле,
Сонъ юкъларым, — дей бала.
Битай башлай мына шойле
(Сабий юкъугъа дала):

— Бир заманда яшай экен
Дженк — не, бильмей адамлар,
Чалыша ве ашай экен
Дженкте ольмей адамлар.

Ер юзюнде заманлар тынч,
Девлетлер тынч кунь коръген.
Аскер-маскер олмагъан ич,
Эр кес бирдай шенъ юрген.

Балаларның бабалары
Сабан сюрген тарлада.
Номай ашлыкъ обалары
Юксельгенлер арманда.

Кимсе къоркъып яшамагъан,
Дюнья дженклиз, кенъ экен.
Яхши, яман халкъ олмагъан,
Эр кес бирдай тенъ экен.

Аналарның башы узыре
Парылдагъан ал кунеш.
Ер — къоджаман бир эв экен.
Адамлары — дост ве эш...

Битай сёйлей, чорап оре,
— Юкъла, къозум, айя-ай...
Сабий татлы тюшлер коре,
Сабий терен, тынч юкълай.

Шакир Селим



къоджаман — пек буюк, балабан
ыслыкъ чалып — сызгъырып



1. Шиирни ифадели окъунъыз.
2. Къартана насыл девир акъкъында икяе эте?
3. Йыл мевсимини шаир насыл сёзлернен тарифлей?
Окъунъыз.
4. «Айя-ай» — деп йырлангъан йырлар насыл адланалар?



Шиирден антоним сёзлерни тапып, дефтеринъизге язынъыз.



53-юнджи дерс

НАВРЕЗ БАЙРАМЫ

Баарь куньлеринден бири эди. Селим къартбаба торунларыны янына топлады да, олардан:

— Дюньяда энъ къуванчлы куньлер — насыл куньлер?
— деп сорады.

— Энъ къуванчлы кунь — анам манъа Саре къокъланы багъышлагъан кунь, — деди еди яшында Айшечик. — Онынъ адыны озюм къойдым — сачлары сары.

— Э-ге, аман таптынъ айтмагъа шей... Энъ къуванчлы куньлер байрам куньLERİ, — деди 10 яшында Али. —

Байрамда эр кес гузель кийине, мусафирлер келе, эр кес шенълене.

— Догъру, меним тайым, байрам куньлери энъ къуванчлы куньлердир. Шунынъ ичюн де онъа байрам дегенлер, — деп къартбаба Алининъ башыны сыйпады.

— Я бизде насыл байрамлар бар, билесинъизми?

— Мен билем, — деди Али. — Къурбан байрамы, соң... соң... — девам этеджек олды, амма хатырлап оламады.

— Мен билем, бу — Ораза байрамы, — деп къошулды Айшечик. — Былтыр анамнен берабер мен де ораза туткъан эдим.

— Аферин, къызы! — деп къартбабасы Айшечикни къучакълап опти.— Догъру, балалар, бутюн мусульманларнынъ ве бизим де энъ буюк байрамларымыз Ораза ве Къурбан байрамларыдыр. Амма бизде даа башкъа байрамлар да бар: Наврез байрамы ве Хыдырлез байрамы. Мына бир къач куньден Наврез байрамы оладжакъ. Келинъиз, мен сизге Наврез байрамы акъкъында икяе этейим.

Наврез байрамы, балалар, энъ эски байрамлардан биридир. Бу байрам бизге Иран мемлекетинден кельген. Анда Наврез байрамыны дюньяда даа Ислам дини пейда олмаздан бинъ йыллар эвель япып кельгенлер. Ислам дини кельген соң, бир чокъ мусульман халкълары да бу байрамны къайд этип башлагъанлар.

Алим адамлардан бири Пейгъамберимизге баҳшыш йибере. Бу, Наврез байрамы ичюн азырлангъан эльва экен. Мухаммед пейгъамбер: «Бу недир?» — деп сорай. «Бу Наврез», — деп джевап берелер онъа. «Я, Наврез дегени не?» — деп сорай о. «Бу Иранда яшагъан аджем халкъынынъ энъ буюк байрамы», — дейлер онъа. Пейгъамбер озюнинъ якъын адамларынен ве талебелеринен берабер эльваны ашайлар. Пейгъамбер

эльваны пек бегене ве: «Эгер эр кунь Наврез олса, бизге не яхшы олур эди», — дей.

Байрамның ады, яни Наврез сөзю де бизге Ирандан кельген. Манасы янъы кунь, янъы йыл, йыл башы демектир. О вакъытларда Янъы йыл январь 1-де дегиль, март 21-де башлана экен. Шуның ичюн мартның 21-инджи куню байрамгъа чеврильген.

Наврез байрамының манасы бизде даа зияде кенишлеген. О — эм Янъы йыл байрамы, эм баарь байрамы, эм койлюперниң тарлада, чөльде чалышып башлагъянлары, эм де бир-биринен дарылгъан инсанларның акълашув, достлашув байрамы ола. Не гузель я?!

— Мен билем, къартбаба, байрамда эр кес бир-бирине бахшыш бере, мусафирликке барапар. Анам, бабам бизни де алып барапар. Пек къуванчлы ола.

— Аферин, оғылум! Сен биле экенсинъ, — деп макътады къартбабасы Алини.



1. Селим къартбаба торунларына насыл суаль берди?
2. Айше ичюн энъ къуванчлы кунь не куню олгъан?
3. Али насыл къуванчлы куньлерини хатырлай?
4. Бизим халкъ насыл мусульман байрамларыны къайд эте?
5. Ораза ве Къурбан байрамлары сизинъ коюнъизде (шөэринъизде) насыл кечириле?
6. Наврез байрамы халкъымызгъа не ерден кельген?



Бири-биринъизге Наврез байрамы акъкъында суаль-джевап берип, субет джумлелерини дөгъру интонациянен теляффуз этинъиз.



Сонъ Селим къартбаба икяесини девам этти:

— Наврез байрамы шойле япыла.

Байрамдан бир къач кунь эвель къадынлар эвлерини темизлейлер, джыйыштыралар, акълайлар, чамашыр ювалар, азбарны сипирип темизлейлер. Эвде, азбарда керекмеген шейлерни чыкъарып ташлайлар, балаларына янъы урбачыкълар тикелер. Бу байрам койлерде тарла ишлери башлангъанынен багълы олгъяны ичюн эркеклер сабангъа, яни ер сюрьмеге азырланалар, керек алетлерини тамирлейлер, янъыларыны тапыштыралар.

Арфе куню эр эвде чешит татлы емеклер, къавалтылар, эльвалар азырлана, кобете пиширелер. Акъшам балалар учер-бешер олып, эв-эвден Наврез йырыны айтып юрелер.

НАВРЕЗ ЙЫРЫ

Бисмилляхи вессафа,
Фахр-и алем Мустафа.
Умметине къыл вефа,
А за Наврези мубарек.

Наврез кельди — яз кельди,
Ордек кельди, къаз кельди.
Къушлардан аваз кельди,
А за Наврези мубарек.

Наврез кельди, корюнъиз,
Наврез акъкъын беринъиз.
Дженнет олсун еринъиз,
А за Наврези мубарек.

Сохталар кельди, къапунъ ач,
Къапунъ ач да, тёрге къач.
Сохталаргъа пара сач,
А за Наврези мубарек.

Ай тур, тотам, тур, тотам,
Беш-он пара бер, тотам.
Чеберлигинъ сер, тотам,
А за Наврези мубарек.

Бизден сизге — бу къадар,
Бильмем сизден — не къадар?
Не берсенъиз, къуванчтыр,
А за Наврези мубарек.

Эвде олгъанлар къапуларны ачып, балаларның йырлагъаныны динълей, севине ве мемнюн олып, оларгъа мейва, къурабье, джевиз я да акъча берелер.

Байрам куню къартлар сабадан мезарлыкъны, къабирлерни зиярет этелер, къабирлернинъ этрафыны темизлейлер, олюлерге дуалар окъуйлар. Соң адамлар хасталарны зиярет этелер, мусафирликке бараптар, я да озылери мусафир къабул этелер.

Оғланчыкълар ве кызычыкълар кене, топ-топ олып, эв-эвден байрам хайырлап, «Наврез йыры»ны айтып юрелер. Бунъа олар «Сары эчки», «Къара тавукъ» йырларыны да къошалар. Соңра балалар топлагъан татлы шейлерини эвде къардашларынен болюшип, севине-севине ашайлар, шенъленелер. Уйкенлер исе байрам кунюни насыл кечиргенлери, кимлернен корюшкенлери акъкъында лаф эте, хатырлайлар ве ярынки куньге, яни янъы йылның янъы баарь ишлерине азырланалар.

Иште, меним къоузчыкъларым, бизде Наврез байрамы бойле кечириле.

Риза Фазыл

БААРЬ

Мартнынъ йигирми биринджи кунюнде ер юзүнде куньдюз иле гедже мусавий дереджеге келелер. Дюньянынъ бир ягында он эки saat айдынлыкъ, дигер ягында он эки saat къаранлыкъ укюм сюре. Шиддетли къыш бите, летафетли баарь башлай. Кунеш зияларынынъ кучю арта. Къар йымшай, эв сачакъларындан саркъып тургъан буз сырғылары ирип, суvu ерге тамгъанда, торгъайлар онынъ астында ювуналар. Изанларда экинлер ешере.


Шамиль Алядин



мусавий — тенъ
летафетли — дюльбер, назик



1. Шаир ве языджылар озы эсерлеринде баарь мевсими не айрында янашалар: сукъланалар, шерефлейлер, рухланалар. Бу дуйгъуларны исбатланызыз, икяелерден мисаллер кетиринъиз.
2. Наврез байрамы къайсы айда кечириле?
3. Гедже ве куньдюз не вакъыт мусавий дереджеге келе? Кимнинъ эсеринде бу акъкъында икяе этиле?
4. Баарь акъкъында окъугъан шиир ве икяелер сизде насыл теэссуратлар къалдырды? Эгер ресимнен тасвирлемек керек олса, баарьни насыл ренклернен тарифлер эдинъиз?
5. Ашагъыдаки джумлелерни дефтеринъизге язынъызыз. Баарь акъкъында шиирлерни белли къырымтатар шаирлери язды:
Ашыкъ Умер — «...»;
«Къырымнынъ баари» — ...;
Зейтулла Албатлы — «...»;
«Джанымдан азизим, козюмде нурум» сёзлеринен ...
«Ана» шири башлана.



ЧЕТЭЛЬ ХАЛКЪ АГЪЫЗ ЯРАТЫДЖЫЛЫГЪЫ ВЕ ЭДЕБИЯТЫНДАН



55-инджи дерс

АЛУШТА ГЕДЖЕ

Салкъын ельчик эсти яваш. Дюнья шеми
Чатырдагъга урулды да парчаланды,
Къаяларны алландырып, сёнип къалды,
Орталықъны дым къаранлықъ сарып алды.

Гедже басты. Къаарды дагъ орькечлери.
Вадийлерде ирмакъ сеси эшитиле,
Багъчалардан мис-гъамбер хош къокъу келе, —
Эзгин-эзгин йырлай вадий чечеклери.

Адам Мицкевич

ЧАТЫРДАГЪ

Титреп, санъа седжде этем, улу Дагъ!
Эй, сен, Къырым гемисининъ диреги,
Сен — дюньянынъ минареси, юреги,
Бутюн дагълар падишасы, Чатырдагъ!

Эй, Чатырдагъ, сен эп сукют сакълайсынъ,
Тёпемизде кунеш кулип бакъса да,
Я да явур эвимизни якъса да.

Адам Мицкевич



сукют сакълайсынъ — **мында:** индемейсинъ
дагъ орькечлери — **мында:** дагъ уджлары



1. Шиирлерни, уйгъун кельген къыскъа ве узун токътавларгъа риает этип, ифадели окъунъыз.
2. Шиирлернинъ мевзусыны бельгиленъиз.
3. Адам Мицкевич Къырым кошелерини тарифлекендө, насыл дуйгъуларны ифаделей?
4. «Эзгин-эзгин йырлай вадий чечеклери» — деген сатырларны бегендинъизми?
5. Чатырдагъны шаир неге ошата, ненен къяслай? Бегенген шиирни эзберленъиз.
6. **Дагъ** сёзю не ичюн шиирде буюк арифнен язылгъан? Шаир дагъгъа насыл мунасебетте булуна?





ТИТИС ПАПИЙЧИК

Яз маали. Чёллерде әнди чавдарлар сааргъан, чалыңгъан пиченлер кебенлерге топлангъан.

Чевре четинде терен улукълар олгъан эски эв кунешке къаршы турға. Эвнинъ диварындан сувгъа баргъандже

къампалар осе. Бу къампалар оқъадар буюк ки, оларның япракълары тюбюнде уфакъ балалар гизлене әдилер.

Къампалар арасында, орманда олгъаны киби, тынч ве титис әди. Папий мында озь йымырталары устюнде күлюк ята әди. Энди чокътан күлюк яткъанындан, баягъы безген әди. Ниает йымырталарның къабукълары чатлады. Папийчиклер къыбырдашты, къабукъыны чёкчюледи ве башчыкъларыны узатып чыкъардылар.



— Пип, пип! — деди олар.

— Кряк, кряк! — деп джевапланды ана папий.

Папийчиклер къабукъларындан чыкъты, этрафларына козь кездирип, къампаларның ешиль япракъларына бакътылар. Аналары оларгъа кедер этмеди: ешиль тюс козь ичюн файдалы бир шейдир.

— Вай, бу дюнья не къадар буюк экен! — деди папийчиклер.

Эльбет де буюктир! Къабукълары ичинде ятқанда, тарлыкъ эди, шимди исе боллукъкъа бакъ!

Аналары балаларындан сорады:

— Дюнья дегенлери тек бу ерdir беллейсизми? Ёкъ, дюнья дегенлери багъчаның о тарафына узанып кете ве чёллергедже бара. Лякин анда мен озюм де олмадым... Сонъ, насыл, эпинъиз чыкътынъызмы? — деп сорады, о, аякъкъа турып. — Ёкъ, даа эписи чыкъмагъан, энъ буюк йымырта олгъаны киби туралар... Тезден чыкъса экен. Папий кене ерине отурды.

Ахыры, буюк йымырта да чатлады. Папийчик къабукътан сюйрелип чыкъты. Лякин бу папийчик пек балабан ве титис эди! Папий, онъа бакъып, шойле деди:

— Къаардан зияде балабан! Меним балаларыма асла да ошамай. Бу бириси кок тюсте. Барып да кокюш баласы олмасын!

Эртеси куню ава пек яхшы олды. Папий озюнинъ аиласинен якъындаки улукъкъа кетти. Папий, былт-былт этип, сувгъа тюшти, башыны ялыгъа чевирди, балаларыны чагъырды. Папийчиклер, чокъ тюшюнип турмадан, бири-бирининъ артындан сувгъа тюштилер.

Сув оларның башларыны ортседе, тезден сув устюне атылып чыкътылар ве ялдап кеттилер. Атта кок тюс титис папийчик де олардан артта къалмады.

Ялыгъа келип чыкъкан папий, балаларына шойле деди:

— Балачыкъларым, энди меним пешимден келинъиз. Мен сизни къушлар аилесине косътермек истейим. Амма яхши бакъынъыз, барып да олардан бири устюнъизге басмасын. Мышыкълардан да сакът олунъыз! Олар къуш азбарына келип кирдилер.

Папийчиклерни бутюн къушлар бегендилер, тек бир энъ сонъунда йымыртадан чыкъкъан титис папийчикке ёл бермединдер. Оны, тек бир папийлер дегиль, тавукълар да чёкчюледи, къакъыштырды ве эриштирилдер.

— Бу бири — къарадан зияде балабан! — деди олар.

Догъгъанда, аякъларында шпорлары олгъан ве бунынъ ичюн де озюни эписинден устюн туткъан ата-кокюш къабарды-къабарды да, елькенли геми киби, папийчикниң янына учып кельди, онынъ козълерине бакъты ве къанатларыны къакъты, ачувиңдан тарагъы къып-къызыл олды. Заваллы папийчик не япаджагъыны, къайда гизленеджегини бильмей къалды. Бойле титис догъгъаны ичюн, оны бутюн къушлар куле!

Биринджи кунь мына бойле кечти.



къампа — ири япракълы от (рус.: лопух)



1. Метинни окъунъыз, мундериджесини озъ сёзлери-нъизнен икяе этинъиз.
2. Къушлар аилеси титис папийчикни насыл къаршыладылар?
3. *Кокюшниң тарагъы къызарды* — насыл таракъ акъкъында сёз кете?
4. Роллерге болип, метинни ифадели окъунъыз.



Къампаны Къырымда осюмликлер, отлар арасында расткетирмек мумкүнми? Онынъ реcмини япынъыз.



II

Бундан соң папийчикниң алы даа фена олды. Заваллыны бутюн күшлар күвалай эдилер. Атта къардашлары биле онъя:

— Баре сени мышыкълар ашаса эди, бешарет! — дей эдилер.

Анасы эки сёзниң бириnde:

— Козюме корюнме, къамыш аяқъ! — дей эди.

Папийлер оны тишлей, тавукълар чёкчюлей, күшларны беслеген къызычыкъ исе оны аягъынен къакъып иибере эди.

Ахыр-соңъу, папийчик даянамады. Къорадан секирди ве чыкъып кетти. Пытакълар устюндеки күшчыкълар, ондан урkip, учып кеттилер. «Мен титисим, онынъ ичюн менден къачалар», — деп тюшюнди папийчик.

О, эп чапты, чапты ве нияет кийик папийлер яшагъан буюк сазлыкъка барып етти. Геджесини анда кечирди. Заваллы пек ёргъун ве кедерли эди.


Эртеси куню сабасы юкъудан уянгъан кийик папийлер янларында янъы аркъадаш корип, ондан сорадылар:

— Сен насыл күшсынъ?

— Сен пек чиркинсинъ, — деди кийик папийлер. — Лякин бунынъ бизим ичюн эмиети ёкъ. Амма бакъ, бизнен сой-соп олмагъа тырышма.

Бойле шей папийчикниң акъылына да кельмеген эди. Онынъ бирден-бир истеги къамышлар тюбюнде яшамакъ ве сазлыкъ суву ичмелек эди.

Папийчик сазлыкъта эки кунь яшады. Шу куньлери анда эки дане кийик папий учып кельди. Олар да йымыртадан даа якъында чыкъкъанлар.



— Дост, бизни динъле, — деди олар, — сен пек худжурсынъ, санъа бакъмасы бизге шенълик бере. Бизнен яшап, учып юрьмеге истейсинъми?

Шу дақкъасы «Пиф! Паф!» давушлары къопты ве кийик папийлернинъ экиси де къамышлар тюбюне йыкъылдылар; сув къаннен къызарды. «Пиф! Паф!» — кене давуш къопты. Бу арада кийик папийлернинъ бутюн сюрюси къамышлар ичинден кокке котерильдилер. Атыш токътамады. Авджылар сазлыкъны чевре-четтен сарып алдылар, олардан базы бирлери сазлыкъ янындаки тереклернинъ пытакълары устюне ерлешкенлер. Кок тюслию тютюн тереклерни булут киби къаплап, сув устюнде яйылды.

Сазлыкъта авджы копеклери чапыштылар. Оларнынъ кескин-кескин урювлери эшитильди. Къамышлар ве ала-боталар о якъ-бу якъ салландылар. Заваллы папийчик, къоркъусындан, аз къалды олеязды. Башыны къанаты

астында сакъламакъ истеди, лякин тилини салындыргъан ве козълерини йылтыраткъан авджы копеги шу saat онынъ янына чапып кельди. Копек папийчикке бакъты, тишлерини къайрады ве кене чапып кетти.

«Токъунмады! — деди папийчик зорнен нефес алып. — Пек бешарет олсам керек, мени ашамагъа джийренді».

Папийчик, ав биткендже къамышлар тюбюнде пысып, къыбырдамайып ятты.

Атышлар тек акъшам устю тынды. Заваллы папийчик еринден турды, этрафына бакъты ве чёллер, тогъайлар ичинден чапып кетти.



1. Метинни окъунъыз, мундериджесини озы сёзлериңизнен икяе этинъиз.
2. Этрафтаки къушларнынъ папийчикке мунасебети насыл эди?
3. Метинден папийчикниң авджы копегинен корюшивини тарифленъиз. Не ичюн копек папийчикке токъунмады?



Бу парчаны окъугъанда, папийчикни аджымакъ дүйгүлары пейда олдымы? Озы фикирлеринъизни изаланъыз. Сизинъ омрюнъизде бойле акъсыз акъаретлемек аллары олдымы? Икяе этинъиз.



Алабота къайда осе (чёльде, дагъда, сув кенарында)?
Бу отнынъ ресмини япынъыз.



III

Акъшамгъа таба уфакъ ве эски бир эвге барып етти. Эв пек джарты эди: санарсынъ йыкъыладжакъ амма, къайсы тарафкъа йыкъылмасыны бильмей. Эвнинъ къапусы бир демириндөн айрылып, янтайып тура эди. Папийчик къапу арасындан ичери кирди.

Бу эвде бир къартыйчик озюнинъ бирден-бир тавугъы ве пардошынен яшай эди.

Сабасына пардош ве тавукъ папийчикни эследилер; пардош миявлады, тавукъ исе адакълады.

— Анда не бар? — деп сорады къартый ве айланып бакъты. Сокъурлыгъы себебинден, папийчикни семиз бир папий белледи. Оны озюнде къалдырмакъ къаарына кельди.

Заваллы папийчик бутюн кунь бир кошечикте пысып ве яныкъырап отурды. Куньлерден бириnde, къапу артынадже ачылып, одагъа тазе ава ве кунешнинъ айдын ярыгъы кирди. Буны корип, папийчикниң сувда ялдайджагъы кельди. Истеги пек буюк олгъанындан, бу акъта тавучыкъа да айтты.

— Тапкъан шей! — дей тавучыкъ. — Бош-бошуна отургъанынъдан, акълынъа чешит ахмакълыкълар келе.

Мен япкъаным киби, сен де йымырта къозла, я да пардош киби миявла, о вакъыт олмайджакъ шейлерни унутырсынъ.

— Ёкъ, башымны алып кетерим, гъалиба, — деди папийчик.

— Кетсенъ, яхши олур эди, — деди тавучыкъ.

Кетти. Сувларда ялдады, башыны эгип, сувгъа далды. Лякин этрафында килер оны күле ве къува эдилер, чюнки папийчик пек чиркин эди.

Куньлер кечти, кузь кельди; ормандаки япракълар са-
рардылар. Рузгяр оларны къопарып ала да, авада савура
эди. Сувукълар башлады, кок юзюни булутлар къаплады.
Дивар устюндеки къаргъа, пек яман ушюгенинден,
къарылдап башлады. Заваллы папийчикнинъ вазиети
агырылашты.

Акъшамлардан биринде, кунеш къонаяткъанда, орман
артындан бир сюрю адтайип къуш кокке котерильди.
Олар къар киби bem-beяз, узун ве дюльбер боюнлы
эдилер. Олар акъкъушлар эдилер. Труба сесине ошагъан
давушларынен багъырышып, кенъ къанатларыны
къакъып, сувукъ тогъайлардан денъиз артларына,
сыджакъ диярларгъа учып кете эдилер.

Олар пек юксек котерильдилер. Заваллы папийчикни
бельгисиз бир теляш сарды. Сув ичинде айланчыкъ киби
бурулып, бойнуны узатты ве ойле бир кескин эм де худжур
сесинен къычырды ки, давушындан тап озю къоркъты.
Адтайип къушлар козьден гъайып олгъан соңъ, папийчик
кене сувгъа далды, сув устюне котерильди, лякин бу
арекетлерни не ичюн япкъаныны озю де бильмей
эди. Учып кеткен къушларнынъ адларыны да, къайда
учкъанларыны да бильмей эди, лякин оларны дюньяда
эр кестен зияде севди.



теляш сарды — эеджан сарды, къоркъты
пардош — эркек мышыкъ



1. Метинни окъуп, мундериджесини икяе этинъиз.
2. Не вакъыт папийчикнинъ ялдайджагъы кельди?
3. Акъкъушларны корыгенде, папийчикни насыл
дуйгъулар сарды?
4. Къушларнынъ къайсылары сувда, къайсылары
къарада яшайлар?
5. Не ичюн папийчик къартийчикнинъ эвинде яшамагъа
къалмады?

6. Тавучыкъ папийчикниң теклифини не ичюн ахмакълықъ деп сайды?

7. Не ичюн папийчик акъкъушлар акъкъында ич бир шей бильмей оларны эр кестен зияде севди?

8. Парчадан кузь левхасыны тарифлеген сатырларны сечип окъунъыз.

9. Кырымда кышламагъа къалгъан күшлар акъкъында икяе этинъиз.



59-ындыхы дерс

IV


Шу йылды кыш пек сувукъ олды. Сувның текмил бузламамасы ичюн, папийчиктыныш алмадан ялдамагъа меджбур олды. Лякин онынъ ялдагъан сув ёлагъы кунь-куньден тарлашты, чюнки энди аяз сувукълар башлагъан эди.

Шу къатты кышта папийчикниң башына кельген бутюн беляларны, бахытсызылықъларны икяе этмесининъ чареси ёкъ.

Ниает, ер юзюни кене кунеш кыздырды. Къарылгъачлар йырлап башладылар. Баарь къайтып кельди.

Папийчик, бутюн кыш дурагъы олгъан къамышлар ичинден чыкъып, учып кетти. Онынъ къанатлары эвелькинден чокъ къуветли эдилер. Бу къанатлар оны тез-тез учурыйп, огге дөгъру алышп кеттилер. Бакъса, буюк бир багъчаның ичине келип къонгъан. Алма тереклери чечекке бурюнген, эрылгъан озюнинъ къокъулы салкъымларыны айланчыкъ арыкъының устюне салындыргъан. Мында пек яхши эди, этрафтан баарь къокъусы келе эди.

Бирден сыкъ къамышлыкъ ичинден учъ дане адтайип акъкъуш ялдап чыкъты. Олар олдукуча енгиль ялдай



эдилер, дерсинъ сув устюнден тайып кетелер. Папийчик оларны таныды ве юргини насылдыр бир гъам сарып алды.

«Шу ири күшчыкъларның янына учып барайым. Ола билир, бойле бир бешаретлигимнен оларның янларына баргъаным ичюн мени чёкчюлөп ольдюрирлер. Ольдюрселер не олгъан! Папий ве тавукъларның тишлемелериндөн, кышның сувукъ ве ачлыгъыны чекмектен эйиси оларның котегинден олейим».

Папийчик сувгъа тюшти, аджайип күшларгъа дөгъру ялдады. Олар оны корыгенлеринен, къанатларыны къакъып, онъа якъынлаштылар.

Заваллы папийчик башыны эгип:

— Ольдюринъиз мени! — деди.

Шу арада папийчик сув ичинде озюнинъ суретини корьди. Ёкъ, шимди о эвельки кок тюслю титис папий дегиль де, bem-beяз акъкъуш эди. Буюк акъкъушлар оны сарып алды ве башларынен сыйпап башладылар. Багъчагъа

балалар чапып кельдилер. Олар акъкъушларгъа отьmek парчалары ташладылар. Олардан энъ кучюги:

— Бакъынъыз, янъысы учып кельген! Янъысы учып кельген! — деп багъырды.

Балалар пек къувандылар ве ялыгъа ана-бабаларыны чагъырдылар. Буюклер ве балалар ялыда къайнашып, сувда ялдагъан бу ири, bem-beяз къушларны сейир эттилер. Оларнынъ эписи бир фикирде эди:

— Янъы акъкъуш эписинден яхши! Энъ тегиз эндамлысы, энъ дюльбери янъы акъкъуштыр!

Къарт акъкъушлар яш алдында озылерининъ кибирли боюнларыны эгдилер. Яш акъкъуш исе утанды, шунынъ ичюн де башыны къанаты астына сокъты. Озюнинъ кечмишини, эр кес оны кульген, титис бир папийчик олгъян вакъытларыны хатырлады. Мына онынъ къанатлары кене шувулдады, дюльбер боюны огге узанды ве коксунден къуванчлы бир давуш къопып чыкъты.

Ханс Кристиан Андерсен



1. Папийчик, осип буюгендже, насыл бир азаплар корип кечирди?
2. Азбардаки къушлар папийчикни не ичюн хорладылар?
3. Аджеба, олар титис папийчик ким олгъаныны не ичюн анъламадылар?
4. Акъкъуш озюни не вакъыт бахытлы ис этти?
5. Масалнынъ эр бир болюгини айры-айры икяе этинъиз. Оларгъа серлева къоюнъыз.
6. Муэллиф къушларнынъ бирисини елькенли гемиге бенъзете. Онынъ адыны хатырлап айтынъыз. О къуш, керчектен де гемини анъдырамы? Онынъ ресмини япынъыз.
7. Не ичюн папийчик ялдагъан сув ёлагъы кунь-куньден тарлашты? Папийчик къышны насыл кечирди?



АХМАКЪ КЪАШКЪЫР

(къазах халкъ масалы)

Бир ахмакъ къашкъыр бар экен. Куньлернинъ бириnde о, эчкиге расткеле ве:

— Эчки, шимди мен сени ашарым, — дей.

— Не япайым, такъдирим шайдыр даа, мен разым, — дей. — Лякин мен пек арыкъ ве къартым. Эгер сен бираз беклемеге разы олсанъ, мен чапа-чапа эвге барып, санъа озюмнинъ къызыымны ёлларым. Онынъ эти тазе ве лезетли...

Къашкъыр разы ола, эчкини йибере ве озю чалылар тюбюне кирип ята. Эчки исе, сюрюге чапып барып, вакъианы чобангъа айта. Чобан таягъынен къашкъырны яхши этип котеклей. О, зорнен къачып къуртула.

Экинджи кересинде къашкъыр къоянгъа расткеле.

— Къоян, мен шимди сени ашайджагъым, — дей къашкъыр.

— Не япайым, башымнынъ язысыдыр даа, — дей къоян.

— Тек ольмезден эвель манъа ойнамагъа изин бер.

Къашкъыр разы ола. Къоян къашкъырнынъ этрафында айланып ойнап башлай. Ойнай ве, кеткен сайын, балабан тёгерек япып, бильдирмеден къачып кете. Къашкъыр кене ашсыз къала.

Чёль ичинде авланып юре. Бакъса, бир ат отлап юре. Къашкъыр онынъ янына келип:

— Ат, шимди мен сени ашайджагъым, — дей.

— Яхши, — дей ат. — Тек риджа этем, къуйругъымдан ашап башла, башымнен исе мен бираз даа отлайым.

— Яхшы, — дей къашкъыр ве, атнынъ артына кечип, къуиругъына якъынлаша.

Ат оны арт аякъларынен ойле къакъыштыра ки, къашкъыр шу ерде джан бере.



1. Масалнынъ эсас фикрини ифаделенъиз.
2. Не ичюн къашкъыр бойле алгъа къалды?
3. **Баш язысы, такъдир** бу сёзлерни бир маналы деп, саймакъ мумкюнми?
4. Къашкъыр акъкъында даа насыл халкъ масаллары билесинъиз?



61-инджи дерс

ГУЛЛИВЕР ДЕВБИЧИМЛИ АДАМЛАР АРАСЫНДА

Мен девбичимли адамлар арасына насыл тюштим


Меним Лилиптиядан къайтып кельгениме эки айдан зияде вакъыт кечмеди. Мен эвде раат, ич бир вакъиасыз яшадым. Лякин раат яшав меним кейфиме уймай эди. Мына мен янъыдан гемиге миндим ве узакъ сеяткъа кеттим.

Ель бирден токътады ве орталықъны бус-бутюн сакинлик сарды.

Капитан:

— Бу — яхшылықъка дегиль, боран беклемек мумкюн, — деди.

Эм акыкъатен, экинджи куню биз ачыкъ деньизде ялдагъанда, къоркъунчлы боран къопты. Деньиз



шувулдамагъа башлады. Бизим елькенимиз патлады. Биз артықъ гемини идаре эталмадыкъ. Ель бизни къайдадыр алып кетти.

Учь куньден соңъ, боран тынды. Огде къара корюнди. Биз татлы сув къыдырмагъа къаар бердик. Гемиден баркасны тюшюрдик. Баркасъа он матрос отурды. Он бириндиси мен эдим. Биз, сув алмакъ ичюн, янымызгъа бир метийчик алдыкъ ве ялыгъа кеттик.

Ялыда мен матрослардан айрылдым ве бир озюм эпpeiи вакъыт доланып юрьдим. Тап соңъунда ёрулдым ве айланып денъизге таба кеттим. Ялыдан даа узакъта экенде, матросларның баркасъа отурып, бар къуветлеринен куреклерни чекип, гемиге дөгъру кеткенлерини корьдим.

Лякин оларның артындан дев киби адымлагъан не экен? Мен козьлеримни сюрттим. Эбет, эбет, дос-догъру сув ичинде матросларның артындан балабан бир адам

кете. Онынъ бою бир къулле къадар бар эди. Сув онынъ тек тизине къадар келе. Девбичимли адам буюк адымлар ата ве матросларнынъ артындан етмек истей эди. Лякин кескин къаялар онъа арекет этмеге кедер эттилер. Матрослар энди узакълашкъан эдилер.

Мен къоркъудан арткъа къайттым. Меним огюмде къоюкъара орман тұра. Мен анда кирдим ве, бирден абайлап бакъсам, бу — орман дегиль де, арпа ызаны экен.

Эр бир арпа башагъынынъ узунлығы бизим тереклерниң бою къадар эди. Онынъ ичюн ызан манъа орман олып корюнди. Зорнен ызаннынынъ уджуна чыкътым ве бирден — къоркъудан, буз кесильдим. Бизим баркаснынъ артындан къувгъан девбичимли адам киби буюклиkte олгъан, башқа бир девбичимли адам дос-догъру манъа къаршы келе эди.

Девбичимли адам токъталды, чевресине бакъынды ве тап соңунда меним ерде олгъанымны абайлады. Эки пармагъынен мени котерип алды да, козюне якъын кетирди. Бу вакъыт о, меним къабыргъаларымны ойле бир сыйкъты ки, ағырысындан тап инъильдейджек къарагъа кельдим.

Мен эллеримни кокюсиме къавуштырдым, ялварувнен девбичимли адамға бакътым ве къалтыравукъ сеснен:

— Ялварам сизге, мени ынджытманызы, — дедим.

О мени эр бир якътан бакъып башлады. Мен артыкъ козь яшларымны тыялмадым ве онъа мени ағырткъаныны ишаретнен бильдирдим. Шу арада девбичимли адам мени кольмегининъ этегине къойды.

Девбичимли адамлар алкъаланып отурдылар ве дикъкъатнен мени козетмеге башладылар. Мен шляпамны чыкъардым ве шорбаджыгъа баш эгдим.

Мен онъа юксек сеснен:

— Эфендим, шимдилен соң мен сизинъ бойсуныңды хызметчинъизим.



къара — ер, топракъ
 къулле — юксек бина (рус: башня)
 abaylamakъ — козь ташламакъ, корымек
 тыялмадым — токътатып оламадым
 бойсуныджы — буюргъан ишлерни беджерииджи



1. Гулливер девбичимли адамлар арасына тюшмесине не себеп олды?
2. Къыскъадан, деньизде олып кечкен вазиетни тарифленъиз?
3. Матрослар не ичюн *татлы суө* къыдырмагъа кеттилер?
4. Къарада Гулливер кимлернинъ элине тюшти?



Къара, орман, арпа ызаны — якъын маналы сёзлерни бельгиленъиз.



62-нджи дерс

Бираздан соң къыралнынъ офицери чапып кельди.
 О, меним шорбаджыма:

— Къыраличе инсанчыкъны сарайгъа кетирменъизни эмир этти, — деди. — Къыраличе онынъ насыл бир джанаварчыкъ, олгъаныны корымек истей.

Шу saat мени сарайгъа алып кеттилер ве къыраличеге косътердилер.

Къыраличе:

— Инсанчыкъ, мен сенинъ сарайда яшаманъны истейим. Сен бунъа не дейсинъ? — деди.

Мен боюн эгип:

— Ханым, мен севинчнен сизнинъ янынъызыда къалырым, — дедим.

О куньден, къыраличе мени къайгъыра башлады.

Къыраличенинъ дюльгери манъа агъачтан уфакъ эвчик япты. Бу эвчикниң де тек бир одасы бар эди, — о да меним ятакъ одам эди. Бунынъ таваныны керек вакъытта котермек ве эндириш мумкүн олсун деп, петиллер къойгъан эдилер. Эвчикте къокъла краваты ве эки дане де урба долабы тура эди. Меним даям эр кунь саба таванны котере, краватны авагъа чыкъара ве оны джыйыштыра эди. Акъшам краватны ерине къоя ве таванны эндириш эди. Бундан гъайры манъа филь кемигинден эки кресложыкъ, эки масачыкъ ве бир де, шейлерими къоймакъ ичюн, сандыкъ япкъан эдилер. Мени бир ерден экиндже бир ерге авуштыргъанда, урулып бир ерини агъыртмасын деп, эвниң ичен бутюн ерине йымшакъ басма мыхлагъан эдилер. Мен къапугъа килит япмаларыны риджа эттим: мен гедже сычавуллар кирмесинлер деп, къоркъа эдим. Чиленгир килитке уфачыкъ бир анахтарчыкъ япты, бу ерниң халкълары омюрлеринде даа бойле анахтар корымегенлер. Бу анахтар меним джебиме зорнен сыгъа эди, лякин мен оны дайма янымда ташый, юкъламагъа яткъанда, къапуны килитлей эдим.

Манъа урбаны энъ индже йипек басмадан тиктилер. Эр алда о, бизим ёргъанлардан къалын эди. Ве мен бу янъы урбагъа чокъ вакъыткъадже, алышып оламадым.

Урба азыр олгъан соң, къыраличе, мени кийиндирип, озъ акъайы — къыралгъа косътермек ичюн, къыралнынъ иш одасына алышып кетти.

Къырал, зорнен манъа айланып:

— Ханым, не вакъыттан берли сиз бу джанаварчыкъка муаббетлик косътере башладынъыз? — деп сорады.

Къыраличе:

— Сиз янълышасынъыз, падишам, бу уфакъ инсанчыкъ, айны бизим киби, тюшюнджели бир барлыкъ, — деди.

Къыраличе мени язы масасынынъ устюне къойды ве

башыма келип-кечкенлерни къыралгъа айтмамны эмир этти. Мен айткъан вакъытта къырал манъа дикъкъатнен бакъа ве, бакъкъан сайын, даа зияде тааджиплене эди. Манъа ойле корюне эди ки, о, меним айткъанларыма чокъ инанмай эди. Меним башыма келип-кечкенлер онъа зиядесинен тааджипли корюне эди.

Къырал озь девлетининъ энъ акъыллы учь адамыны озюне чагъыртты. Бу эфендилер мени лупа аркъалы дикъкъатнен бакътылар ве, нетиджеде, меним дюньяда энъ бичаре бир барлыкъ олгъанымны, къаарлаштырдылар.

Олар:

— О, чокъ чапамай, терекке тырмашмагъа бильмей, ерде юва къазалмай. О, насыл этип яшай ве ненен кечине экен, меракълы шей? — дедилер.


Манъа агъызымыны ачмамны ве тишлеримни косътермемни эмир эттилер.

Акъыллы адамлар:

— Онынъ тишлери тыпкъы бизим тишимиз киби тизильген, — деп къыймет кестилер. — Лякин озюне ашны насыл тата экен? Сычан бу инсанчыкътан он кере къуветлидир. Мышикъ оны озь панджасынен эзе билир. О, чешит боджеклер ве къуртчыкълар ашап кечинсе керек, — дедилер.

Янъыдан меним ким экенимни ве къайдан пейда олгъанымны тюшюнип башладылар. Лякин акъыллы адамлар, насыл ойланса ве не къадар да озълерининъ акъыллы башларыны ёрсалар да, меним акъкъымда къатты бир шей айтып оламадылар.

Къырал чырайыны сыйты ве акъыллы адамларны эвлерине къувып къайтарды. О, меним айткъанларым дөгъру олгъаныны анълады, онынъ акъыллы адамлары исе узакъта, денъизнинъ о тарафында тыпкъы мен киби



уфакъ инсанлар яшайдырлар, деген фикир акъылларына биле кельмеди.

Къырал озь къадынына:

— Бу тааджипли инсанчыкъны къайгъырманъызыны истейим. Барсын, о, меним сарайымда яшасын ве ич бир шейге ихтияджы олмасын, — деди.

Къыраличе мени чокъ севди ве эр кунь озюнен берабер уйлелик ашамагъа чагъырды. Меним масачыгъымны онынъ сол тирсеги янына къоя эдилер. Мен масачыкъ башына отура, кумюш чин чанакълардан ашай эдим.

Къыраличе:

— Сенинъ савутларынъ бала оюнджакълары сатылгъян тюкянлардаки къоқъла сервислерине ошай, — дей эди. Дая, эр вакъыт, аштан соңъ, меним савутларымны юва ве, оларны кумюш къутугъа къойып, дайма озь янында алып юре эди.

Мен азар-азар девбичимли адамларгъа алыштым ве атта оларнен достлаштым. Оларнынъ эписи манъа муляйим ве саф гонъюлли эдилер.



дая — кичик балаларнынъ тербиеджиси



1. Не ичюн Гулливериджанаварчыкъабенъзеттилер?
2. Гулливер къыралнынъ сарайында насыл омюр кечиргенини тарифленъиз.
3. Гулливер, джебине сыгъмагъан анахтарнен, къайсы масалнынъ къараманыны сизге хатырлата?

Чокъ юрген, чокъ билир — бу аталар сёзю къараманларнынъ ангисине келишир?



Кезинмеге чыкъкъан вакъытларда меним башыма кельген белялар акъкъында

Меним сагълыгъым яваш-яваш тюзельди. Да я мени, ава алсын деп, сыкъ-сыкъ кезмеге алып чыкъа эди. Къыралнынъ дюльгери мен ичюн айрыджа бир ёл къутусы япты. Къутунынъ пенджерелери тельнен тарттырылгъан, кенарларына исе эки къавий тогъа пекитильген эди. Да я, бу тогъаларгъа къайыш кечире де, белиндеки къушагъына тюймелей эди. Соңь биз, арабагъа отурып, кезмеге кете эдик.

Базы вакъыт дая къутуны арабаджыгъа бере, о, да къутуны тизине къоя эди. Мен де о пенджереден, де бу пенджереден бакъып, сокъакъта олгъан эр шейни коре эдим. Къутуда меним ёл ятагъым, эки скемле ве бир де масам тура эди. Буларнынъ эписи табангъа пек яхшы этип пекитильген эдилер. Тавангъа асувлы чильтер салынджакъ бар эди. Мен силькинювден ёрулгъан вакъытта, чильтер салынджакъкъа минип ята эдим ве, салынджакъта саллангъан киби, саллана эдим.

Мына биз даянен шеэрниң эң буюк сокъагъындан кетемиз. Сокъакъынынъ эр эки тарафында да буюк эвлер тура, эр бир тарафта бир чокъ халкъ юре эди. Мына балыкъчылар келелер ве базаргъа буюк кит балыкълары кетирелер. (Бу ерниң факъырлары кит балыгъындан балыкъ шорбасы пиширелер. Кит балыгъынынъ эти пек дамсыз, лякин пек уджуз эди). Мына къыралнынъ атлылары кетелер. Олар арбий талимге ашыкъалар. Атлы девбичимли адамлар мейданлыкъында барып еттилер ве, бирден-бир комandanen къылышларыны чыкъарып, авада салладылар. Баш устюнде къылыш ялтырагъанда, санки он бинъ яшын бир кереден яшынлады.

Бир кере меним устюме шайн къушу атылды, эгер де мен ондан чалылар арасына сакъланмагъан олсам, эбет де, о, мени панджаларынен сыйкып алып кетер эди. Бир кере де, мен bogъazыма къадар эрлен юvasына тыгъырланып кеттим ве бутюн урбаларымны былаштырыдым. Уфакъ къушлар менден асла къоркъмай эдилер. Олар чокъусы вакъыт меним янымда, къурт-къырмыскъа къыдырып, секирише эдилер. Акълымдадыр, бир шейге ярамагъан къара тавукъынъ бириси, зияде арсызланаракъ, манъа сабалыкъ ашамакъ ичюн дая берген бир парча локъумны къолумдан чокъып алгъан эди. Мен ондан озь локъумымны аладжакъ олгъанда, къара тавукъ манъа айланды да, агъырттырып къолумны чокъуды. Бойледже, манъа озь сабалыкъ ашымнен сагълыкълашмакъ керек олды.

Атта кийик балкъуртлар биле менден къоркъмай эдилер. Куньлерниң бириnde мен, ачыкъ пенджерениң янында отурып, татлынен отьmek ашай эдим. Бирден къулакъ тындырыджы зувулты эшиитtim. Зан этерсинъ, меним пенджеремниң тюбюнде йигирми дане къавал чала эдилер. Эвге бир къач дане кийик балкъурт кирди, оларның эр бири бир чиль къадар бар эди. Кийик балкъуртлар татлыгъа далдылар ве меним отьмегимни парча-кесек этип алдылар. Бар кучълеринен зувулдап, эвнинъ эр бир тарафына уча эдилер. Мен бу арада къылышымны чыкъардым ве джиренч къуртларгъа къаршы атылдым.



тогъа — демир ильмек
эрлен — къуш (рус.: орлан)
чиль — къуш (рус.: куропатка)



1. Гулливерни насыл этип кезиндире эдилер? Икяе этинъиз.
2. Кезинмеге чыкъкъан вакъытларда Гулливерниң къушлар ве кийик балқұртларнен олгъан мунасебетлерини тарифленъиз.



Ашагъыда берильген сөз бирикмелеринен джумлелер тизип, дефтерге язынызы: *арбий талим, шаин панджалары, зувулдалап учмакъ*.



64-юнджи дерс

Мен къыраличени насыл эглендире эдим

Къыраличениң мусафирлер одасында буюк пианино түра эди. Мен, бала экенде, азачыкъ музыка чалмагъа оғренген эдим, шимди исе акълыма, озь аваларымнен къыраличени эглендирейимчи, деген шей тюшти. Мен, бойле буюк музыка алетинде чалмакъ ичюн, пек яман уфакъ эдим. Мына мен о вакъыт не тюшюндим.

Мен озюме къавий ағаңттан эки дане ағыыр сопа кестим. Сопаларның къалын башларыны, клавишлерни бозмасын деп, сычан терисинен сардым. Пианиноның янына балабан скемле кетирдилер ве мени оның устюне котерип къойдылар. Мен скемле устюнде, артқъа алдъа чапып, сопаларнен клавишлерге ура эдим. Мына бойле айнеджиликнен, мен къыраличеге бир-еки инглиз авалары чалдым. Къыраличе чокъ хошланды. Лякин мен, тез чапувдан себеп, зорнен нефес ала эдим. Музыка манъа къолайгъа отурмады.

Къыраличениң озю башкъа бир эглендже тюшюнип чыкъарды.

Бир вакъыты о, манъа:

— Инсанчыкъ, сен къайыкъны идаре этмеге билесинъми? Бу сенинъ сагълыгъынъ ичюн пек файдалыдыр, — деди.

Мен:

— Ханым, къайыкъны идаре этмеге билем, лякин меселе шундан ибарет ки, мындаки къайыкълар меним ичюн къаардан зияде буюклер, мен оларны башарып оламам, — деп джевап бердим.

Къыраличе:

— Сенинъ бу къасеветинъе ярдым этмек къолай, — деди.

О, шу куню дюльгерге оюнджакъ киби дирекли къайыкъ ве эм де курек япмакъны эмир этти. Он куньден соң, къайыкъ азыр олды. О, пек дюльбер эди ве мен оны бир бакъышта бегендим. Бундан соң дюльгер буюк бир текне япты. Акъмасын деп, текнени пек яхшы этип зифтледилер ве оны буюк бир одагъа къойдылар. Текнеге сув толдурдылар ве къайыкъны да онынъ ичерисине тюшюрдилер.

Эр шей азыр эди. Мен къайыкъка миндим ве курек чекип башладым. Сарай къадынлары текненинъ этрафына топландылар. Оларнынъ базылары, ельпазелерини чыкъарып, саллап башладылар. Ель котерильди. Мен тез-тез елькеннى котердим, елькен къабарды ве къайыкъ тез-тез огге ёнеди. Къыраличе кульди ве хызметчилерине къайыкънынъ экинджи тарафындан уфюремелерини эмир этти. Мен елькеннى атикликтин авуштырдым, къайыкъны айландырдым ве алып къайттым. Меним бу атиклигиме эписи сукъландылар. Ялдавдан соң, дая меним къайыгъымны озь одасына алды ве, къурусын деп, оны мыхъка ильди.

Бир кере къайыкънен ялдагъанда, башыма бир беля кельди. Хызметчи текнеге сув къойгъанда, абайламай



сувнен бирге балабан бир бакъаны да текне ичине джиберген. Мени къайыкъыа минсеткенде, бакъа сув тюбюне сакълангъан экен, мен оны корьмедин. Лякин мен текненинъ ортасына ялдап кеткеним киби, бакъа меним къайыгъыма атылып минди ве меним башымнынъ устюнден арткъа, алдгъа атлап башлады. Мен курекни котердим де, бар къуветимнен бакъанынъ башына къакътым. Бакъа шу saat сув тюбюне кетти ве бир даа корюнмеди.



эглендирмек — вакъытны зевкълы,
шень кечирмек
хошланмакъ — мемнүон олмакъ, къуванмакъ
абайламай — корьмей, эмиет бермей



1. Гулливер къыраличени насыл этип эглендирдек олды? Къыраличе насыл эглендже тюшюнип чыкъарды? Учунджи шахыс адындан икяе этинъиз.
2. Текнени насыл макъсатнен изифтледилер?
3. Сувда ялдагъан къайыкъъа елькен не ичюн керек ола?
4. Къайыкъынынъ елькени къайда пекитиле?
5. Ялдамакъ ичюн къайыкъъа, елькенден гъайры, даа бир алет керек? Метинден араштырып, тапынъыз.
6. Метинде тарифленген эгленджелер сизде насыл теэссуратлар къалдырыды?



Берильген сёз бирикмелеринен джумлелер тизинъиз: *идаре этмек, ярдым этмек, хызмет этмек, эманет этмек.*



Дирекли къайыкъынынъ ресмини япынъыз. Мавы деньизде ялдагъан къайыкъынынъ елькенлерини насыл тюске боялар единъиз?



65-инди дерс

Мен девбичимли адамлар мемлекетини насыл терк эттим

Меним девбичимли адамлар мемлекетине тюшкениме энди эки йыл кечкен эди. Мен озы Ватанымны чокъ са-гъындым. Къыраличе мени не къадар севсе де, ве онынъ сарай кишилери де мени не къадар къайгъырсалар да, мен олар ичюн, тыпкъы оларнынъ озылери киби, акъикъий бир инсан дегиль де, кулюнчли уфакъ бир джанаварчыкъ

эдим. Бу мени пек яман ашшалай эди. Лякин мен не япа билир эдим? Меним Ватаным, меним дөгъмушларым ве достларым деңизнинъ о тарафында, узакъта эдилер ве бир даа оларнен корюшип оладжагъыммы, ёкъмы, бильмей эдим.

Учонджи йылнынъ башында кыралнен кыраличе сеяткъа кеттилер. Биз, даянен, оларнен бирликте кеттик. Олар мени ёлжулыкъта алып юре турған күтүмнен алдылар.


Биз деңиз кенарындаки буюк шеэрge кельдик. Мен сабырсызлыкънен деңизни корьмеге ашыкътым. «Ким биле, бу мени девбичимли адамлар мемлекетине чыкъарып ташлагъан деңиз, бельки не вакъыт да олса, мени кене озъ мемлекетиме къайтарыр?» — деп тюшюндим.

Хызметчи күтуны алды ве мени ялыгъа кетирди. Мен күтуны къая чыкъынтысына къоюлмасыны эмир эттим, хызметчини исе ювунмагъа джибердим. Күту бирден къоркъунчлы дирильдеди. Мен козюмни ачтым. Манъа, күту устюне пекитильген демир алкъадан тутып кимdir күтуны алгъан киби, кельди. Күту юксек котерильди ве, къоркъунчлы бир тезликнен, узакъларгъа кетти.

Бу, къартал олса керек, о, күтуны алып, оны къаялар устюне ташламакъ ичюн, алып кетедир.

Къарталлар къаплы бакъаларны ойле япалар. Олар къаплы бакъаларны таш устюне таштай да, къапыны кырып-кырып ашайлар.

Бирден күту о якъ-бу якъъа салланды. Устте тыныкъ урувлар эшитильди. Меним къарталымга башкъа къарталлар учып кельди, күтуны ондан тутып аладжакъ олдылар. Авада къавгъа башланды. Мен бирден күтунынъ къоркъунчлы бир тезликнен ашагъы дөгъру юварланғынны сездим. Меним нефесим тутулды. Пек яман къоркъунчлы бир чайпалув



олды ве къутуны гедже киби къаранлықъ басты. Мен къутунынъ денъизге тюшкенини, онынъ энди сувнынъ тюбюне кеткенини анъладым. Бир дақъкъа кечти. Къуту яваштан котерильмеге башлады. Чокъкъа бармадан, пенджеренинъ юкъарысындан ярыкъ корюнди.

Меним бахтыма, къуту пек къавий япылгъан эди, онынъ ичюн сувгъа тюшкенде, парланмады. Атта онъа сув биле пек аз кирди.

Тап соңунда, меним къутум насылдыр бир къатты шейге урулды. Къуту устюне аркъан ташладылар. Мен, оны демир алкъагъа кечиргенде, онынъ шатырдысыны эшиттим. Бундан соң меним къутумны котердилер ве негедир багъладылар. Мен янъыдан явлукъ багълангъан таягъымны чыкъардым ве ярдымгъа чагъырдым.

Тышарыдан кимнинъдир:

— Санки къутудан бирев багъыра, шашыладжакъ шей,
— деген сесни эшиттим.

Меним башымнынъ устюнден адымлар атлады ве, бир къач дақъкъадан соң, пенджеречиктен бирев эгильди:

— Эгер мында бирев олса, айтсын.

Мен:

— Манъа ярдым этинъиз, — деп джевап бердим. —

Мени бу зиндандан къуртарынъыз. Мени эр дакъкъа сув баса билир.

— Къоркъманъыз, сизнинъ къутунъыз гемиге багъланды. Бир дакъкъадан дюльгер келир ве, сизнинъ чыкъа бильменъиз ичюн, къутунынъ устюни пычар, — деген джевап эштильди.

Мен:

— Ич бир тюрлю дюльгер керекмей! — деп багъырдым.
— Пармагынъызын алкъагъа сокъунъыз да, тёпесини котеринъиз: о, ачыла.

Сес:

— Сиз акъылынъызын ойнаткъансыз, бир пармагымнен бутюн бир эв тёпесини котерип алмагъа, мен девбичимли адам дегилим, — деди.

Тезден эвнинъ тёпесини пычтылар ве мен уфачыкъ мердивенден когертеге чыкътым. Мени инсанлар сарып алдылар — олар, тыпкъы меним киби, адий инсанлар. Олар меним ватандашларым — англиялышлар эдилер.

Джонатан Свифт



когертке — къайыкъынынъ устю (рус.: палуба)




1. Гулливерни не ашталай эди?
2. Гулливер бу эсирликтен насыл этип къуртулгъаныны икяе этинъиз. Метинден, Гулливерниң әлеми, къайгъылы тюшүнджендерини акс эткен парчаны сечип окъунъыз.
3. Окъугъан эсеринъизни бегендинъизми?
4. Бегенген левханы икяе этинъиз.



Берильген сёз бирикмелерини къулланып, джумлелер тизинъиз: *дөгъмушларны сагъындым, демир алкъагъа кечирмек, ярдым эттим, ярыкъ корюнди.*



Гулливерниң сергүзештеринен багълы меракълы левханы ресим узъре тасвиrlenъиз ве къыскъа метинчик-нен тарифленъиз.



МАСАЛЛАР АЛЕМИНДЕ



66-нұжы дерс

АРСЛАН ВЕ ТАВШАН

Эр кес биле, Тавшанның севген ашы
Та эвельден-эзельден себзе олгъан.
Узун къулакъ къылыйның къарты-яши
Себзе тапса, севинип эсини джойгъан.
Гурь орманның четинде, бир бостанда
Къылый затның бириси себзе тапкъан,
«Кирт-кирт» этип, баягъы ашагъан да,
Къурсагъыны тойдурып, эвге къайткъан,
Гъарип къылый, севинип бу ягъмагъа,
Акъшам — саба, уйледе шенъ къатнағъан,
Бойлеликнен, себзели бол бостангъа
Ахыр-сонъу, яхшы бир ёл таптагъан.

Шойле куннинъ биринде... вай-вай, вай-вай!
Къылый гъарип не корьсюн, ёл устюнде
Ята эди конделен Арслан агъай.
Ачув-гъадап атеши бар козюнде.
— Арслан агъам, изин бер, отейим мен,
О тарафта, бостанда емегим бар.
Ачувланма, устюнъден кечайим мен,
Коресинъ де, таптагъан ёлум пек тар.
Изин берген кечмеге Арслан акъай,
— Оп-па, — дей де, тавшанчыкъ атлап кече.
«Къуртулдым», — деп къувана, арткъа бакъмай,
Сагъ-селямет бостангъа келип ете.
Себзе ашап тойгъан сонъ, къылый, вай-вай!
Эвге таба секирип, адым ата.
Бакъса, кене шу ёлда Арслан акъай
Кене шойле узанып, ёлда ята.
Тавшан гъарип къалтырай (дегиль шакъа)
Огге таба зар-зорнен адым ата.
— Арслан агъам, мумкюнми?.. — Арслан акъай:
«Оть!» — дегендай башыны къыбырдата.
Джоя эсини къуванчындан:
— Оп-па... — дей де, секирип кече Тавшан.



Бираздан соң байгъушым озюне кельген
Ве, артына чевирилип, шойле деген:
— Арслан агъам, ятасынъ нечюн бойле?
Хастасынъмы, агъачыгъым, ёкъса, сёйле.
— Корьмейсинъми къапкъангъа тюшкенимни,
Аякъларым эзилип шишкенини?
Джесюриим мен эм кучълюм, сагъдыр джаным,
Факъат билип оламайым, ким — душманым!
Шу ань тавшан пек яман юреклене,
Алсыз яткъан Арслангъа якъын келе.
— Вай-вай, вай-вай! — деп куле, — гъарипчиғим.
Джесюр эм де пек кучълю деп айтасынъмы?
Меним кечкен ёлумда ятасынъмы?!
Мына санъа, пезевенк! — дей де тепе.
Соң Арсланнынъ устюндөн юрип кече.
Тавшан ичюн къоюлгъан эди къапкъан,
Амма къутсуз Арсланнынъ къаны акъа.

Иса Абдураман



зат — шахыс
къутсуз — баҳтсыз



1. Масалны ифадели окъунъыз.
2. Тавшан не себептен бостангъа къатнагъан?
3. Не ичюн арслан ёлда узанып ята эди?
4. Къапкъан ким ичюн къоюлгъан?
5. Тавшаннанынъ арекетлерине насыл къыймет кесесинъиз?



1. *Къапкъангъа тюшмек* — шиирде расткельген бу ибаре, асыл манасындан гъайры даа насыл манада къулланыла билир?
2. *Байгъуш, гъарип* — бу сёзлернинъ маналары якъынны, чешитми?
3. Берильген сёз бирикмелеринен джумлелер тизинъиз: *эсини джойгъан, адым атты, пек юрекленди.*



КЪАПЛАН ВЕ ТИЛЬКИ (таджик халкъ масалы)

Бир кунъ тильки чытырман дагъ ичине кирип кете. Къаршысына къоркъунчлы къаплан чыкъа. Тильки къоркъа, къачаджакъ ола, лякин къаплан онынъ артындан чапа. Ана-мына тутаджакъ. Бири къача, бири къувалай — учурымлы дере башына келип чыкъалар. Айнеджи тильки токътап, агъламагъа башлай.

Къаплан, шашып, ондан сорай:

— Не ичюн агълайсынъ, тильки?

— Сизни коръген соңъ, бабанъызынъ хатырладым, — дей. — О, пек чабик, беджерикли эди. Энъ сарп дерелерден биле секирип, о бир тарафына кече тургъан эди. Мен беллесем, энди ич бир вакъыт бойле чевикликни корип зевкъланамам.

Къаплан ачувлана. Эр шейни унутып, тилькиге озъ усталыгъыны косътереджек ола ве шу дақъкъасы дереге секире... ве деренинъ ортасына барып тюше.

— Мен бойле оладжагъыны эвельден биле эдим, сиз озъ бабанъызгъа бенъземейсинъиз, — дей айнеджи тильки, ве озъ ёлуна кете.



1. Не себептен къаплан бойле вазиетте къала?
2. Айнеджи тилькининъ эткен ишлери акъкъында даа насыл масаллар билесинъиз? Икяе этинъиз.

АДАЛЕТЛИ КЪАДЫ (афгъан халкъ масалы)

Бир къызгъанч адам озъ кисесини джойгъан экен. Кисесинде исе юз кумюши бар экен. О, кисесини чокъ къыдыргъан, онъа пек янгъан, амма ойле де тапмагъан. Соң: «Кисемни тапкъан ве парамны манъа къайтаргъан адамгъа маҳраджына он кумюш бериrim», — деп, илян эте экен.

Иште, бир яхши адам шу кисени тапып, сарангъа къайтара.

— Энди манъа ишандыргъан он кумюшни бер, — дей о, сарангъа.

— Бу киседе юз он кумюш бар эди, — деп джевап бере саран, — шимди исе ичинде тек юз кумюши къалгъан. Демек, сенде къалгъан. Аладжагъынъны алдынъ. Менден даа не истейсинъ?

Кисени тапкъан адам къадыгъа барып, онъа эр шейни олгъаны киби айткъан. Къады сараннын чагъырып:

— Бу адамнынъ исессини не ичюн бермейсинъ? — деп сорай.

— Я о, бу кисе ичинден озъ исессини энди алды — деп джевап бере къызгъанч адам, — не ичюн мен онъа береджегим?

Къады кисени къолуна алып бакъты ве, эвель багълы олгъаны киби, багълап къойды. Соң сарангъа:

— Эгер кисенъ ичинде юз он кумюш олгъан олса, мында тек юз кумюш бар экен. Демек бу кисе сенинъки дегиль. Бар, озъ кисенъни къыдыр, буны исе кисе тапкъан адамгъа къайтар. Кисенинъ саibi тапылгъанда, о, онъа къайтарып берири, — дей.



маҳрадж — мужде
иссе — пай



1. Масалны роллерге болип, окъунъыз.
2. Саран байнынъ нефисхорлугъыны онынъ къайсы арекетлеринден анъладынъыз?
3. Къадынынъ макемеси адалетли олдымы?
4. Башкъа халкъ масалларынынъ бизим масаллардан фаркъы бармы?



Ялан, яланджылар акъкында аталар сёзлерини тапып, дефтеринъизге язынъыз.



68-инджи дерс

КЪАШКЪЫР НАСЫЛ ЭТИП ОТЬМЕК ПИШИРЕДЖЕК ОЛА (литва халкъ масалы)

Куньлернинъ биринде орманда къашкъыр адамны расткетире ве:

- Манъа да отьмегинъден берсе, — дей.
- Адам къашкъыргъа отьмегинден бере. Къашкъыр ашай ве тап яланып баштай, чюнки отьмек пек лезетли экен.
- Эр вакъыт меним де озъ отьмегим олмасы ичюн, не япмакъ керек, манъа да огretсе, — дей къашкъыр адамгъа.
- Яхши, — дей адам ве къашкъыргъа огretип баштай,
- Башта ер сюрьмек керек...
- Ерни сюрген соңъ, ашамакъ мумкюнми?
- Ёкъ. Ондан соңъ, богъдай сачмакъ кере.
- Сачкъан соңъ, ашамакъ мумкюнми?
- Ёкъ. О, осип етишкенини беклемек керек.
- Осип етишсе, ашамакъ мумкюнми?



— Ёкъ. Осип етишкен сонъ, джыйыштырып алмакъ керек.

— Джыйыштыргъан сонъ, ашамакъ мумкюнми?

— Ёкъ. Оны дегирменге алып барып, ун чектирмек керек.

— Я ун чектирген сонъ, ашамакъ мумкюнми?

— Ёкъ. Сонъра отьмек пиширмек керек.

— Я пиширген сонъ, ашамакъ мумкюнми?

— Мумкюн.

Къашкъыр тюшюне-тюшюне де:

— Бойле чокъ беклемек керек олса, мен яхшысы отьмек пиширмем. Бу вакъыткъадже насыл отьмексиз яшагъан олсам, илериде де шай яшарым, — дей.



1. Масалны роллерге болип окъунъыз.
2. Къашкъыр не ичюн отьмек пиширмектен вазгече:
а) беджериксиз; б) тембель; в) азыргъа дуваджы?
3. Масалдан муэллиф сёзлерини дигер иштиракчилерниң нуткъундан айырынъыз.
4. *Къуш ювасында коръгенини кутер.* Бу аталар сёзю бизим къашкъыргъа аитми?



Къырымтатар миллий емеклерининъ сырасыны девам этинъиз. Меселя: *кобете, пахлава, ...*

ТОРГЪАЙЧЫКЪ (масал)

Омюринде ильк кере учкъан торгъайчыкъ, этрафта корыген эр бир шей акъкъында анасындан сорай бере:

— Я бу не? Бу насыл шей?

Анасы онъа сабырнен ерниң не олгъаныны, от не олгъаныны, терек не олгъаныны, тавукъ не олгъаныны айрыджа анълата.

Торгъайчыкъ кокте нур сачып турған, топны коре ве:

— Ана, ана, я бу не? Я о — насыл шей? — деп сорай.

Баласынъ суаллеринден джаны сыкъылгъан торгъай:

— О, атештир! О да санъа не керек олды я? — дей ачувиен.

— Мен атешнинъ не олгъаныны бильмек истейим, — деп чивильдей торгъайчыкъ ве кунешке дөгъру учып кете. Кунешке якъынлашкъанда, къанатчыкълары янып башлагъаныны дуйгъан торгъайчыкъ, тез-тез артына къайта.

О, эеджаннен беклеп турған анасынъянына учып келе ве:

— Аначыгъым! Мен энди атеш не олгъаныны билем!
— дей.



1. Масалны роллерге болип, окъунъыз.
2. Торгъайчыкъ анасына насыл суаллер бере?
3. Масалда торгъайчыкъ атеш не олгъаныны насыл бильди?



Меракълана, къулакъ асмай, первасыз — берильген сёзлерден, къайсы бири торгъайчыкъынъ табиатыны ифаделей.



ВЕДАЛАШУВ (масал)

Абсемет акъай деген факъыр койлюнинъ бир эшеги ола. Бааръде эшекни сабангъа екип, ер сюре, язда берекетни, эшекке юклеп, шеэрge алып бара ве базарда сата. Къайткъанда, балаларына чешит өмеклер кетире. Къышта исе, эшегини чанагъа екип, дагъгъа кете, андан одун кетире. Бойледже, эшек Абсемет акъайнынъ къорантасында яшай ве дайма саибинен берабер чалыша.

Бир йылы, бааръде, тарлаларгъа ашерат ябырыла ве энди ешерип башлагъан экинни текмил ашап битире. Абсемет акъай озь тарласына сачкъан урлукълыкъ бөгъдайыны биле къайтарып аламай. Абсемет акъайнынъ къорантасында ачлыкъ башлай.

Абсемет акъай чокъ тюшюне. Лякин бу алгъа бир чаре тапып оламай. Балалары исе ачлыкътан, алсызлыкътан хасталанып башлайлар. Ниает, Абсемет акъай эшегини сатмагъа къарап бере ве оны базаргъа алып бара.

Ахыр соңу, эшегини озюне ошагъан факъыр койлюге учъ кумюшке сата. Эшек узакълашаяткъан саибине бакъып, кескин сеснен багъыра. Сеси Абсемет акъайнынъ юргине санчыла, вуджудыны титрете. «Ёкъ, барып эшегимни къайтарып алайым», — деп тюшюне. Лякин, эвде беклеп отургъан ач ве хаста балаларыны хатырлагъан соң, ёлуны девам эте.

Базардан керегини алып, эвге къайта. Ёлда арабагъа екильген эшегини коре. Бир тёпенинъ артында тура, еринден къыбырдамай. Янъы саibi исе багъыра, сёгюне, къамчыны саллай. Эшек еринден къыбырдамай.

— Не олды? — деп сорай Абсемет акъай, якъында келип.

— Бу эшекни о къадар макътадынъ, лякин къуйпанынъ бири экен. Не сёгюштен анълай, не де дёгюштен. Териси пек къалын, — дей саibi.

— Сен оны урдынъмы? — деп сорай Абсемет акъай.

— Урдым. Къыргъа котериледжекте, бир-эки силиштиридим, къыргъа тездже тырмашыр белледим.

— Сен оны урдынъмы? — деп сорай ондан, Абсемет акъай кене.

— Урдым, дедим де санъа. Пек къуйпалы экен эшегинъ.

— Я, айваннынъ да джаны бар. Сен онынъ джаныны агъырткъансынъ. Энди ондан афу исте!

Эшекнинъ янъы саibi айретте къала.

— Эшектен де афу истенилирми? — дей койлюге.

— Истенилир. Эгер афу истесенъ, арабанъны чекип алып кетер. Афу истемесенъ, ольдюрсенъ биле, еринден къыбырдамаз.

— Ондан насыл этип, афу истейджегим... инсан тилинден анъламагъан айван...

— Эшекми? Пек яхши анълай. Сыртыны сыйпа, охша. Къулагъына: «Афу эт мени» — деп айт.

Эшекнинъ янъы саibi онынъ сыртыны, башыны сыйпай, соңра къулагъына эгилеп яваштан: «Афу эт мени, эшегим», — деп фысылдай. Эшек яваштан еринден коче, артына-огюне бакъмай, арабаны къыр тёпесине дөгъру чекип, алып кете. Янъы саibi тез-тез араба артындан чапа.

Ёлнынъ чаталлангъан ерине кельгенде, узакътаки къыр устюнден къулагъына: «Иа!-иа!» деген давуш эшитиле. Бу, эшекнинъ сабыкъ шорбаджысы иле ведалашувы эди.

Эмир Фаикътэн



ябырыла — устюне ташлана
экин — сачылгъан бөгъдай
къуйпа — тербиесиз, табиатсыз



1. Масалны роллерге болип, ифадели окъунъыз.
2. Татлы сөз йыланны да ювасындан чыкъаргъан. Масалны окъуп, онынъ эсас фикрини аталар сёзюниң манасынен къыясланъыз.



Пиязламакъ, ялвармакъ, гонълюни алмакъ — берильген сөзлер ярдымынен джумлелер тизинъиз.



70-инджи дерс

БАЛА ВЕ АЮВ (масал)

Бир кунь койде эки бала
Къолларына сепет ала,
Ёлланалар дагъгъа тараф,
Ер емиши, мантар арап.
Орман — ешиль, ава — серин,
Къокъусы хош оленлернинъ.
Къушлар оте тереклерде,
Базылары эреклерде.
Балалар да шенъленелер,
Ойнай, куле, эгленелер.
Орманда чокъ джилек, мантар,
Сепетлерни толдураалар.
Эки дост шад чыкъа ёлгъа,
Ёл бурула сагъгъа, солгъа.
Кой де якъын дегиль, узакъ,



Балаларға ола тузакъ.
Гурь чалылыкъ, тар сокъакъта,
Оглерине аюв чыкъа.
О, адымлай, яваш-явш
Саргъуш киби, саркъыткъан баш.
Абдыраша балалар пек,
Илле чаре тапмакъ керек!
Бири аман къача четке,
Тырмаша тез къарт терекке.
О бири де юзю тёбен,
Ята ерге, санки ольген.

Аюв келе якъынына,
Бурун соза къулагъына,
Къокълагъан соң, кечип кете.
Бала тура, шукюр эте.

Теректеки досту тюше,
Мыскъыл эте эм илише.

— Аюв сенинъ къулагъынъа
Нелер айтты, сёйле манъа?
Санъа тиймей, индемеден
Къайда кетти аюв бирден?

— Айван — амма акъыл зады,
Къулагъыма фысылдады:
«Акъикъий дост агъыр куньде
Белли ола, бильчи сен де.

Достны ташлап къачкъан — яман,
Ёлдаш олма онъа ич бир заман».

Зиядин Джавтобели



1. Шиирни ифадели окъунъыз.
2. Балалар къайда ёл алдылар?
3. Оларнынъ оглерине не чыкъты?
4. Аюв баланынъ къулагъына нелер айтты?



1. Шиирниң соңунда берильген аталар сёзюни дефтеринъизге язып, эзберленъиз.
2. Достлукъ акъкъында даа насыл икметли сёзлер билесинъиз?



1. «Масаллар аленинде» болюгинде насыл масаллар-нен таныш олдынъыз?
2. Халкъ масаллары языджылар тарафындан язылған масаллардан насыл фаркъланалар?
3. Масаллар бизге насыл насиатлар бере? Инсаннынъ насыл мусбет табиат чизгилерини шерефлейлер? Насыл чиркин арекетлери акъкъында икяе этелер.
4. Энъ бегенген масалынъыз акъкъында икяе этинъиз.



СЫНЫФТАН ТЫШ ОКЪУВ

ОЗЬ КОЮМ

Корбекуль меним озь коюмдир. Онынъ сырт тарафында Къырымнынъ энъ юксек тёпеси олгъан Чатырдагъ башыны коклерге дөгъру узаткъан, булутларнен лаф этип отурыр. Чатырдагъ Къырымнынъ эр тарафында аньылыр. О, чынъларгъа, манелерге биле киргендир. Татар энъ буюк къайгъысыны, яныгъыны айтмакъ ичюн:

«Авдарылды Чадырдагъ, кочти Къырым,

Энди кимге айтарым гизли сырым?..» — чынъыны сёйлер. Чатырдагънынъ арт ягъыны кениш яилалар, деньизге бакъкъан тарафыны исе къоба, ешиль орманлар къаплар.

Мен оларны гузель бир къызынынъ коксюндеки инджи герданлыгъына ошатам. Корбекульнинъ куньбатысында Чатырдагънен эришип тургъан Хан-Чардакъ тёпеси бардыр. Онынъ янында Бабугъан-яйладан узанып кель-

ген юксек бир тёпе бар. Ене бу сырода, лякин бираз авлакъта, аякъларыны Къара денъизге узаткъан Аюв дагъы Корбекульни селямлап тура. Корбекульниң юксекче бир кырына чыкъсанъ, куньдогъушнен сырт арасындаки юксек Демирджи къаясыны корерсинъ. Бутюн бу юксек тёпелерининъ чевре-четини, Чатырдагъда олгъаны киби, гурь ешиль дагълар, орманлар къаплар. Иште Корбекуль бу гъуурлұ дагълар ве орманларның там ортасында ве кичкене байырларның устюнде къурулған буюк, беш-алты юз ханели бир татар коюдир. Корбекульниң денъизге узанған этеги устюнде исе, кичкене Алушта шеэри ерлешкен. Корбекульниң чевре-чети дерелик, байырлықтыр, суву чокътыр. Эалиси багъ-багъча ве тютюннен оғыраштыр. Экин пек аздыр. Ильк баарьде узакълардан учып кельген къушчыкълар Корбекульни дженнет беллер, энъ гузель түркюлерини, йырларыны айта-айта тёкерлер. Онынъ ойле гузель айдоғъуш ве куньбатышлары, ойле йылтыравукъ, джан чекиджи йылдызлары бардыр ки, оларның къаршысында инсан озюни дженнетте зан этер. Къартлар: «Тувгъан еринъ дженнет!» — дегенлер. Эгер дам тёпелеринде, яни байрам ве сейранларда салынджакъ янларында Корбекуль къызылары:

«Айди беним коюм — Корбекулим,

Бутюн Къырым ичинде бир топ гулым» — деп йырласалар, оларның бу ёлда пек чокъ акълары бардыр. Бир лафнен айтаджакъ олсакъ, Корбекуль бутюн Къырым ичинде эр түрлю гузелликлерини озюнде топлагъан, пери къызылары къадар, гузель бир койдир.

«Айя, айя айненним, осип бую сен бебиим!» — түркюсими къаранлыкъ гедже севгили аначыгъымның агъызындан мен дефа оларакъ анда эшииттим. Узун къыш геджелеринде оджакъ башының тавлы атеши къаршысында къомшу къартанаачыкъларның

агъызындан пек чокъ масаллар динъледим. Олар меним юрегимде ич бир заман силинмейджек, терен хаял излери быракъкъандыр. Мен татар халкъынынъ маневий байлыгъыны, гузеллигини, кениш барлыгъыны олардан огрендим.

Абиулла Одабаштан



1. Корбекуль кою акъкъында не бильдинъиз?
2. Бу койден, денъизден гъайры насыл дагъ, тёпе ве къаялар корюне? Бу дагъ ве къаялар акъкъында сиз насыл эфсанелер билесинъиз?
3. Абиулла Одабаш тувгъан коюне севгисини насыл сёз ве ибарелернен тарифлей?
4. Икяени бир къач кере окъуп чыкъынъыз, ве ашагъыдаки план боюнчада беян язынъыз.

План:

1. Корбекуль ве Чатырдагъ.
2. Кой эалисининъ огърашкъан ишлери.
3. Догъгъан еринъ дженнет.
4. Языджынынъ анасына олгъан севгиси.

ЭКИ РЕССАМ (масал)

Бир кунь, эки рессам озъара къонушып отургъанда, бири экиндjisine: «Айды, экимиз де бирер ресим япып бакъайыкъ, ангимиз гузель япар экенмиз?» — дей. Экиси де ишке кирише. Бириңжи рессам юзюм салкъымларыны пек гузель этип тасвирлеген ресим япып, оны кенди багъына кирген къапунынъ устюне асып къоя. Багъъа учып кельген къушлар, алданып, ресимни акъикъий юзюм салкъымлары беллеп, чокъумагъа баштайлар. Ресимни корыген адамлар да, пек бегенип, макътайлар. Бу ресимни япкъан рессам экинджи рессамнынъ эвине барып, ондан:

— Сенинъ япқъан ресиминъ къана? — деп сорай.
— Ана, анавы перденинъ артында. Бар да бакъынъыз,
— дей къонакъбай рессам.

Мусафирликке кельген рессам перденинъ янына барып, элини узатып, пердени котереджек ола. Амма шу ань бу, перде дегиль де, ресимнинъ озю экенини анълай. Шундан соң кулер юзынен рессам достунынъ къолуны тутып:

— Аферин санъа, тебриклейим, доступ, сен менден де уста ве кямилъ чыкътынъ, чюнки мен ойле ресим яптым ки, къушлар алданды. Сенинъ япқъан ресиминъден исе рессам биле алданды, — деген.



1. Биринджи рессам насыл ресим япқъан?
2. Экинджи рессам насыл ресим япқъан?
3. Масалнынъ мундериджесини айтып беринъиз.
4. «Натюрморт» деп неге айтаптар?
5. Сизинъ фикринъиздже къайсы рессам енъип чыкъты?

ТАВШАН ВЕ БАЛКЪУРТ (масал)

Кезинтиден къайтаятқъан тавшанчыкъ кимнинъдир: «Ярдым этинъ», — деп, багъыргъаныны эшите. Тавшанчыкъ токътап, чевре-четке бакъа ве орюмчек авына сарылып къалгъан балкъуртны коре. Балкъуртны аджыгъан тавшанчыкъ оны шу арада орюмчек авындан къуртара.

Эйиликни анълагъан балкъурт:

— Сени омюр билля унутмам, — дей тавшанчыкъка. Шу вакъиадан соң, олар достлашалар. Куньлернинъ биринде тавшанчыкъ балкъуртнен экиси арасында

олгъан вакъианы тавшанларгъа айтып бере. Олар исе, бу вакъиагъа эмиетсиз бакъаракъ, кулелер де:

— Тапкъансынъ кимнен дост олмакъны? Онынъ санъа насыл ярдымы тие биле? Эгер борюнен достлашкъан олсанъ... — дейлер. Лякин тавшанчыкъ, оларнынъ айткъанларына эмиет бермеден, достлугъыны девам эттире бере.

Куньлернинъ бириnde тавшанчыкъ борюнинъ панджасына тюше. Къоркъусындан къалтырай. Борюнинъ панджасындан къуртулып олмайджагъыны да анълай. Шу арада къайдандыр балкъурт етип келе ве борюнинъ бурну тюбюнде айланмагъа баштай. Айланып бурнунынъ устюне къона. Борю, оны къуваджакъ олып, озъ бурнуна панджа ура.

Эм ойле къатты ура ки, йыртыджынынъ сес-седасы тап орманнынъ четлерине де барып эте. Бойлелиkle, тавшанчыкъ шу джанаварнынъ панджасындан къуртула. Бу вакъианы эшиткен тавшанлар:

— Балкъуртнынъ озю кичичик олса да, борюни енъген,
— деп, шашалар.

Балкъурт керчектен де кичиктир, амма онынъ достлугъы буюк экен, — дей бу вакъианы козетип отургъан къаргъа да.

V. Мешалкин



1. Тавшанчыкъ кимге ярдым этти?
2. Тавшанлар бу достлукъкъа насыл къыймет кеселер?
3. Борюнинъ панджасындан балкъурт тавшанчыкъны насыл къуртара?
4. Бу вакъианы эшиткен тавшанлар не айтала?
5. Масалны окъуп мундериджесини икяе этинъиз.

* * *

Алиниң къулагында тесадюfen насылдыр аджыныкълы бир сес эшитильди. «Бу не экен?» — деп, о, доступны токъттатты. Экиси де этрафкъа бакъынып, динълендилер. Сес чалылар ичинден келе эди. Балалар анда чаптылар.

Сыныфдашлар коръгенлерине шашып къалдылар. Бир турначыкъ чалылар арасында къысылып къалгъан. Бичаре ачлыкътан ве ушюгенинден дыр-дыр къалтырай. Гъарипчик меджалсызлангъанындан къанатларыны котерип оламай. Къаргъа батып къалгъан. Онъ къанаты исе сынгъан. Афыдан ясалгъан къанат киби, асылы тура.

Къушның алышы пек адзыгъан Али Энверге:

— Кель, бичарени алыш беслейик. Баарь кельген соң, учурымыз, — деди.

Эскендер Фазыл

ЙЫЛ ДЁНЮМИ (Бир передели йырлы пьеса)

Иштирак этиджилер:

Къартбаба — Эски йыл.

Къыш, Баарь, Яз, Кузь — Къартбабаның оғыуллары.

Январь, Февраль, Март, Апрель,
Майыс, Июнь, Июль, Август,
Сентябрь, Октябрь, Ноябрь, Декабрь
— Къартбабаның торунлары.

Яш оғланчыкъ — Янъы йыл.

БИРИНДЖИ КОРЮНИШ

Перде ачылгъанда: буюк оданынъ ортасында Эски йыл; диварда буюк бир чалар saat он бир бучукъны косьтере. Эски йыл бир озю.

Эски йыл — Мен январьда яшамагъа башладым.
Бу дюньяда он эки ай яшадым.
Ах, къартайдым, бельден такъат кесильди,
Пенджереден: «Энди кет!» — деп, сес кельди.
Диварда saat чалмаз бугунь он эки,
Сагълыкълашып етишиrim мен бельки.
Эвлятларым, етишинъиз тез мында!
Бир сёзюм бар, омрюмнинь соңунда.

ЭКИНДЖИ КОРЮНИШ

Къартнынъ оғыуллары ве торунлары чапышып кирелер.

Эски йыл — Эй, балаларым, манъа эджель якълаша.

Меним тахтым бир балагъа авуша.
Бирер-бирер манъа эсап беринъиз:
Халкъларгъа сиз насыл хызмет эттинъиз?

Къыш — Мен — бир къышым, сувукъым, чатлама аяз.

Къара ерни мен орьттим ап-пакъ беяз.
Акъкъан сувны токътатып, къурдым копюр,
Шу копюрден эмекчи халкълар отер.

Эски йыл — Ах, сен гузель шей япъансынъ, огълум.

Я бу янынъдаки балачыкълар — кимлер?

Къыш — Олар — меним огъулларым.
Бунынъ ады — Декабрь, бунынъ — Январь, бунынъ
исе — Февраль.

Эски йыл — Ах, торунчыкъларым, торунчыкъларым,
Келинъиз меним яныма (*башларыны сыйпар*).
Сонъ, сен не яптынъ, Баарь? Айт бакъайым.

Баарь — Къалын къарны, сувукъны гъайып эттим,
Оны корип, къуванды оксюз, етим.
Ешилленди багъ-багъча, чёль эм тогъай,
Йырлап энди токътамай чочамий торгъай.
Чешит тюрлю чечеклер къокъып турा.
Кунеш онъа сыйджакъны кунь-куньден ура.
Айван, инсан, къуш-къуртлар ишке дала.
Чёльде чобан къой бакъып, къавал чала.

Эски йыл — Сенинъ къач баланъ бар?

Баарь — Учъ дане. Адлары — Март, Апрель,
Майыс.

Эски йыл — Я сен, огълум, яз, не яптынъ?
Я з — Сыйджакъллым ер юзюни кереги киби,
Экинлернинъ, багъчанынъ кельди эби.
Экин пише чёллерде, чалынып турा,
Басым, черен этелер сыра-сыра.
Бастырмагъа сонъра халкъ ондургъа къоя
Бутюн дюнья къуванып отьmekke тоя.
Хызмет этип, халкъ чёльде ёрула, тала,
Къушлар къозлап ювада чыкъара бала.

Эски йыл — Сенинъ огъулларынънынъ адлары
не?

Я з — Адлары — Июнь, Июль, Августтыр.

Э с к и й ы л — Келинъиз, торунчыкъларым,
отурынъыз яныма (*торунларынынъ башларыны сыйпал сөве*). Энди сен башла, Кузь! Сен не эттинъ?

К у з ь — Ягъмур ягъа, кок агълай, сертее ава,
Кунь къыскъара, ель эсе, гузеллик сава.
Эр кес къышлыкъ азырлай, эвге ташый,
Бойле эте тедарик къарты, яшы.
Япракъ къурып сарага, чёллерде когет,
Къушлар дейлер: «Кетмеге вакъыт, эльбет».
Мектеплерде балалар топлашалар,
Окъув-язув огремеге чалышалар.

Э с к и й ы л — Сенинъ балаларынынъ адлары
не, огълум?

К у з ь — Бу биригининъ ады — Сентябрь, бу бириси
— Октябрь, о бириси де — Ноябрь.

Э с к и й ы л — Энди, эвлятларым, saat он экиге бир
къач дақъкъа къалды. О дақъкаларны бош кечирмемек
ичюн, бир парча ойнанъыз, торунчыкъларым (*торунлар, бир-бирлерининъ эллерinden тутыл, алқаланалар. Ортагъа Къыш, Баарь, Яз ве Кузь тюшелер. Чалгъы къоран авасыны чала, эписи йырлап ойнайлар. Эски йыл отургъян еринден оларны динълей, сейир эте. Saat он экини чала. Оюн токътай. Эски йыл еринден яваш-яваш тұра*).

УЧЮНДЖИ КОРЮНИШ

Яш оғыланчыкъ къияфетинде Янъы йыл кирип келе.

Эски йыл — Иште, санъа бу тахтым хайырлы олсун!
(Янъы йыл келип, Эски йылнынъ ерине отура).

Халкъынынъ хатри хош олып, дюнья онъсун!

Мен къартайдым, эвлядым, кетеджегим,
Буны санъа сымарыш этеджегим:
Окъут халкъны, козюн ач, джаиллик кетсин,
Яман-яхши айырып, акълы етсин.

Янъы йыл — Коктен энип мен ерге, миндим тахткъа,

Бакъып тааджипнен мен дёрт бир якъкъа.

Халкъкъа баҳт кетирдим эм берекет,
Энди дюнья олмайджакъ ич алекет.

Халкълар раат яшайджакъ къасевет-гъамсыз.
Онынъ ичюн олманъыз ич раатсыз.

ПЕРДЕ ЭНЕ.

Асан Чергеев

ШИИРЛЕР АЛЕМИНДЕ

* * *

Дженк далгъасы азабындан чыкъкан халкъым,
Ташны тешип, озюне ёл ачкъан халкъым,
Сенинъ иле гъурурланам эр кунь, эр ань.
Керек исе, олсун санъа джаным къурбан.

Сен олгъанда, манъа догъмуш бутюн алем!
Йыллар кечип кеткенине янмайым мен.
Санъа синъип, сенинъ иле яшайым мен...
Биревлерчюн, тамчы киби, кичик халкъым,
Меним ичюн, денъиз киби, буюк халкъым!

Иса Абдураман

УКРАИНАГЪА

Гузеллиги къаарсыздыр, джандан севем юртумны,
Ашлыкъларгъа толып къала берекетли арманы.
Севем онынъ урь аятлы, шенъ яши ве къартыны,
Ягъмурлары юзни ювгъан тувгъан Украинамны!
Сачувдан соң, хош баарьде гудюрдеген кокюни,
Севем, ельден занларында далгъалангъан экинни.
Эменлернинъ алтын тюске чевирильген чагъыны,
Тарлалары, орманлары, дюльбер багъча-багъыны.
Отлакъларгъа чыкъ тюшкенде, къушлар отъкен

танъларны,

Днепрининъ бойларыны, бол, мукъаддес янларны.
Къаш къаарарса, чевре-четте янгъан чыракъларыны,
Ер-емиши, себзеваты, якъын, иракъларыны.
Украина, чечекленир, янъгъыраркен йырларынъ, —
Йырларынъа, севда киби къошулып, мен йырларым.

Любовь Забашта
(украин шаиреси)

КЪАРТ ДЖЕВИЗ

Кимерде, юрегим санки кенъ денъиз...
Кимерде, эльбетте, къайгъылы олам.
О вакъыт азбарда даллангъан къарт джевиз
Терегин корем де, ойларгъа далам.
Йыл сайын даллары джевизге толса,
Урлугъын узакъкъа савура еллер.
О, кельген адамгъа сёйленип олса,
Ким биле, не къадар дерт корыген беллер.
Яшады эм корьди о, тюрлю аят,
Чокъ кере фуртуна къыйнады, йыкъты.
Яшынлар далларын къурутты, якъты,
Шунынъчюн къабугъы бурюшкен къат-къат.

Христо Джонев
(болгар шаири)

АКЪШАМ МААЛИ

Кунеш акъып уфукъкъа батты,
Пенджеремден кумюш ай бакъты.
Мавы кокте янмакъта йылдыз,
Юкълады этраф... Къаарь юмды козь.
Багъчагъа чыкъып, кезинем, къайтам,
Ай нурунда тюркюлер айтам...
Бу ер недай тазе, кенъ, сербест,
Унутылды бутюн гъам-къасевет.
Этраф багъча, эвлер — пак, къардай,
Орманда шенъ бульбуллар йырлай.

Леся Українка
(украин шаиреси)

АНА ЮРЕГИ

Ана юрек – деньиз киби раатсыз,
Мераметли, буюк, джумерт юректири.
Аналаргъа къасеветсиз, къаарьсиз
Ве тынч омюр эр кестен пек керектири.
Композитор яза бизчун макъамлар,
Шаир — шиир,
Йырджы — рухкъа рух къата.
Лякин ана-юрек киби айт, не бар?
Азиз ана, о — адамлар ярата.

*Къара Сеитлиев
(туркмен шаири)*



МУНДЕРИДЖЕ

1-инджи дерс. Якъуп Шакир-Али. Мектеп ве миллий тиль	3
Абибулла Одабаш. Китап	4

ХАЛКЪ АГЪЫЗ ЯРАТЫДЖЫЛЫГЪЫ

2-нджи дерс. Бешик йырлары	6
3-юнджи дерс. Бала шиирлери	7
4-юнджи дерс. Тапмаджалар	8
5-инджи дерс. Тезайтымлар	11
6-нджы дерс. Аталар сёзлери	12
7-нджи дерс. Масаллар	13
Яланджы	14
8-инджи дерс. Мустафа	16
9-ынджы дерс. Чингене ве булут	20
Метинге къююлгъан суаллер	23
10-унджы дерс. Мен де буны тюшюне эдим	24
Чиркий ве арслан	25

КЪЫРЫМТАТАР ЯЗЫДЖЫЛАРЫНЫНЬ БАЛАЛАРГЪА БАХШЫШЛАРЫ СЫРЛЫ ЯЗ ВЕ АЛТЫН КУЗЬ

11-инджи дерс. Зейтулла Албатлы. Яз	28
Зейтулла Албатлы. Кузь	28
Шиир акъкъында	29
Юнус Къандым. Кунешчик	30
12-нджи дерс. Метин. Икяе метини	31
Юсуф Болат. Сельби ве шефтали тереги	31
13-юнджи—15-инджи дерс. Умер Ипчи. Къартлар	33
16-нджы дерс. Черкез-Али. Кобелек	42
И. Къая. Кобелеклер	43
17-нджи дерс. Джемиль Кендже. Турналар кочелер	44
18-инджи дерс. Тариф метини	45
Юсуф Болат. «Балықъларнынъ ...»	46
19-ынджы дерс. Фикир юрютюв метини	47
20-нджи—21-инджи дерс. Эмиль Амит. Денъизде геми ялдай	48

22-инджи дерс. Метинни къысымларгъа болюв.	
План тизюв.	52
Джеевдем Аметов. Кузь	52
23-юнджи дерс. Ресим узеринде иш	54

АНА ЮРТ

24-юнджи дерс. Эшреф Шемьи-заде. «Бу зенгин тиль ...»	56
25-инджи дерс.	
Багъчасарай бойле пейда олгъан	57
Метинни агъызавий шекильде икяе этюв.	59
26-нджы дерс. Аюв-дагъ	59
Айя	61
27-нджы дерс. Энвер Къафадар. Ватан	62
Фейзи Юртэр. «Къырымда ...»	64
28-инджи дерс. Абигулла Одабаш. Байрам айы	64
29-ынджы дерс. Лёман Сулейман. Кучелек	67
30-ынджы—31-инджи дерс. Метинни язма шекильде беян этюв	69
Риза Фазыл, Люtfie Софу. Амет-Ханының балалыгъы	70

КУМЮШ КЪЫШ

32-нджи дерс. Зейтулла Албатлы. Къыш	75
Юнус Темиркъая. Къыш ве балалар	76
33-юнджи дерс. Метиннинъ талили	77
Отымекке урьмет	77
34-юнджи дерс. Абигулла Одабаш. Къыш-уста	79
35-инджи дерс. Шакир Селим. Къарбабаны беклеп	80
36-нджы дерс. Ресим узеринде иш	82

ЭМЕК СЕВГЕН — БАХТ ТАПАР

37-нджи дерс.	
Зейтулла Албатлы. Эмек севген — баҳт тапар	83
38-инджи дерс.	
Абдулязиз Герайбай. Балкъуртлар ишке башлай	84
Эрдживан Керменчикли. Истер исенъ	85
39-ынджы—40-ынджы дерс.	
Ибраим Пашиден. Къоркъакъ Неби ве йылан	86

<i>41-инди дерс. Билял Мамбет.</i> Чебер кызы	89
<i>Билял Мамбет.</i> Дюльгер	90
<i>42-нди дерс. Юнус Къандым.</i> Маджера	91
<i>43-юнди дерс. Лёман Сулейман.</i> Сервер ве чечек	92
<i>44-юнди дерс. Абиулла Одабаш.</i> Чалышыр ве огренемиз . .	95
<i>45-нди дерс. Эшреф Ибраим.</i> Кичик усталар	96
<i>Иса Абдураман.</i> Бахыш	97

ГУЗЕЛЬ БААРЬ

<i>46-нджы дерс. Ашыкъ Умер.</i> Баарь	98
<i>47-нджы дерс. Иззет Эмиров.</i> Кырымның баари	99
<i>48-инди дерс. Юсуф Болаттан.</i> «Чечек! ...»	100
<i>Зейтулла Албатлы.</i> «Мен — бир баарь ельчигим ...» . .	101
<i>49-ынджы дерс. Ибраим Бахшиш.</i> Баарь кельди	102
<i>Черкез-Али.</i> «Эмджен къюн бакъа чокътан ...»	103
<i>50-нджы дерс. Ресим узеринде иш.</i>	104
<i>51-нджы дерс. Джевдет Аметовдан.</i>	
<i>Аналар — энъ мукъаддес сөз</i>	105
<i>Билял Мамбет.</i> «Ананы айбетле, ...»	106
<i>Джеваире Меджитова.</i> Ана	106
<i>52-нджы дерс. Шакир Селим.</i> Масал	107
<i>53-юнджи — 54-юнджи дерс. Риза Фазыл.</i>	
<i>Наврез байрамы</i>	109
<i>Шамиль Алядин.</i> Баарь	114

ЧЕТЭЛЬ ХАЛКЪ АГЫЗ ЯРАТЫДЖЫЛЫГЫ ВЕ ЭДЕБИЯТЫНДАН

<i>55-инди дерс. Адам Мицкевич.</i> Алушта гедже	115
<i>Адам Мицкевич.</i> Чатырдагъ (<i>Терджиме эткен Шакир Селим</i>)	116
<i>56-нджы—59-ынджы дерс. Ханс Кристиан Андерсен.</i> Титис папийчик	117
<i>60-ынджы дерс. Ахмакъ къашкъыр (къазах халкъ масалы)</i> (<i>Терджиме эткен Аблязиз Велиев</i>)	128
<i>61-инди—65-инди дерс.</i>	
<i>Джонатан Свифт.</i> Гулливер девбичимли адамлар арасында (<i>Терджиме эткен Макъсум Сулейман</i>)	129

МАСАЛЛАР АЛЕМИНДЕ

66-нджы дерс. <i>Иса Абдураман</i> . Арслан ве тавшан	146
67-нджи дерс. Къаплан ве тильки (<i>таджик халкъ масалы</i>)	149
Адалетли къады (<i>афгъан халкъ масалы</i>)	150
68-инджи дерс. Къашкыр насыл этип отьмек пиширеджек ола. (<i>литва халкъ масалы</i>) (<i>Терджиме эткен Аблязиз Велиев</i>)	151
Торгъайчыкъ	153
69-ынджы дерс. <i>Эмир Фаикътен</i> . Ведалашув	154
70-инджи дерс. <i>Зиядин Джавтобели</i> . Бала ве аюв	156

СЫНЫФТАН ТЫШ ОКЪУВ

<i>Абибулла Одабаштан</i> . Озъ коюм	159
Эки реssам (<i>масал</i>)	161
<i>B. Мешалкин</i> . Тавшан ве балкъурт (<i>масал</i>)	162
Эскендер Фазыл. «Алининъ къулагында ...»	164
Асан Чергеев. Йыл дёнюми (<i>пьеса</i>)	164

Шиирлер алеминде

<i>Иса Абдураман</i> . «Дженк далгъасы азабындан ...»	169
<i>Любовь Забашта</i> . Украинагъа	169
<i>Христо Джонев</i> . Къарт джевиз	170
<i>Леся Украинка</i> . Акъшам маали	170
<i>Къара Сеитлиев</i> . Ана юрги	171

Навчальне видання

АЛІСВА Леніс Аблязівна
МУРТАЗАСВА Гульнар Емірівна

**Літературне читання.
Кримськотатарська мова**

Підручник для 4 класу
загальноосвітніх навчальних закладів
з навчанням кримськотатарською мовою

Художник Зера Акімова

Редактор Г. М. Дудакова
Тех. редактор М. Дж. Курбідинова
Худ. редактор З. Ш. Акімова
Коректор Е. А. Ібрагімова

Формат 70x100¹/₁₆. Ум. друк. арк. 14,25 Обл.-вид. арк. 12,00.
Наклад 300 прим. Зам. № 1054

Видавець і виготовлювач видавничий дім «Букрек»
вул. Радищєва, 10 м. Чернівці. 58000

Свідоцтво про внесення до Державного реєстру
суб'єкта видавничої справи ЧЦ № 1 від 10.07.2000 р.